

# *MÊNÀ MAPENDI À NZAMBI*

 Twasàkidila, Mwanèètù Neville. Eci ncyenze bu—bu cimbazùle mêmè. Ncìvwa ne cyà kwikalà apa leelù to. Kàdi, dildòlò edi ndilòlò didi mèssà à Mukalenge, kàdi mvwa—kàdi mvwa mwele meeji ne mvwa ne cyà kulwa mu dindà emu. Ki mêmè kubìikila Mwanèètù Neville, e kwambayè ne: “Èè, mpindyewu, pawikalà ulwa,” yéyé ne: “bwà cinyì kuyikù mwà kutwàkwilaku nànsa ndambù mukesè?”

<sup>2</sup> Ki mêmè kudyàmbidila ne, èè, bu mêmè mwà kupweka, ne bìvwa mwà kwenzeka, ncìvwa mufwànyìne kuyiisha to, kàdi mvwa mufwànyìne kwakula ne èkèleeyìya katancì kakesè pa maalu àdì, nudi bamanye's, andì ngeela meeji ne àdi mwà kukolesha èkèleeyìya.

<sup>3</sup> Tucìdi tufùminaku ku lwètù—ku lwendu lwètù lwà dilemba dyà mu muvù wà mabèjì àpòòpoka, mêmè ne bânà bètù, kaaba aka, ne tuvwa bapìcile mu cikondo cyà butùmbi. Tudi—tudi ne disàkidila dyàbúngì, bônsò bwètù bapàte, ne—ne bapete nyama yètù yitùvwa tulemba ayi. Nènku—nènku mêmè ne mpaasàtà wètù tudi bamanyè ne munyiinyi wà kashà awu mmwímpè, mmwímpè wà menemene. Nànku tuvwa bapete ndambù wa tushà twímpè. Ki mêmè kupeta ours ne tushà tùbidì. Ki twètù kwalukila.

<sup>4</sup> Ne eci cidi ne cyà kwikalà cikondo cîndì ne cyà kwakula pa Bitampì mwandamutekête byà ndekeelu abi. Kàdi kabàvwa balongòlolo èkèleeyìya to. Nènku kùdi cintu kampànda, cipùmbishi, cidi cìcyenzèje. Aci, ndi ngeela meeji ne cimenga cidi cìtùpèèsha lutàtù, bwalu katwèna ne myaba mikùmbànè yà kuteeka màshinyi bwà bûngì bwà bantu batwìkalà...bikalà èkèleeyìya mwà kwambula.

<sup>5</sup> Tudi baswe èkèleeyìya mupyamùpyà ibakiibwè mwaba ewu, nènku tudi ne ndambù wa mfranga mimana kulongolola, nènku—nènku mbwà kwasa è—èkèleeyìya mutàmbe bunène. Kàdi patuvwà ne wasangisha aa, mònà's nudi bûmvwe cidi bwalu. Ncintu cidi cyenza luse be. Bantu bàdì mu nyungulukilu wa bimanu, pambèlu mu myùla, ne—ne—ne bìdi ànu byènza bibì be. Nènku didyûla didi dìfùmina nànsa kùdi balunda bàànyì. Bàmba ne: “Mwanèètù Branham, mbyenze ànu bu ne bôbò...” Ngàngàbukà mulunda wanyì, kwambaye ne: “S'udikù mwà kupeta kaaba kampànda.” Kwambayè ne: “Ndi ndyùmvwa bibì, padìbo bàpìta apu.”

<sup>6</sup> Mungàngà mukàjì mutumba naanyì, kwambayè ne: “Mònà's, ndi mupìcilekù mu dindà kampànda pa díbà itàànu jaajaaja. Uvwa ne cyàkwikalapu...” Yéyé ne: “Bantu bàkavwa bakùngwile mu nyìngùlukilu wa èkèleeyìya awu kwinshi

aku, pa dîbà ìtaanu wa dîndà jaajaaja. Wêwè uvwa ne cyà kwikalaku pa dîbà citèémà ne tusunsa makumi àsàtù.” Pa nànkú, nwamònu’s, ke cìdì cìcivwija cikolè ncyôci aci.

<sup>7</sup> Nènku tudi baswè èkèleeziyà udi ne mwaba kampànda wà kusòmبا, ne mwaba wùdi bantu bônsò mwà kusòmبا. Ne tudi twela meeji ne tudi ne mwoyi mu matûkù à ndekeelu, twitabuuja aci. Bwà ne mwaba ùdì... Tuvwa ne cyà kwikalala tulongesha Èkèleeziyà bwà—bwà—bwà bintu ebi, disongoloka adi, bintu bìvwà byambibwe mu cipròfetà, bimwè byà ku byôbì, kùkaadi bidimu binunu. Nènku bwà bidimu bitwè ku makumi àbìdì ne bítaaanu anyì makumi àsàtù, ànu kuumukila ku ewu èkèleeziyà ewu, bìvwà byamba mu cipròfetà, bìvwà ne cyà kwenzeka. Nènku mpindyewu nyéwù tudi tûbimona byènzekà buludi. Pa nànkú bìvwa bìtùkèngela kuvwijilula bintu ebi bipyabípyà, kàdi katwèna ne mwaba mukùmbànè to. Pa nànkú mu dîndà emu...

<sup>8</sup> Mvwa ngenza mabìikila àànyì ne bikwàbò, makèèlèlà awu, ne ndì ne makwàbò àà kwenza, mu mapingaja emu, ne bikwàbò. Ne pashìishe mvwa ne bantu kampànda bàvvà bajinga bwà kubwela, nsongàlùme wa maalu malenga, udi ànu ne mutù munyùngùlùke, mwambi naanyì mu budimi bwà bwambi. Ne bààbùngì bàà mushindù awu, ne mwanèètù kampànda mufùmìnè ku Norvège. Nènku—nènku tuvwa ne miyuuki mikesè paanyimà apa mu cibambalu cyà ku mfundu eku. Ki mêmè ne: “Èè, mpindyewu, netùpatukè ànu cyanàànà.”

<sup>9</sup> Ke Mwanèètù Neville kwambayè ne: “Èè, tudi tujinga bwà ùpàtukè ûlwa kwamba mèyì makesè bwà kukolesha Èkèleeziyà kakesè.” Cyàkumpàl...

<sup>10</sup> Cìmwè cyà ku bintu byà kumpàla bîndì njinga kwamba. Mvwa mufùnde tuntu ndambù pa dibèji apa, twà ne, pândì ndwa mu èkèleeziyà emu, tûmvwà muswè kwamba. Cintu cìmwè cîmvwà mufùnde mwaba ewu civwa cîtàngila lufù lwa Mwanèètù munanga Taylor patùvvà bayè.

<sup>11</sup> Mwanèètù Taylor ùvwa ùlwälwalwa mu èkèleeziyà emu bidimu ne bidimu. Bônsò bwètù tuvwa bamumanyè, ndì mutwìshìibwe. Kàdì kwôkò kufwànyìne kwikalala beenyi mwab’ewu, ùvwa mmukùlumpè wa mushinga mukolè wa dipòkò uvwa ukupetela nkwasà, bwà kukusòmbesha awu. Mwanèètù Taylor, musangu wà ndekeelu ungàkamumònà mpindyewu, too ne mungàmumònà nsongà, ùvwa mwimane ku ciibi kwàka kùkaadi maadyàlumingu àsàtù anyì ànaayi. Kwambayè ne: “Mvwa njinga kupetakù ndambù wa mikàndà, Mwanèètù Branham. Mvwa njinga kwabanyakù mikàndà eyi.” Pa nànkú tudi, yéyè...

<sup>12</sup> Cìndi ngùmvwa ncyà ne ùvwa ne dísama dyà nsùkaadì ne mubwele mu kòòma, kàdì kàvwa... kàvwa mumanye ne ùvwa ne dísama dyà nsùkaadì nànscha. Ne—ne ùvwa... Wàkafwà. Yéyè kàkafwàku to. Wàkaya ànu bwà kiikala ne Mukalenge Yesù.

<sup>13</sup> Kàdi ùvwa mwena lulamatu, mwanèètù wa dikèma, misangu yônsò ànu mweledi wa bantu bakwàbò meeji. Nènku dyèndè disànka dìvwa dyà kuteeta bwà kupetelakù muntu kampànda mwaba wà kusòmба, pàvvàye ùlwa mu èkèleeziyà. Kàdi nudi bamanyè's, pàmwàpa, patùdì tusambuka mushoonyi wà Mùkalu, kabyàkwikalakù bîmpe bwà kumònakù Mwanèètù Taylor kuntwaku, ùtupetela mwaba wà kusòmба, luseke lukwàbò lwàlwà anyì?

<sup>14</sup> Ndi ngeela meeji ne, bwà kuvùluka Mwanèètù Taylor... Ncivwa mwaba ewu bwà kuciyikila ne Mwanèètù Neville to, ku citàlù cyèndè, kàdi ndi muswè kwamba dìyì dyà dyanyisha dyànyì, kùdì mukàmbà wende. Mwanèètù wa bakàjì Taylor, ngeela meeji, ùdi mwab'ewu mwaba kampànda mu dìndà emu, mwoyi wèndè wà lulamatu ùbènèshiibwè!

<sup>15</sup> Mwanèètù Taylor, dìnga ditùkù kwambayè ne: "Wâlwà kumònangananakù naanyì. Ndi ne kaadijiba kakesè kuumbula mwaba ewu, ndi mwelemù ndambù wa mishipa, pa nànkù udi mwà kulwa kulòbakù." Misangu yônsò wèlela muntu mukwàbò meeji. Kàdi kùvvwa Muntu kampànda uvwa umwelela meeji, awu ùvwa n'Kilistò, bwà kumupa lupàndu.

<sup>16</sup> Ngeela meeji, bwà kumuvùluka, kàbìdì, bwà èkèleeziyà ewu, bu mudiye mukùngwila bu mubidi ùmwè mu dìndà emu, twimanàayi cyàpàmwè, twinyikààyi mitù yètù kumpàla kwà Nzambi.

<sup>17</sup> Taatù wetù wa mu Dyulu, twêtù bu bantu mu dìndà emu, ne-bàtù balwa mwaba ewu wà dikuukwila... Cyanza cyèbè cinène ncikwàte mudimu munkaci mwètù ne cyangàte kutùdì umwe wà ku bânà bètù bananga utùvwa banange, ne bamanyè ne Wéwè uvwa mumunange. Kàdi Wéwè uvwa ne kabingila bwà byônsò ebi, Mukalenge, cyanàànà kabìvwa mwà kwikala byenzèke müşhindù ewu nànscha, bu mutùdì bamanyè ne Bible wetù ùdi ùtwàmbila, ne: "Bintu byônsò bidì byenzeka bwà dyàkalenga dyà bâdì banange Nzambi." Ne ke mùvvàbi bwèndè.

<sup>18</sup> Nènku tudi tukènzakana, pa buloba apa, ne tusangana ne bufuki mu mishundù yônsò bùdi bwàkula neetù, ne lukita kalwèna mwà kumulama to, bwalu pa buloba yéyè wàkakùmbàja kiipacila kaWàkamutumina bwà yéyè kwenza. Yéyè ùvwa mwanèètù mwîmpe, wa lulamatu.

<sup>19</sup> Tudi tusangana aci mu mwoyi wà bukwàmici, ne mu mwoyi wa dìbà dìdì dìjuukà mu dìndà bwà kutùpèèsha bukénkè. Nènku munkaci mwà ditùkù dìdi dilwa cikondo cyà bukùlumpe. Nènku pashìishe dilòlò dìdi difwa kàbìdì, ànu bwà kujuuka kàbìdì mu dìndà dyàlondà, ne cyashima ne dipydípyà, bwalu dìvwa dikùmbàje kiipacila kàà Nzambi.

<sup>20</sup> Tudi tumòna bilòngò pàdìbì bibwayika ne bìlengeja buloba ne bìlengeeja bibambalu byà madilu, ne myaba yà mafestò à dibàkà, ne bìkùmbàja kiipacila; bìkangula mwoyi wàbì ne bìfila,

kakùyì mushinga mufuta, bwíci kùdì lubùlùbùlù, ne mànànanshì kùdì mupicì wa njila, bulenga kùdì mukèbi. Cìfila cyônsò cìdici naaci, ku mudimu wà Nzambì, pashiishe cìdì cinyika mutù wàcì mukesè awu. Kàdi pàdì muvù wà bintu bitòloka ùpingana, cìdì cijuuka kàbìdì, bwalu cidi cikumbàja kiipacila kà Nzambì.

<sup>21</sup> Pashiishe mu mpàla wa bufuki bwônsò, ne Bible, mulayì, ne Nyumà Mwîmpè, tudi mwà kucyònkòmoka ne disànta mu mwöyi wètù, pa kumanya ne Mwanèétù Taylor, byà mwomùmwè, Mukalenga, wàkakùmbàja kiipacila kàà Nzambì. Kàdi bwà kwamba ne kààkubìika ku lufù aci ncifwànyine kwikala kuvila kwà Bible, kwà Nzambì wètù, ne kwà bintu byônsò bìdì Nzambì mutùpèëshe bwà twétù kubitàngila, bwà kumanya ne kùdi dibiikà dyà ku lufù. Pa nànku tudi bindile cikondo citwìkalà mwà kumumònà cyàkàbìdì, piìkalaye nsonga ne bukolè bwà mubidi ne kàcìyì kàbìdì mwà kusaama anyì kukùlakaja to.

<sup>22</sup> Bèneshàku mukàjèndè wa mushinga mukolè, mwena dyèndè wa lulamatu awu. Mwàtùtacishàbi mwine ntànta mule, bwà kubènga kubàmònà kàbìdì, Mukalenge, mutùvwà tubàmònà bàya pàmwè ku dijiba, ne bàsòmba pa tùbasa tukèsè pembèlu pààpa, munkaci mwà kuloba, ne kuyiikila, ne mùshindù mene ùvvàbo bananga bàà menemene.

<sup>23</sup> Nènku mpindyewu tudi bamanyè ne kùdi Ditùkù dinène dìdì dìlwa, piìkalà bilöbo byà diitabuuja ne cyà kwendela mwinshi mwà ntafu munene wa bucìmunyì, ne Banjèlò bàà...nebùwuje mpèëpele ne misambu. Netùbàmònà kàbìdì mu mwaba awu.

<sup>24</sup> Too ne dîbà adi, Mukalenge, tûpèëshèku bukitù. Tùbènèshèku ne tûkwàcishèku. Ntàntà mule Mwanèétù Taylor neàtùpangike, ne muntu yônsò utu ulwa mu èkèleeyìyà ewu, mùvvàye wìmana ku ciibi kwàka ne ùpetela muntu uvwa ulwa mwaba bwà kuteelejaye Dîyi dyà Nzambì, ne bwà kusòmbayè mucyankàme ne kwikisha.

<sup>25</sup> Ditùkù adi pààkasabukàye, Mukalenge, ngâkalòmba ne Mwarkanjèlò munène wa Nzambì imàna mwaba awu ku ciibi, bwà kumupetelakù pèndè, mwaba, Mukalenge, bwà wàmònà mwà kusòmbakù. Bwalu mbafunde mu Bible ne: “Beena luse nebàpetè luse.” Too ne patwàmumònà, Mukalenge, swàku bwà bivùlukilu bitùngunuke ne kwikala byà kalolo munda mwà myôyì yètù, too ne ku ditùkù kampànda patwàtwilanganà cyàkàbìdì mu Buloba bukwàbò. Mu Dînà dyà Yesù Kilistò mmutùdì tulòmba nùnku. Amen.

<sup>26</sup> Neàpangikè ntàntà mule munkaci mwètù ne munkaci mwà beenyi, ne bakwàbò, bâtù bâlwa mu èkèleeyìyà wètù, anyì mu citanda cyètù emu, bwà kukuukwila. Swàku bwà musùùkà wèndè wìkishè mu ditalala kumpàla kwà Nzambì, too ne ku Ditùkù adi.

<sup>27</sup> Dînga ditùkù, kàbìdì, yônsò wa kutùdì neàye, ku umwe ku umwe, too ne mutwàpweka ne mulongo mùshindù awu.

Nènku mpindyewu, patùcìdì ne dîbà, ne mùshindù apa, tudilongòlòlaayi bwà cikondo aci cìdì cyènda cìlwa; bwalu katwèna bamanyè dîbà dììkalaci to. Katwèna bamanyè ne nganyì walonda to. Tùsombàayi nsòmbelu wa ne, ku ditùkù dyônsò, bwà ne bu cyôcì mwà kulwa, ciikale bwètù twètù, netwìkalè badilongòlòle.

<sup>28</sup> Mpindyewu, ndi njinga kufila mamanyisha. Mpindyewu, mu mutancì mukesè emu, pàmwäpa, mîngà misangu, ncyêna muyikilàngànè ne balubuludi kacya ngààlukila, pa bìdi bitàngilà mùshindù wà kwibaka è–ekèleeziyà kaaba aka to, anyi citwikalà ne cyà kwenza matùkù àdì kumpàla eku, kufikisha èkèleeziyà wetù mu mùshindù wà twamona mwà kwenza masangisha ètù. Pashiishe nentùngùnuke, mfwilaayiku luse, ne—ne Bitampì Mwandamutekête, ne pashiishe Mpànzà Mwandamutekête, ne bintu bikwàbò byàbûngì kabidi bitwikalà ne cyà kubwelamù, kakùyi dijànguluka to.

<sup>29</sup> Nènku mpindyewu, mu dyàlumingu dyàlondà mu dìndà, dyàdyà, ndi ne cyà kwikalà ku Elisabethtown, mu Kentucky, ne Mwanèètù L.G. Hoover, ku—ku mudimu wà dijidila dyà ntèmpelù. Nènku mbwà kajidila tabernacle mupyamùpyà, anyì tabernacle udibò basùmbe mu Elisabethtown, mu Kentucky. Upweka ànu ne njila wa 62 too ne mûyààyà kafika ku Elisabethtown, anyì upweka ànu, mvwa nswa kwamba ne, njila wa 31, anyì kwinshi kwà cibeeba cyà mpungà. Ànu lwà mu masangu amu, ciyààya kakufikisha ku Elisabethtown. Cìdi bu mu ntàntà wa dîbà dijimà nànnku awu. Cìdi bu mu ntàntà wa kîlômèètà makumi àtaanu ne yisambòmbò, makumi àsambòmbò ne ìnaayi lwà kwinshi aku. Ngeela meeji ne, mitwè ku makumi àsambòmbò ne ìnaayi, mu njila wa...wa 31, ne yipacila ku makumi àtaanu ne yisambòmbò, anyì cintu kampànda, munga njila, kupweka lwà ku cibeeba cyà mpungà. Mmu mùsèèsù wà Mulberry.

<sup>30</sup> Mudimu wà dibanjija dyà ntèmpelù. Mwanèètù Hoover neikalè ne Kàalaasà kàà dyàlumingu kàà cibidilu pa dîbà dikumi jaajaja. Nènku ndi ne cyà kuyiisha mu disangisha dyà dibanjija adi, kuumukila ku dîba dikumi ne umwe too ne ku dîbà dikumi ne ibìdi, mu dyàlumingu dìdì dilonda edi, dyà matùkù dikumi ne dimwè à ngondo wa dikumi ne umwe.

<sup>31</sup> Ku cibàsà cyà mamanyisha cìdi pambèlu cyàcyà, kùdi—mamanyisha pa bwalu ebu. Nènku nekwìkalè ku...Nenwikale mwà kuperetela njila wenù kuumukila ànu kwôkù aku. Mmu mùsèèsù wà Mulberry. Anyì bôbò—bôbò mbaleeje njila ku... Cìdi ku cibàsà cyà mamanyisha cìdi pambèlu pààpa mumpàla mwà èkèleeziyà ewu.

<sup>32</sup> Pashiishe, mu—mu dyà matùkù makumi àbìdi ne—ne àbìdi à ngondo wa dikumi ne umwe, ndi—ndi ne cyà kwikalà ku Shreveport, mu Louisiane, mu dyà matùkù makumi àbìdi ne

àbìdì, dyà makumi àbìdì ne àsàtù, dyà makumi àbìdì ne ànaayi, dyà makumi àbìdì ne àtaanu, ne—ne dyà makumi àbìdì ne àsambòmbò. Matùkù àtaanu, ngeela meeji, ku Shreveport, mu Louisiane, ku Life Tabernacle. Aci cidi ne Mwanèètù Moore. Bàdi bâtwâ cyanga cyàbò cyà ngôlò. Dibènesha dyà mpenta dyàkapònâ mu Shreveport, mu Louisiane, kùkaadi bidimu makùmi àtaanu, mu dyà matùkù makumi àbìdì ne àbìdì à ngondo ewu. Kùkaadi bidimu makumi àtaanu, bïvvâ mukenji wa mpenta wà kumpàla tuyishìibwe. Ne kuponayè, Nyumâ Mwîmpè kuponayè, mu Louisiane. E kupetabo civùlukilu ku cyôcì aci, nènku eci ncyanga cyà ngôlò. Nènku ndi ne cyà kwakula pa cyanga eci, malòdòlò àtaanu, ne Mwanèètù Moore, ku Shreveport, mu Life Tabernacle.

<sup>33</sup> Wêwè ne balunda kampànda mwômò amu ne mu nyùngulukilu, mònâ's, baùdì muswè kufündila, anyì cintu kampànda, netwikale ne disànkà bwà kulwabo. Nànku bambile wêwè bwà masangisha àdì àlwâ aa.

<sup>34</sup> Nènku ku Life Tabernacle, piìkalà muntu kanà yônsò ewu ùkaadiku kacyà mutwilangane kuntwaku ne Mwanèètù Moore, yéyè's mmuntu mulenga wa dikèma. Ne kùdi musùmbà wà bantu balenga bàà dikèma, bantu bà kale bàà ku Sud abu. Kwena ànu mwà kubafudisha to. Ne pa nànku, Life Tabernacle, muntu kanà yônsò udi mu nyùngulwilu wa Shreveport udi mwà kukwambila ne mpenyì pâdiye ûsanganyiibwa. Shreveport udi ne bantu batwè ku binunu nkàmà yìbidì. Ne ùdi cimenga cilenga, muule tèntè ne nzùbu yà bilàla beenyi. Pa nànku . . .

<sup>35</sup> Nènku tabernacle ùdi tabernacle mwalàbâle, tabernacle mwalàbâle bikolè bitàmbe. Ùdi ne nzùbu yà kuulu, ne bisàsà, ne nzùbu minène yà mwinshì, ne pashìshe ne cikwàbò cisàsà kuulu. Nenku mùdi myaba yàbûngì menemene. Cidi ànu buludiludì menemene ne cibambalu cyà komine cyà cibwela bantu binunu bïtaanu aci. Mbyenze ànu—ànu bu kusambuluka mùsèèsù ewu, ukafika ku cibambalu cyà komine aci.

<sup>36</sup> Ne Rev. Jack T. Moore, anyì—anyì nànsha Life Tabernacle ku Shreveport, mu Louisiane. Cidi cibanga mu dyà makumi àbìdì ne àbìdì. Neciìkalè mu disààt... Kuumukila mu dìnaayi too ne ku dyàlumingu. Dìnaayi, dìtaanu, disambòmbò, dyàlumingu, matùkù ànaayi pamutù pâà àtaanu. Mfwilaayikù luse. Netwikale dyà matùkù makumi àbìdì ne àbìdì, dyà makumi àbìdì ne àsàtù, dyà makumii àbìdì ne ànaayi, ne dyà makumi àbìdì ne àtaanu. Ngeela meeji ne ke mùshindù ùdibi, à—à ngondo wa dikumi ne umwe.

<sup>37</sup> Nènku pashìshe, netùjandulè dîbà adi cìdì bwalu, citùdì benze bwà èkèleeyìyà ewu, bwà kujandula mùshindù ùdibi èkèleeyìyà mulubùlùke bwà kupeta wendè nzùbu. Biibaki bàdi batwàmbila bwà se bàdi mwà kwangata bantu bàbûngì ku mudimu awu, mu mùshindù wà ne mu matùkù matwè ku

dikumi bâdi mwà kumujikija twêtù bafwànyine kubwelamù, nwamònù's, ne lükàsà lwônsò. Mbindile ànu bwà cimenga kutwàci cyâlà. Nudi bamanyè's, ne bìkèngela twìkalè ne mwaba bunène bukùmbàne wà kwimanyikila màshinyì, ne ebi ne byabya bûngì bukùmbàne. Nènku, kaa, ekèlekèle, mmishìngà bûngì cyanàànà yà kwenza, bwà kutwàdija kwibaka ní ncinyì ní ncinyì cyônsò. Kâdi ndi muswè kulwa kùdì èkèleeziyà kumpàlà kwà mêmè kwalukila cyàkàbìdì mu budimi bwà bwambi.

<sup>38</sup> Mpindyewu ndi ne dibìikila dyà ku Tanganyika, ku Uganda, ne kwônsò aku. Joseph ùdi ne masangisha malongolola bwà kutwàdijawù mu ngondo wa Lwîshì.

<sup>39</sup> Kâdi makèèlèlè awu, pangààbwedi, kùvwa bânà bëètù kampànda, ne Mwanèètù wa bakàjì Thoms ne bakwàbò, bâfumina dyàmwàmwà dyà mbû, bâvvà balwè. Nènku mvwa... mvwa musangàne dibèji difûnda dintèkela ku ciibi cyànyì, anyì—anyì dibìikila dyà ku—ku nsangilu kampànda wa Afrikè du Sud. Pa nànku ndi mbâfûndila, bwà kumanya ànu menemene cìdì ne cyà kwenjiibwa. Pàmwâpa, pângìlkale kwine aku apu, ndi mwà kupweka mu Afrikè du Sud, pàmwâpa, mu citùpà cyà ndekeelu cyà ngondo wa Lwîshì ne wa Lwabanya nkàsu, mu cipòòlò cyà cikondo aci.

<sup>40</sup> Kâdi tudi ne ditèkemena dyà kwimanyika èkèleeziyà, bwà mêmè kubwejamù Bikondo byà Èkèleeziyà ebi, kumpàlà—kumpàlà kwà muvù wà mashìka kutwàdijawu, bu byôbì mwà kwenzeka. Mêmè nciyì mwenze nànku to, anyì pangìlkala ne cyà kufuma kwôkò aku, bu Mukalenge Yesù mwà kunenga.

<sup>41</sup> Mvwa munkaci mwà kutèèleja makèèlèlè awu, pâmvwà ngènda ngàngata, ngeela meeji ne cìwva ditùkù dìvvà didyànjidile makèèlèlè awu adi, pa mukàbà wà mêyì. Mêmè kudyàmbidila ne mvwa muwùtèèleje wàkula mwab'ewu mu dindà emu. Mwanèètù mutekète wa ku Sud kampànda ùvvwa ne... Mamwèndè ùvvwa mubwele mu disangisha. Ùvvwa ne cyûjà cyà kansérè kàà ku dibèèlè, ne ùvvwa mubwikila kùdì mundidimbì wà lufù. Ke Nyumà Mwîmpe, mu dìmwè dyà ku masangisha à matùkù mashààle aa ku Southern Pines kwaka, ngeela meeji ne nkôwòkò, anyì mwaba kampànda, kumwambilayè, wàmба bwà cyûjà cyà kansérè kendè aku, ne dîna dyèndè, ne kùvvwaye ûfumina. Kâdi kumwambila ne yêyè ùvvwa ne mwânà wa balùme mutwè cìmpìngà, ne ùvvwa ne cyà kupetakana ne njiwu, ne kulumbulula bwà dishipangana dyà ku mpùkàpùkà. Ne bintu byàbûngì byà mùshindù awu. Nènku mulùmyànà ewu...

<sup>42</sup> Byônsò byàkenzeka ànu mùshindù awu. Ne cyûjà cyèndè cyà kansérè aku, ànyì cyûja cyendè cyà kansérè aci, èyowà's wè, cyàkamuumuka. Ciinè aci cìdì ne, cyûja cyà kansérè aci's nkansérè, nudi bamanyè's. Ki dîbà adi ku—kumuumukaku. Nènku nsongààlùmè awu wàkalumbulula bwà dishipa

dyà muntu ku mpùkàpùkà, ne maalu wônsò ànu mùvvwà Nyumà Mwîmpe mwâmbe. Ne wàkalombodiìbwâ kùdì Kilistò, cyàkàbìdì. Ke kucikwàtayè pa mukàbà wà mèyi, ne mêmè—mêmè kucyùmvwa cyàkula. Nuvwakù basànke bwà ngaakwìlù mukesè, wà kale wà cyena Sud awu anyì? [Disangisha dìdi dyàmba ne: “Amen.”—Muf.] Yéyè ne: “Lwà kwinshì eku mu Caroline wa ku Nord,” mwàkambaye. Kaa, ndi munange ànu aci, bantu bàà kale bàà ku Sud abu. Nènku ùvwa ne... Ke Mukalenge kutùngunukayè ne kumubènèsha. Yéyè ne: “Ndi mumanyè ne udi wamba ne kwêna uyiisha dilongesha to, Mwanèètù Branham; ànu ku disangisha dyèbè nkààyaakù.” Yéyè ne: “Twêtù tudi citùpà cyà disangisha dyèbè.” Pa nànku aci cìvwa cilenga kudiye, bwà kwamba nànku.

<sup>43</sup> Kàdì mpindyewu kùdì cimfwànyi kampànda, ngeela meeji, pàmwàpa, cidi ku cibàsà cyà mamanyisha mu dìndà emu. Cyôci kaciyikù to, Billy neàcítèèkeku. Misangu yàbûngì bâvwa bâmbé, pâncìvwà mbangilakù kwakula, bâvwa bâmba ne: “Udi ànu ufwànyikija cyanàànà, Mwanèètù Branham, bwà ne wêwè udi mumònè Bukénkè abu, Bukénkè abu.” Pàmwàpa, mbikolè bwà...

<sup>44</sup> Nkufwànyìne kwikala kushààle bàmwè kaaba aka, beena kale bâdì bavùlùke, kumpàla kwà fôtô yààCì kwikalayiku mikwàciibwe. Kùdiku muntu mwab'ewu muvùlùke pâmvwà ncyàmba, kale menemene anyì? Tàngilààyi's. Byanza bitwè ànu ku bïnaayi ànyì bïtaanu cyanàànà. Mwanèètù wa bakàjì Spencer ewu, ne Mwanèètù wa balùme ne Mwanèètù wa bakàjì Slaughter, ne—ne mwanèètù wa balùme *ewu*, ne mwanèètù wa balùme udi lwà kwâka *wàwa*. Bâdì ànu beena kale bâtaanu ànyì bàsambòmbò bâdì bashààle.

<sup>45</sup> Èè, mpindyewu, paanyimà pàà cikondo kampànda, dîsù dyà cyamù cyà fôtô kukwàtadì fôtô awu. Pa nànku kuyayè ku Washington, DC e kupìcìlayè ku bakenkeci, ne kwalukilayè ne: “Ki mmutentàmàngane anyì cintu kampànda to.” Kwambayè ne: “Bukénkè mbutuute mu lumwènù.” Ki George J. Lacy awu. Nudi ne dînà dyèndè difundapù. Nwamònú anyì?

<sup>46</sup> Èè, nènku, misangu yàbûngì nutu nungumvwa, ntàngila ngàmba ne: “Nkwâkù kùdì mundìdîmbì mufiìke pamutù pàà muntu *ewu*. Mmundidîmbì wà lufù.” Mbanganyì bâkaadì bangûmvwe ngàmba nànku? Misangu yàbûngì, nwamònú's, misangu yàbûngì. Èè, mbyenzèke ne cyamù cyà fôtô cyàkakwàta cyôci aci. Nènku tudi naaci kaaba aka.

<sup>47</sup> Inâbànzà uvwa mulwè kwambila mwanèètù wa bakàjì kampànda, mu disangisha mu—mu Caroline, mutùvvwà benze masangisha malenga à njàjàmà ku Southern Pines. Nènku kwôkò aku, inâbànzà awu ûvwa ùpùnga ne lufù ne kansérè ku mabèèlè wônsò àbìdì. Kàdì bangàngàbukà bâvwa bamwele làà bwà kudifwìlayè. Ke inâbànzà awu kwinamayè è kumukwàtayè

fòtô, ànu pâmvwà mmwambile ne yéyè ùvwa nganyì, ne kùvvwàye ûfumìna. Ki mêmè kwamba ne: “Nkwékù kudi mundidimbì mufiike pamutù pèebè. Udi mubwikidija kudi mundidimbì wà lufù.” Ke inábànzà awu kubàkula fòtô wà cyôcì eci. Nènku ki cyôcì eci pa dîsù dyà cyamù cyà fòtô, cibàkùle mundidimbì wà lufù.

<sup>48</sup> Ní nuvvwàku bônsò bamònè *Méyi Matùma Dikumi*, ne bamònè mwanjèlò wa lufù, mwà kàsemenaye, mu mundidimbì mufiike awu, ùvvwà ùmwèka wà mifitù, udi ùsanganyiibwa mu fòtô ewu. Nènku ndi ngeela meeji ne cìdi ku cibàsà cyà mamanyisha mpindyewu. Cyôcì kaciykù to, Billy ùdi mwà kwikalà munteèlèje, mònà's, àcítèèke ku cibàsà cyà mamanyisha. Nènku cìdi ne muketa munkacì mwà kufunkuna mwinè muntu awu. Ne mwinè muntu awu, mundidimbì kuumukawù pa mukàjì awu, ne kwondopiibwayè mu mùshindù wà cishimà. Kàdi ncyêenze ànu bu cijìku, mwîshì mufiike mungwile mwênenze cijìku pa inábànzà awu, mulembèlè pa kansérè aka mùshindù awu,uumukila lwà eku. Mu bushùwà bwà bwalu, ke kùdì mundidimbì wà lufù ùpòngolodiibwa mu yéyè, kàbidi, ùumukila ku kansérè aka.

<sup>49</sup> Èè, nànsha wêwè muteete bwà kwambila bantu Bulelèlà mùshindù kaayì, nekwìkale ànu muntu kampànda wélà mpata ne Kî m'Bulelèlà to. Nènku wêwè ànu mwambè misangu yônsò Bulelèlà, dîbà adi udi mumanyè ne udi—udi mubingè.

<sup>50</sup> Ndi ne mulunda wànyì udi mwena citùpà cyà buloba cìdì ne ferme yà nyama, lwà ku Wesètè kwàka. Nànku—nànku beena mudimu wà bukùbi bàwwa bafutè ndola mitwè ku binunu binaayi bwà màshinyì à cikònga-néjè, bwà kubadika bisùmbù byà mbudi yivwà mishààle mu cibandabanda cyà Troublesome Valley. Mukalenga Jeverez uvwa usòmba mwab'ewu mu èkèleeyìyà emu, ngaakamulombola kùdì Kilistò, ùvwa mwena bupidyà wètù wa menemene ewu. Ne nukàvwakù bûmvwe ndonda bwalu bwà mutùvwa tunyemesha tûbalù pàmwè. Kàdi kàvwa witabuuja cîngà cintu to pa kuumusha dilongesha dyà Darwin. “Ne Mwânà wa mu dibòko awu, mulela virgo, cîvwa cintu cyà macimbu.” Kàdi twakaasa citùudilu dildòlò adi ànu pa mwaba menemene wàkiiitabilàye Kilistò awu.

<sup>51</sup> Ke nànku dîbà adi muntu ewu kubàmbìlayè. Yéyè kwamba ne: “Mpindyewu, kanwèna ne cyà kusùmba màshinyì awu to, màshinyì à cikònga-néjè awu.” Wàmба ne: “Nennwambile menemene bûngì bwà mbudi yìdì kuntu kwàka.” Yéyè ne: “Yìdikù dikumi ne citèèmà.” Kwambayè ne: “Yivwa makumi àbidi-... Yivwa makumi àbidi ne umwe, ki mêmè kushebeya yìbìdì yà ku yôyì.” Nènku ùvwa wàkula ne mulami wa lupangu lwà nyama. Udi mwenzejìlbwe bwà kushebeya ànu umwèpelè. Ke kwambàye ne: “Yivwa makumi àbidi ne umwe, mêmè è kushebeya yìbìdì yà ku yôyì. Nkushààle dikumi ne citèèmà.”

Ki yêyè ne: “Èyowà’s, Jeff, ndi mumanyè ne nudi bashebèye yìbìdì mijimà.”

Kwambayè ne: “Èyowà.”

<sup>52</sup> Èè, kwangatabò mاشینی à cikònga-nêjè, kubàndàbo kuntwaku, kuvwa mitù dikumi ne citèémà yà mbudi. Ki yêyè ne: “Billy, ambila wêwè ànu muntu bulelèlè; kààkubwitabuujakù to.”

<sup>53</sup> Pa nànku ki mùdìbi ànu nànku. Udi mwà kwambila bantu Bulelèlè, kàdì nànsha nànku bàdi... Kùdi dyumvwa dibì dyàbûngì ne—ne mafi àbûngì be mu maalu bifikisha bantu too ne ku dibènga kwitabuuja ne udi ubàmbila Bulelèlè pèèbè munkaci mwà kubàmbila Bulelèlè. Nudi numònà anyì?

<sup>54</sup> Kàdi tudi ne kusàkidila kwàbûngì bwà ne tudi ne Taatù wa mu Dyulu Udi ushìndika Bulelèlè ne dishìndika. Mbulelèlè. Pa nànku bu edi mwà kwikalaku nànsha ditùkù dyànyì dyà ndekeelu pa buloba, kùdì... nànsha bukèbikebi bwà maalu à mamanya ne bishindiki mbishindike ne ndi munwamble Bulelèlè pa bintu ebi. Ncyà bushùwà. M’Bulelèlè. Pa nànku pàmwàpà necììkalé ku mbootdì wa mamanyisha. Billy, udi mu cibambalu amu anyì? Udi naaci mu cyanza amu anyì, fôtô awu? Nànku wêwè nendè, èè, patuka nendè pambèlu apa, dìbà adi udi mwà kumukudika kuulu eku, bàdi mwà kumumònà pàmwàpà. Èè, ncyèna mumanye to. Nkufwànyìne kwikalala bukènkè ku—ku mbootdì aku.

<sup>55</sup> Kàdi ki fôtô ewu—ki fôtô nyêyè ewu ànu mwab’ewu. Ngeela meeji ne kanwêna mwà kucimònà to. Kàdi apa mene nudi mwà kumònà mundidimbì wa lufù wà bu cijiku awu kumutù kwà mutù wà mukàjì awu. Nènku dìyì dìdì dicishindikije ndyôdi edi, kaaba kàvwà inábànzà awu mukwàtè fôto, bwà kumònà ní cìvwà cimwèneka menemene. Kàdi’s ki cyôcì eci, lwà—lwà mwaba awu. Mmundidimbì mwenze cijiku wà lufù.

<sup>56</sup> Udi mumònè mukàjì ewu, ànu udi lwà mwaba ewu anyì? Udi mucimònè, ngeela meeji, Mwanèètù Neville, kî mmwômò anyì? [Mwanèètù Neville ùdi wàmба ne: “Èyowà.”—Muf.] Uh-huh.

<sup>57</sup> Pa nànku, Billy neàcìtèèke pàmwàpà ku cibàsà cyà mamanyisha, bu wêwè mwà kuswà, Billy. Lwâkù, úcyangàte, unyunguluke naaci kumpàla kàdi ùcìtèèke ku cibàsa, bwà muntu yônsò wàcimònà mu dipàtuka. Yêyè anyì Doc, ewu anyì ewu. Mpindyewu mvwà ndyàmbidila ne, pàmwàpà, cidi mwà kuleeja pa bütooke menemene bwà nwamònà mwà kucimònà, kàdi mbitàmbe kubwicidila bikolè bwà fôtô wa mùshindù awu. Kàdi neàmupatule pambèlu pààpa, bwà nwamònà mwà kumumònà, pàdìbò bënda bàpatuka apu.

Mpindyewu, nwavùlukaayi mamanyisha ônsò.

<sup>58</sup> Nènku mpindyewu, mu dìndà emu, mvwa ngeela meeji ne pàmwàpà ne tuvwa mwà kwakulaku ndambù pa cintu

kampànda bwà kukolesha èkèleeziyà, cintu kampànda cìdì mwà kutàmba kunupèchèsha . . .

<sup>59</sup> [Mwanèètù Doc Branham ùdi wàmba ne: “Udi dijinga ne mwêndù wàwa anyì?”—Muf.] Wambà cinyi? [“Udi dijinga ne mwêndù awupù anyì?”] Èyowà, Doc, bu wêwè mwà kuswa. Mbifwànyìne kwikalà bîmpè.

<sup>60</sup> Ndi muswè kukwàta mudimu ne ewu nùnku. Mvwa ne . . . Yimwè yà ku yoyì kayivwa ne eci cilamikakù to, bwà lumingu lushààle elu, nànku ki twêtù kwela meeji ne pangàpa udi mwà kuteemakù bîmpè ndambù leelù ewu. Mvwa njinga kwakula bwà cyôcì eci, bwalu cìvwa cipetangana ne—ne cilòtà cìvvà mwanèètù wa bakàjì mulòôte.

<sup>61</sup> Ndi ndìkonka Mwanèètù wa bakàjì Shepherd ní ùdi mwà kwikalà mu èkèleeziyà mu dindà emu. Mvwa mutwilàngane nendè dilòòlò adi. Nènku musangu wà kumpàla wûmvwà mumònè mukàjì awu, mu bushùwà bwà bwalu, ncìvwa nànsha mumanyè ne yéyè ûvwa nganyì to. Ùdipu anyì? Ngeela meeji ne kénàpu to. Èyowà. Mbifwànyìne kukutàcisha, ncifwànyìne kwikalà cintu cyà kaciyì mu cyôcì, bu mêmè mwà kutèèla cilòòta aci anyi, Mwanèètù wa bakàjì Shepherd anyì? Kí mbifwànyìne kukutàcisha to, mmwômò anyì? Èyo. Mmwômò.

Nènku kumpàla kwà twêtù kulenga cyôcì aci, twinyaayi kàbìdì mitù yètù mpindyewu.

<sup>62</sup> Taatù wa mu Dyulu wa ngâsà, tudi tuKwalujila butùmbi bwà bwímpe Bwèbè ne luse. Nènku mpindyewu, tùpòlesheku, Mukalenge, bwà twamònakù mwà kulonga Dìyì dyà Nzambi udi ne mwoyi, bu mùdìdi dìlwa kutùdì ku cikèènà-kumònà ne dishìndìkùibwe kùdì Nyumà Mwîmpe, dijaadìkùibwe kùdì Bible. Pa nànku tudi tulòmba bwà Wêwè kutùpèèsha dyumvwa, bwà twamònà mwà kumanya cyà kwenza mu matùkù à ndekeelu aa patùdì tumònà makolè à bubì ènda àtùnyunguluka mpindyewu. Mvità, mvità yà ndekeelu yìdi ànu pabwîpì ne kulwìbwà. Tùkwàcisheku, Mukalenge. Bu balwanganyi balelèlè bàà mvità, bàà dikàndà, swàku twìkale beeble ngabu wa Diitabuuja muulu, biikàle ne Dìyì dyà Nzambi, Mwele wa mvità, ne twenda tuyà batàngile kumpàla. Mu Dînà dyà Yesù. Amen.

<sup>63</sup> Mpindyewu, twelangana meeji bwà kutàngila kumpàla, mvità, bu mùdì—beeble mulongo bwà mvità, badìlongolole bwà kükùtula mvità, mvità mi—milelèlè, bwà kulwangana mvità yà diitabuuja.

<sup>64</sup> Mwanèètù wa bakàjì Shepherd ewu, ne Mwanèètù wa balùme Shepherd, bâdi balunda bëètù bananga balenga, ne bâtù bâlwa mu tabernacle emu. Kàbìdì mbânà bàà Nzambi bàà mushinga mukolè. Nènku—nènku Mwanèètù wa bakàjì Shepherd ewu, pamvwà ngàngata mikàndà yànyì mimfündila, yà bwena yìdi Billy mwà kwandamuna, pàdì muntu kampànda wàmba ànu ne: “Ntumineku tulùlù twà disambila twàbûngì.”

Nènku mêmè kutùsambidila. Yéyé ùtu ànu ùbàndamuna. Kàdi wôwò mwikalé mukàndà wà muntu nkààyà, ndi ne cyà kuwàndamuna mêmè nkààyanyì, nudi numóna's. Ki mêmè kwangata mikàndà yànyì yà sungasunga, nènku mvwa nya naayi kumbèlu. Nènku mvwa mbalamù, bàmba ne: "Mufùmine kùdì Mwanèetu wa bakàjì Shepherd." Civwa ncilòotà cìvwàye mulòote, cyà—cyà kùkaadi ndambù wa ngondo. Kàdi kàvvakù mwà kucyumvwa bîmpè nànsha too ne mu maadyàlumingu àbìdì anyì àsàtù mashàale aa, pângààkalongesha pa—pa *Bikondo Mwandamutekètè byà Èkèleeziyà* ebi ne—ne—ne mamuma mwandamutekète, Peetèlò Mwibidì, mùdìbi bilòmba, Peetèlò wa 1ne: "Kusàkidila ku diitabuuja dyètù." Nwamònou anyi?

<sup>65</sup> Dyàmbedi, pa cishimikidi, n'Diitabuuja. Ciibidì, sàkidila ku diitabuuja dyèbè, bukolè; ku bukolè bwèbè, dimanya; ku dimanya, didikanda; ku didikanda, lutùùlù; ku lutùùlù, difwàna dyà Nzambì; ne ku difwàna dyà Nzambì, dinanga dyà bwânà bwètù, dinangangana dyà bwânà bwètù; ne pashìishe dinanga, diikàle dibwe dyà mùsongà. Bintu abi mwandamutekète. Bikondo mwandamutekète byà èkèleeziyà, nwamònou's, ne mìtootò mwandamutekète yà bikondo byà èkèleeziyà, ne byônsò abi bikwàtakaja pàmwè kùdì nshàmenda wa Nyumà Mwímpè.

<sup>66</sup> Mpindyewu, ki cìdì cìkèngelà bwà kulwa musadidi wa Kilistò ncyôcì aci. Kilistò ùdì wibàkila Èkèleeziyà Wendè mu bikondo mwandamutekète byà èkèleeziyà; Mukàj'Èndè musèla, Mupersona, muntu mukàjì, Èkèleeziyà. Bikondo mwandamutekète byà èkèleeziyà mbidì byènza Mukàjì-musèla. Bàmwè bâà mu cikondo *eci*, ne bàmwè bâà mu cikondo *aci*, ne bàmwè bâà mu cikondo *cyàcya*, ne bônsò pàmwè, ne wènda ùmusonga bu cipaapu cyà musàkà.

<sup>67</sup> Bu Enòka, wàkibaka bipaapu byà musàkà awu, mutùdì twitabuuja. Kàdi kacya dibwe dyà mùsongà kadìvvwa ditèèkiibwe pa yôyì to, bwalu dibwe dyà mùsongà dìvvwa dimansha. Nènku tudi bangàte mpindyewu, kaciyì bu Dilongesha to, kàdi bwà kumvwa, ànu bwà èkèleeziyà ewu. Bwà sè byôbì ebi...

<sup>68</sup> Nzambì ùtu ùDìvvija mupwàngànè mu ìsàtù. Ùdi ùDìvvija mupwàngànè mu "Taatù, Mwânà, Nyumà Mwímpè," midimu yisàtù yà Nzambì umwépelè. Ùdi ùDìvvija mupwàngànè mu "dibingishiibwa, dijidiibwa, dibàtiiza dyà Nyumà Mwímpè," kulwa mupwàngànè, byenzedi byà ngâsà. Ùdi ùDìvvija mupwàngànè mu kulwa kùsàtù: musangu wà kumpàla, bwà kupikula Mukàj'Èndè musèla; musangu mwibidì, bwà kwakidila Mukàj'Èndè musèla; musangu mwisâtù, mu Bukalenge bwà bidimu cinunu ne Mukàj'Èndè musèla. Ne byônsò mbipwàngànè mu ìsàtù. Nènku mwandamutekète nnombà wa dikuukwila wa Nzambì. Nzambì ùdi ùkukudibwa mu mwandamutekète, mukùmbàne, mpindyewu mupwàngànè ne mukùmbàne.

<sup>69</sup> Kàdi cintu cyà pabwàcì cìvwa ne, kacìyì bwà kutwala eci to, kàdi ànu bwà kunuleeja, kashà kàà ndekèèlu kâmvwà mwâsé kâvwa ne matoba àtaanu ku luseke lùmwè ne àsàtù ku lukwàbò; nwamònù's, ngâsà ne bupwàngànè.

<sup>70</sup> Mpindyewu tàngilààyi eci, Kilistò awu. Nzambì mmufùnde Bibles isàtù. Bible wa kumpàla ùvwa mu dyulu, übùkidiibwa ne cidiminanzaji. Mpindyewu, wêwè kùyì mumanyè Mukàndà wa Yobò to, ùcipwè ànu mwoyi cyanàànà, bwalu, Yobò ngudi ucyùmvija, mùshindù wàkatàngilaye muulu ne kwinyika bintu abi ménâ mu dyulu.

<sup>71</sup> Nènku mònayi, mu cidiminanzaji, cyàkabanga ne cinyi? Cintu cyà kumpàla cìdì mu cidiminanzaji m'virgo. Cintu cyà ndekeelu mu cidiminanzaji cìdì n'Leo ntambwe. Dilwa dyà kumpàla dyà Kilistò, kupicila ku virgo. Dilwa diibidì, Leo ntambwe, Ntambwe wa cisàmbà cyà Yudà.

<sup>72</sup> Pashiishe Enòkà wàkajikija mu ditùkù dyèndè, anyì mu ditùkù adi, cipaapu cyà musàkà aci. Nènku cìvwa mwà... Mu bushùwà bwà bwalu, katwèna ne dîbà dyà kucishìndamijila pa bitùdì twamba to ne kuleeja ne cipaapu cyà musàkà aci cidi cibànda kupicila mu bibambalu ne bikwàbò. Cìdi cyàkula buludì too ne ku cikondo cyà ndekeelu mpindyewu. Bâdi mu cibambalu cyà mfùmù mpindyewu, ku cipiminu. Kàdi dibwe dyà mùsongà kacya kadivwa dyanji kutèèkibwa pa cipaapu cyà musàkà nànsha. Ne aci cidi cijaalama bipwàngànè, pa lwibaku, anyì—anyì pa bimanu. Mu mùshindù wà ne, nànsha... kapese kakesè kàà kapaaya... Bôbò kí mbamayè mùvvwàbo baciibàke nànsha, kabèëna bacyùmvwa to, kapaaya kakàvvwakù mwà kubwela munkaci mwà nseke ya mabwe mùvvwà bitoci ne cyà kwikalà amu to. Kàdi kacyèna ne bitoci munda mwàcì amu to. Cidi ànu cipwàngjà, citèèka pàmwè.

<sup>73</sup> Ke cìdiku ncycòcì aci dîbà didì Kilistò ne Èkèleeyìà bashààla umwe. Kakwèna bitocì pankaci apu to. Kakwèna cintu nànsha cìmwè pankaci to; ànu Nzambì ne muntu awu. Nzambì, Kilistò, ne muntu awu.

<sup>74</sup> Mpindyewu, kàdi, dibwe dyà mùsongà, kacya kabàtukù banjì kudipeta to. Nudi bamayè dibwe dyà Scone dìvwàbò naadi mu Angleterre, bwà kubanjija naadi bamfùmù adi, anyì bwà—bwà kubàsa cifulu cyà butùmbi, ne bikwàbò. Kàdi dibwe dyà mùsongà...

<sup>75</sup> Tàngilààyi mu kabèji kàà ndola wa cyena Amèrikè. Nenumòne ní... pa kabèji kàà ndola wa cyena Amèrikè aku, ku lùmwè luseke, luseké lwà dyàbakàjì, kùdì citampì cyà Amèrikè, mukankù mwikale ne... dyà mafùmà mu cyanza cyèndè, ku luseke lwibidì, eci ncibùkidiibwe ne “citampì cyà États-Unis.” Kàdi ku luseke lùdì lulonda kùdì cipaapu cyà musàkà ne, kumutù kwàcì aku, dísù dinène, ne mwinshi emu mbâmbemù ne: “Citampì cinène.” Bwà cinyì ncifwànyinè kwikalà “Citampì

cinène” mu ditunga edi, nànsha mene kumutù kwà cítampì cyà ditungà dyètù? Nwamònú anyì?

<sup>76</sup> Nànsha bàmba ne cyûtù mwenze ncinyi, Nzambì ùdi wènza ne cyàkule ànu byà mwomùmwè. Nwamònú ayì? Udi wènza ne ngènzàmpèkààtù àkule bwàci. Ùdi wènza bwà ditunga dyàkule bwàci. Bintu byônsò bìdi ne cyà kwakula Bwèndè. Nànsha wéwè—wéwè muswe ku Cìitabuuja anyì to, Cidi ànu mwaba awu.

<sup>77</sup> Mpindyewu, mònayi, kùdi dísù mu cyôcì aci, dísù dyà Nzambì. Bwalu mùsongà kawùvwa mutèekììbwepù, Cítampì Cinène aci, bwalu Cìvwa cibèngììbwe, cìvwa Mwâna wa Nzambì; Dibwe dyà mu ditumba dyà nzùbu, Cítampì Cinène cyà cipaapu cyà musàkà, ne byônsò ebi. Mpindyewu—mpindyewu, ndi... Ncyêna muswè...

<sup>78</sup> Mîngà misangu bâdi bâkwàta bintu ebi pa mikàbà yà mîyì, ne bìdi biya munkaci mwà bânà bëètù mu maèkèleeziyà, mu èkèleeziyà mikwàbò. Nènku pàdibo bènza nànku, dîbà adi bânà bëètù bâdi mîngà misangu bapeta mmwenenu mubì, wa ne ndi ngàmba cintu kampànda bwà bânà bëètù. Kàdi ncyêna ngàmba nànku nànsha. Mêmè... Bu nwènù ànu mwà kutèèleja cyanàànà ne kuumvwa, nwamònú's, ncyêna ngààkula bibì bwà mwâneètù nànsha umwe to. Bwalu, abi ki mbikùmbàne bwà bânà bëètù, kwakulabò bibì bwà umwe ne mukwèndè nànsha. Bìvvà bìkèngela kwakwilangana, kàdi kî nkawakula bibì bwà umwe ne mukwàbò.

<sup>79</sup> Kàdi pândì ngààkula misangu mikwàbò bwà bulongolodi kampànda, bu mùdì bwà ba-Presbytérien, ba-Méthodistes, anyì bikwàbò, bâdi bàmba ne: “Nwamònú's, yéyè ùdi ûcilwisha.” Mêmè ncyêna mbèngangana ne mwanèètù wa balùme udi muntwamu awu to, anyì mwanèètù wa bakàjì udi muntwamu awu to. Ndongolwelu udi utàpulula bwânà bwètù ke úndì ndwisha. Bânà bâà Nzambì bâdi famiye umwe, kàdi kî—kàdi kî mmisùmba mishìlàngane to.

<sup>80</sup> Nènku bàmwè bâà ku bôbò bâdi bàmba ne: “Mêmè ncyàkwikala naaci bwalu to, bwalu aci ncyà ba-Presbytériens. Kàdi mêmè ndi Méthodiste.” Nwamònú anyì? Mpindyewu, aci kî ncyôcì to. Nwamònú anyì? Ndongolwelu wa bulongolodi awu ngudi úkosolola bwânà bwètù abu. Nwamònú anyì?

<sup>81</sup> Mpindyewu, ànu bu mûmvwa mwâmbe, bu wéwè upweka ne musùlù mu ciibwâtù cyà kale cimweka cisalakane, ukeba kupìcila mu bisàbàsabâ, kàdi pàanyì mumanyè ne kabyàkukùmbâna to, èè, dîbà adi, ncyenà ngeela mbila mikolè, nkutàndisha wéwè. Ndi nteeta bwà kukupatula mu bwâtù abu. Nwamònú anyì? Bwalu, bwâtù mbwàkosoloka, nènku—nènku—nènku newùshaalè, musòmbe nkààyeebè, mu mâyì. Pa nànku—pa nànku kî—kî m'mwanèètù udi mu bwâtù to, kàdi ndi ngeela mwanèètù awu mbila bwà kumuleeja cìdì cyàmба kwenzeka.

<sup>82</sup> Èè, ndongolwelu yônsò eyi, yìdì bantu benze ku dimanya dyàbò yìdì ne cyà kutaayika. Kwàjikì. Bàdi ne cyà kulwa... Tudi ne cyà kufika ku bumwè, ku bwâna bwètù. Aci's ke cìvwà kàànyì kiipàcìlà kàà mwoyi bwà kuteeta kusangisha kàdi kî nkupandulula bulongolodi kampànda to, kàdi kubàfikisha ku dilekela mmwènenu yàbò, ne kwikalà bânà bààbò ne Mwena Kilistò yônsò mulediibwe cyàkàbìdì. Nudi numònà anyì? Ki cyôci, ki mmwènenu nyéyè awu. Ki mwaba ûndì mwimanyine awu, èè, mpindyewu, bu bânà bètù mwà kucimònà. Ndi...

<sup>83</sup> Bâàbûngì bàà ku bânà bètù, nànsha mene mu milongo yètù yà Èvànjeeliyò mu Kaabujimà, kabèêna biittabuuja ne ba-Baptistes ne ba-Méthodistes, ne ba-Lutheriens ne bakwàbò, bàdi ne mpungà to. Kàdi, mpindyewu, mbafwànyîne kwikalà babînge. Kàdi ncyèna nciitaba to. Ndi ngiittabuuja ne cikondo eci, cyà Cikondo cyà Luther, mu cikondo *eci* cìvwà cibiikidìibwe, ngeela meeji ne, Cikondo cyà Sààdì. Ne pashìishe Cikondo cyà Filàdèlèfiyà aci, bwà ba-Méthodistes. Ne pashìishe beena Mpenta, Cikondo cyà Laòdikiyà. Ndi ngeela meeji ne mbikondo abi. Ne Nzambi, mu cyônsò cyà ku bikondo abi, mwangâtè cisàmbà cisungula. Nènku mu cyôci aci, mùdi Ebèlù 11 wàmba, ne: "Bôbò abu twêtù katùyìku to kabèêna mwà kuvwijiibwa bapwàngànè to." Nwamònù anyì? Kàdi mpindyewu Èkèleeyìa mmufùmine ku cyôci *eci*, ùlwa mu banyààbanyà dîbà dyônsò, too ne mùdiCi cìkafika too ne mu cikondo cyà Mpenta.

<sup>84</sup> Mpindyewu, cidi cingambishisha eci, mbwà nwénù kupeta cingenyingenyi kampànda pa cidi mwanèètù wa bakàjì mulòôte aci. Ne cilòtâ cyèndè ncifwànàngànè menemene ne dilongesha dyànyì.

<sup>85</sup> Tàngilààyi mpindyewu mwab'ewu, mpindyewu, bintu byônsò ebi bivwà Peetèlò wa Kumpàla mvensà mwi6 ne wa 7 ùnwàmbila, kuumuk-...ku diitabuuja dyèbè, aci ke cyà kumpàla. Mpindyewu, ndi ngàmba ne kudi bantu bàdi bàmba mùdibo ne makolè aa kabàyì nànsha balediibwe cyàkàbìdì to. Nènku ndi ngeela meeji ne ndi mwambe dîyì dikolè ne mwambe ne: "Ncyêne ànu bu nyuunyi mufiike ùteeta kwasa masàlà à nyuunyi wa kàyibà mu yéyè, ne kudìvwija yéyè mwìnè nyuunyi wa kàyibà." Kêna mwà kucyènzakù to. Bikèngela kwikale masàlà à cifùkilu àpàtukila pa mubidi wèndè. Munda mwèndè amu ke mùdi ne cyà kupàtula masàlà awu.

<sup>86</sup> Nènku misangu yônsò, bâtu ànu bàmbanda misangu yônsò ne mêmè ntu nkoleshela bânà bètù bà bakàjì maalu, bwà diikala dyàbò dyà ne nsuki mibebula, ne bilaabu mu mpàla yàbò, ne bintu cyakaa. Bâtu bambandèbànde bwà dyuumishila bânà bètù bà bakàjì maalu. Kí-kí ne ndi naabò bwalu nànsha bùmwè to. Mêmè ncyêna ngàmба ne mukàjì kí mmùkàjì mwîmpè to, ne yéyè ùdi mulalakanyi kampànda wa mu mùsèsù anyì cintu kampànda to. Aci kí ncilunjì cyànyì nànsha. Kàdi, bwalu bùdi ne, pàdiye ùdilaba bintu bikwàtakaja byàbûngì kwîsù,

bìdi bìleeja ne kùdi bintu byâbûngì bikwàtakaja munda amu, nwamònou's, mwaba ùvvà ne cyà kwikala mûle ne Kilistò. Bwalu, pambèlu pàsòmbèla misang yônsò paleeja patòoke cìdì munda. "Ku mamuma ààbò nkunùdì nubàmanyina." Nudi numònà anyì? Nènku mwaba ùvvà Kilistò ne cyà kwikala ùsanganyiibwa, ne kucyùka bwà Nzambì, ne kucyùka bwà bintu bikwàbò pamutù pà bintu bikwàtakaja bûngì cyanàànà, nènku nudi bamanye's, bilàfinyì byà mâyì à matàmbà, ne lukebu lùdì kalùyì lwà buntu to, ne bintu byônsò byà mùshindù awu abi. Mêmè ncìtu ngiìtaba aci to, ne ncyéna ngiìtabuuja ne nànscha Bible mmuciìtabe to, ki bwà cinyì ntu muswè ànu kwikala citùdi aci.

<sup>87</sup> Mònayai, mpindyewu, mukàjì yéyè kàyì ne nzàdì yà ku minu to, ne yéyè muswè kudyàsa mikwàbò; yéyè kàyì ne ménù to, kàdi mwikale naayì dijinga; kàyì ne dibòko, ne mwikale naadì dijinga; kùyi ne nsukì to, kàdi naayì dijinga; pawùdì kùyi ne bintu ebi to, abi mbishiìlàngàne. Kàdi paùdì utùùla ménù èbè malenga menemene awu, bwalu ànu ne kaëna àkenka menemene mùvvwàbì bìkèngela wôwò kwikala to, dìbà adi udi mu bubì. Wêwè mwikale ne nsukì mikùnze kàdi ujinga yà mifilike, kàdi uya kayèla díkala bwà kushààlayì mifilike, ànu bwà nànkü; udi mwenzè bibì. Èyowà, ngeela meeji nànkü. Kàdi cintu cyà mushinga... Kakwènakù Mufundù bwà cyôcì aci to. Cikòla, bwà kubebula nsukì yènù, kùdi Mufundu bwà cyôcì aci, èyowà, tudi naayì bûngì cyanàànà, pa nànkü tudi baswè kwikala batwîshìibwe ne mmwômò, mpindyewu.

<sup>88</sup> Mpindyewu, mwanèètù wa bakàjì, mu cilòòtà, ùvva mulòòte ne yéyè... Èè, dyàmbèdi, ùvva mutàcishìibwe. "Bidi ne dikwàcisha kaayi dyà kuya kumpàla, ne kuteeta bwà kulwangana mu nsombèlu wetù, piìkala Nzambì ùtùlòmba bwà kupeta Nyumà Mwîmpè kàdi twétù katùyì Nendè to?" Mpindyewu, ncyéna ngeela meeji ne...

<sup>89</sup> Bàdi mwà kwikala bâkwàta eci pa mikàbà. Kàdi bôbò kabàyì bâkwàta to... Bôbò bâkwàta, yìdi mbwà èkèleeziyà nkààyendè. Nwamònou anyì? Mpindyewu, nènku kwôkò mwanèètù kampànda muswè kupeta yôyì eyi, ne nuumvwa dìyì dyànyì, mwanèètù, pa cyôcì eci, nwàvùlukaayi ne, ndi ndongesha ànu èkèleeziyà wanyì. Ikalaayi misang yônsò, kumpàla kwà disangisha dyènù, nukenketa mi—mikàbà yà mèyì eyi, ne nwènù kanùyì baswè bwà disangisha dyènù dìyìtèéljà, kanùlekedi disangisha dyènù dìyìtèèleja to. Kàdi ndi nteeta ànu kwambila kasùmbu aka kakesè kàdi mwaba ewu aka, kàdì—kàdì Mwanèètù Neville ne mêmè, ku Nyumà Mwîmpè, tuteeta bwà—bwà kudiìsha ne kulongesha.

<sup>90</sup> Mpindyewu, kùdi bìmwè byà ku bintu ebi binùdì bafwànyìne kubènga kuperanganapu nwôsha ne munu mwiku. Pa nànkü byôbì nànkü, ànu bu mûntù ngàamba bwà kudyà kwà nzòòlo mukànga ne: "Paùdì upeta mufùbà, kwèna wimansha nzòòlo nànscha. Udi wimansha mufùbà." Pa nànkü ikàlà wenza misang

yônsò ànu nànku. "Wêwè munkaci mwà kudyà mùkàtà mwela cérise, kàdi wêwè kubèla lutete, kwèna mwà kwimansha mùkàtà to. Udi wimansha wêwè ànu lutete." Pa nànku udi wenza cintu cîmwècîmwè aci mu kutèèleja Cyôci eci.

<sup>91</sup> Mpindyewu, ndi—ndi ngeela meeji ne—ne—cìdì cyenzeja cibwejâkâji cyâbûngì leelù ewu, pa bwalu bwà Nyumà Mwîmpè, kî mmulongèshìlbwe mu mùshindù mujaalàme to. Ndi ngîtabuuja ne dibàtiiza ndilongeshiibwe... ne kwamba ànu cyanâànà ne "dibàtiiza."

<sup>92</sup> Pashiishe biikale ànu bu kwamba ne "mâshinyì." Kàdi mpindyewu ndi ne ndambu wa baamekanyisheelè mu èkèleeyiyà ewu, ne mêmè ncyêna mumanyè kantu nànsha kàmwè pa bwalu abu to. Pa nànku mêmè mwênze cilêma, bânà bëètù, ndi... Vùlukààyi, ncyêna mekanyisheelè to. Kûdi ne cyà kwikala ma bobines, bougies, vices platinées, ma soupapes, ne bintu byônsò bìdi byènza mâshinyì abi.

<sup>93</sup> Nènku paùdì wakula bwà dibàtiiza dyà Nyumà Mwîmpè, kûdi byâbûngì bìdi byènda pàmwè ne Cyôci aci. Huh? Nwamònou anyì? Kûdi byâbûngì bìdi byènda pàmwè ne Cyôci aci. Nànku mônaayi cîndi ngeela meeji ne cìdì Nzambi ûshindika: Nyumà Mwîmpe ùdi mwaba ewu. Nwamònou anyì?

<sup>94</sup> Mpindyewu, Peetèlò wàkamba, dyàmbedi ne: "Diitabuuja." Mpindyewu tàngilààyi ne ntèmà yônsò mpindyewu. Netùlongèshè cyôci eci bwà tusunsa tukesè. Diitabuuja, mpindyewu, ki cyènù cyà kumpàla. Ne kusakidila ku diitabuuja dyèbè, bukolè; ku bukolè bwèbè, dimanya; ku dimanya dyèbè, didikànda; ku didikànda dyèbè, lutùlù; ku lutùlù lwèbè, difwàna dyà Nzambi; ku difwàna dyèbè dyà Nzambi, dinangangana dyà bwâna bwètù, dinangangana dyà bwâna bwètù; ne pashiishe dinanga. Ne muntu kanà yônsò ewu mmumanyè ne dinanga dìdi Nzambi. "Nzambi ùdi dinanga." Nwamònou anyì?

<sup>95</sup> Mpindyewu, ne dîbà adi, kuumukila ku eci, ne pashiishe kubweja eci mu bikondo mwandamutekète byà èkèleeyiyà. Nzambi ùdi munkaci mwà kwibaka, mu bikondo mwandamutekète byà èkèleeyiyà, Mukâjì-musèla bwà Kilistò; kupicila ku cyà beena Filàadelèfiyà, beena Twatilà, ne Peegàmò, ne beena Seemùnà, ne Efèsò. Cikondo cyà èkèleeyiyà, cìvwà Yesù mwâmbe ne: "Bu mu—bu Mubâki mwà kulwa mu cilù cyà kumpàla anyì mu cilù cyà mwandamutekète, bavirgo bônsò aba bàkabìïka." Bâvwa babiïkè. Kubiïkabò, bavirgo bàà mu Efèsò abo, Seemùnà, Peegàmò, Twatilà, Sààdì, Filàadelèfiyà ne Laòdikiyà. Nuvwa bamône aci anyì? Civwa cikondo cyà mwandamutekète, piine apu mpààkalwàYe ne kubìishayè bavirgo bàkùtakàne abu. Aci cìdi cibàfikisha ku dyalukila too ne kwinshi *eku*. Nwamònou anyì? Bwalu, mu cyôci eci, munda mwà bidimu, bikondo, Yéyè mmwibâke Mukâjì-musèla,

muledììbwé Mukàjì-musèla, mulelè Mukàjì-musèla pa buloba bwà Kilstò. Ne müşhindù ùmwèùmwè wàkalelè Yé Mukàjì-musèla awu, ngwàkalelè Yé bantu nkààyà.

<sup>96</sup> Mpindyewu ûndì ngènda ntèèka bishimikidi ebi, mbwà nwénù kumònà pìikala cilòòtà cyà mwanèètù wa bakàjì ewu munkaci mwà kwambiibwa.

<sup>97</sup> Mpindyewu, bintu ebi mwaba ewu kakùyì mpatà to bìdi ne cyà kwikala mu mwena Kilistò kumpàlè kwà Nyumà Mwîmpè kubàtwa Yé cítampì, kumpàla kwà yêyè ewu kupwekayè pa yêyè ne kumuuvwija cintu mu kaabujima.

<sup>98</sup> Mpindyewu, cilòòtà cyà mwanèètù wa bakàjì mpindyewu. Ùvwa ùditacisha bwà kumanya ne ùvwa ne Nyumà Mwîmpè anyì to, pàvwàye mudyadija mu nkwasà wa fôteyì mùvvà bâyendè munkaci mwà kubala cibéjibeji. Ne ùdi ne bâna bakesè, bu mûndì naabu emu, bôbô bàsombèla ànu benza mitooyi ne bikwàbò. Ki kaayì, mwómò emu, wákaya mu tulù bu twà tusunsa tutwè bu ku dikumi, anyì dikumi ne tùtaanu. Ki kulòòtayè cilòòtà. Kàdi kàvwa ànu mwà kucyùmvwa to, anyì kucibùngàkaja cyônsò, kacya kûkaadi cidimu cijimà, bu nànkù awu, too ne paàkayishiibwa Mukenji ewu. Pashiìshe, pâmvwà munkaci mwà kuWuyisha, ke kumuuvwilaci cyônsò. Nènku ùvwa mulòòta ne ùvwa munkaci mwà kusambilà.

<sup>99</sup> Ùvwa wènda wèndakana panshi, dyàmbedi, kumpàla kwà kulòòtayè, ùvwa ùnyükula byanza, wèla meeji ne: "Mukalenge, ndi ne Nyumà Mwîmpè anyì? Udikù mwà kunjaadikila. Bâmwè bâdi bàmba ne: 'Bwalu mvwa—mvwa mwelè mbilà.' Anyì bakwàbò mbâmbé ne: 'Bwalu ndi mwàkùle mu myakulu.' Kàdi twêtù tudi twitabuuja byônsò abi. Kàdi ndi Nendè bulelèlè menemene anyì?"

<sup>100</sup> Ndi ngiitabuuja bintu byônsò abi, makolè awu, dyakula dyà mu myakulu, ne dyela dyà mbila, ne dileeja dyà patòòke dyà müşhindù yônsò. Mêmè ndi ngiitabuuja kantu ne kantu kónsò kàà cyôcì aci. Kàdi cyôcì ciikàlekù kakùyì *Eci* to, kùdi cintu cipampàlámùke. Nwamònù anyì? Mpindyewu, nwamònù's, nudi numònà's, nudi—nudi ne cizubu. Mônaayi.

<sup>101</sup> Ne yêyè mukàjì awu ùvwa ùditacisha bwà bwalu abu, pa nànkù ke yêyè kulààlayè mucyàmàkàne mu nkwasà wa fôteyì mùvvà bâyendè munkaci mwà kubala, e kudìtwayè mu tulù.

<sup>102</sup> Ke kulòòtayè mùvvàye ùsanganyiibwa pa mukùnà kampànda. Kàdi mu wôwò mukùnà amu, cìvwà citàmbe bwîmpè...ncyèna ne dibèji adi kumpàla kwànyì eku to, kàdi ndi ngeela meeji ne cidi müşhindù ewu. Wàkalôòta ne ùvwa mumònè mu—mushètà wà dibwe, bu—bu mu—musàkà, musòmbe pa lusongo lwà mukùnà ewu. Ne bâyendè ùvwa ànu paanyimà pèndè apu. Ki yêyè kumònà muntu munène wa katumbi mwimàne mwaba awu, muvvàle bilàmbà byà mudimu, mabòkò à mutèèlu mabùnya, mwikale üpòngolola

mâyi à kazeeze menemene à kacya wàmòna, ùàpongolwela mu mwinè mushètà ewu, mushètà wà dibwe ewu ùvvwa musòmbe pa lusongo lwà mukùnà. Kàdi mushètà wà dibwe ewu kawùvwa mufwànyìne kulama mâyi to. Nènku mâyi àvvwa àpongolokamu, àsàba ùmusha makooya wònsò ne bisòta byònsò, ne bikwàbò bìvvàmu, àbisabisha byònsò bìpwekela lwà kwinshì kwà mukùnà awu. È kupòngòlokelawù ku makàsà èndè, kàdi yéyè mukàjì awu ùvvwa mwimane ànu mu bintàkanyi abi, cikòlà kabyàkamulamata to.

<sup>103</sup> Ke—ke kukonkayè ne bwà cinyì mushètà kî mmuàlame, ke muntu mulùme awu kwamba ne: “Aci kî mmâyi to. Aci n’Nyumà Mwímpè, ne,” yéyè kwamba ne, “cintu nànsha cìmwè kacyàkuMùlamakù to.” Ki yéyè ne, pashìlshe kwalukilayè e kwangata mbekeci mukwàbò munène, ne ùvvwa mûle tèntè ne bwíci, è kupòngòlweløyemù bwíci, wàmba ne: “Mpindyewu neàlamè eci.” Nènku kweløyè meeji ne mushètà ewu, ùvvà mushètà wà dibwe ewu, ùvvwa ne cyà kutaayika, ne kumwangalaja bwíci, kàdi kawàkataayika to. Wàkalamakana pàmwè e kushààlawù mubùlamè.

<sup>104</sup> Yéyè mukàjì awu kukùdimukaye ne kutùùlukaye ku mukùnà aku. Pàvvwàye wènda ùtùùluka ku mukùnà aku, yéyè e kwimana kwinshì kwà mukùnà e kutàngilayè paanyimà. Kumònayè misùlù yítaanu yà mâyi aa, makezùke, à lumwènu, kaàyi ne bukooyà bwà bintu bìvvawu mapìcile, mìkale ànu makezùke ne matòdke, àlwa ne lubilu. Ke pashìlshe kutekeshawù. Pashìlshe, kwenzawù bu makàme, nènku ùvvwa munkaci mwà kudìkonka ní ùvvwa mufwànyìne kufika kwinshì kwà mukùnà, tusùlù tùtaanu atu. Ki kutàbulukayè.

<sup>105</sup> Ngeela meeji ne aci cidi pabwípi menemene ne kwikalà mu cyôci, kî mmwòmò anyì, Mwanèètù wa bakàjì Shepherd?

<sup>106</sup> Mpindyewu, ndi mwênzè ànu ngàngata mukàndà mumfundiila awu ne ngùbuulula, kumpàla kwà mêmè kuwùbala, mêmè e kumònà cilòtà cyà mwanèètù wa bakàjì aci.

<sup>107</sup> Ke mùshindù ùtù bilòtà byùmvijiibwa nànku. Mpindyewu, bààbùngì bàà kunùdì bakaadi balwè kündì ne bilòtà, ne—ne bàngambilà bintu bìtàngila bilòtà. Ntu ngàmba ne: “Indìlà katanci. Kwéna mucilonde cyònsò to.” Nwamònù anyì? Ne mêmè kwalukila paanyimà e kucìbakula cyònsò. Dìbà adi pawikalà kùyi mwà kawwula cilòtà cyúdi mulòtà, mmunyì mûdì mwà kumanya ne dyumvwija ndilelèlè anyì ki ndilelèlè? Nwamònù anyì? Bikèngela bwà, bikèngela ûmonè cilòtà aci. Cikèènà-kumònà cidi ne cyà kuleeja cilòtà aci. Ne dìbà dyúdi umònà cilòtà cìvwà muntu mulòtè, ne kumwambilaci kumpàla kwà yéyè kukwambilaci, dìbà adi udi mumanyè dyumvwija.

<sup>108</sup> Èè, ngeela meeji ne aci cidi mu Mifundi, kàbìdi, Danyèlè, musangu kampànda. Kabìvwa nànku anyì? Ne...Èyowà. Ndi

ngeela meeji ne cyafùmu ku dimvwila mu meeji ànu katanci aka.  
Nwamònú anyì?

<sup>109</sup> Kàdi udi misangu yônsò umònà cilòòtà, mpindyewu, pììkalà dyumvwija dyà cyà bushùwà. Muntu ùdi ùtwádija kukulondela cilòòtà, udi ànu mwà kumwimanyika, wamba ne: “Indila kakesè. Ne cìwva *nùnku* ne *nùnku*. Cìwva *nùnku* ne *nùnku*, kàbìdì *nùnku* ne *nùnku*.”

Ne pashìshe wêwè kwamba ne: "Aci ncyà bushùwà menemene." Nwamònú anyì?

<sup>110</sup> Muntu, ditùkù adi, ùwwa ùteeta kungambila cilòtà cìvwàye mulòtè aci. Yéyè ne: "Èè," mwàkambàye . . .

Ki mêmè kwamba ne: "Mpindyewu, mwanèètù, bwà cinyì washìvi citùpà cikwàbò?"

Yêyè ne: “Citùpà kaayì cikwàbò?”

<sup>111</sup> Mêmè kwamba ne: "Uvwa mulòtè ne uvwa mwêle dibwe mu luuepèlè, ne mêmè kudyàsà dìzaji ne bimwè bipese kumbwelabì mu dîsù."

<sup>112</sup> Yéyé ne: "Aci's mbulelèlè menemene, Mwanèètù Branham." Kàdi's mbafuma ku dipatula bisùnsukila byàdì byà ndekeelu abi, makèèlèlèlè awù. Uh-huh.

<sup>113</sup> Pa nànkú's ki bwalu mbwôbù abu. Nwamònù anyì? Nudi numòna anyì? Bwà cinyì? Kwêna ucyàmba mu bulelèlà bwàci to, kàdi, nudi numòna's, Cìdi misangu yônsò ànu cìbuuludiibwa, cìdì, cìkwambila cilòtâ cyèbè, cyûvwà mulòtè aci. Dibà adi udì umanya ne mbulelèlà.

<sup>114</sup> Mpindyewu, dyumvwija dyà cilòtà cyèndè ndyôdì edi. Ùvwa mutàcìshìibwe bwà Nyumà Mwímpè. Mpindyewu, bu mwàkamònaye mushètà ku lusongo lwà mukùnà, cìvwa lubwebwe. Mushètà wà dibwe, s'n'dibwe, "ditonda." Mpindyewu, bu mwàkamba Yesù mu Mifündu. Yêyé ne: Peetèlò wàkamba... "Nganyì," Yesù wàkamba ne: "bantu bàdi bàmba ne Mêmè. Mwâna wa muntu, ndi nganyì?"

“Umwe mmwambe ne Wêwè udi ‘Eliya,’ ne ‘Môsà,’ ne bikwàbò.”

Ki kwamba Yè ne: "Kàdi nwêñù nudi nwamba ne Mêmè Ndi Nganyì?"

Yéyè ne: "Wêwè udi Kilistò, Mwânà wa Nzambì udi ne mwovi"

<sup>115</sup> Mpindyewu, bàmwè bantu bàtu bàmba mpindyewu, èkèleeziyà wa Kàtòlikè ùdi wàmba ne, èkèleeziyà wa Kàtòlikè wa cyena Loomò ùdi wàmba ne: ne Dyèndè diton-... “Lubwebwe alu lùvwa cinyì, lwàkamba Yesù ne: ‘Pa lubwebwe elu Néngìibakilépu Èkèleeziyà Wanyì, ne biibi byà ifernò kabyàkuMutàmaba bukolè to.’” Bàkamba ne: “Cìwva mpa Peetèlò. Ne Peetèlò ùvwa lubwebwe alu, bwalu Peetèlò

ùdi ùmvwija ne ‘kaadibwe kakesè.’ ‘Pa dibwe dikesè edi Nêngììbakilèpu Èkèleeziyà Wanyì.’” Nènku pa Peetèlò, bôbò, bulondyanganyi bwà cipostòlò, mpàdibo bìibakila èkèleeziyà.

<sup>116</sup> Pashiishe èkèleeziyà wa Mishòonyì ùdi wàmба ne: “Aci ncýa mafi. Aci, cíwwa mpa Yéyè mwinè pàkiibakila Yé Èkèleeziyà.”

<sup>117</sup> Mpindyewu, kabiyì bwà kupangishangana nsòmbelu to, kàdi, mêmè, ku wànyì mùshindù wà dicimòna, byônsò bìbìdi mbyà mafi. Bwalu kacya kàtu mumwibàkile pa Peetèlò nànscha, kàtu nànscha mumwibàkile pa Yéyè mwinè nànscha, kàdi cídi mpa dibuulula dyà Peetèlò dyà ne Yéyè ùwwa Nganyì. Nwamònú anyì?

“Bantu bàdi bàmба ne, Mêmè Mwânà wa muntu ewu ndi nganyi?”

“Wêwè udi Kilistò awu, Mwânà wa Nzambì udi ne mwoyi.”

<sup>118</sup> “Udi mubènèshìbwé, Simonà, mwânà wa Yona. Munyiinyi ne mashi kî mbikubuwlile eci to,” kî n’seminérè kampànda to, nwamònú’s: “kàdi Taatù Wanyì udi mu Dyulu ngudi mukubuwlilecì. Wêwè udi Peetèlò. Pa lubwebwe elu lwà ditonda, pa dibuulula edi, Nêngììbakilèpu Èkèleeziyà Wanyì.”

<sup>119</sup> Nènku ke cívwàku, cikondo cyônsò cyà èkèleeziyà cyàkapeta lwôlò lubwebwe lwà ditonda alu, too ne ku lubwebwe elu lwà ditonda lwà Laòdikìyà.

<sup>120</sup> Nènku, mpindyewu, kwêna mwà kwenza èkèleeziyà wa cijila to. Kakùtu cintu pààci ne ng’ekèleeziyà wa cijila anyì bulongolodi bwà cijila nànscha. Nyumà Mwîmpe ùdi mwà kuyiishibwamù, kàdi mwômò amu udi usanganamu bîmpe ne babì, bantu bavile diitabuuya, bâdì kabàyì bacyùka, ne bikwàbò byônsò ebi. Pa nànkú bulongolodi kabwàkushindama to. Wêwè kwêna mwà kwamba ne: “Tudi Nendè to. Kakwèna nànscha umwe wa ku bôbò udi Nendè to.” To, mukalenge. Nyumà Mwîmpè mmupòngòlwela bantu nkààyà. Mmuntu nkààyà.

<sup>121</sup> Pa nànkú, ki bwà cinyì, lubwebwe alu, Èkèleeziyà wa mpenta, wa ditùkù dyà ndekeelu ewu mmupete Nyumà Mwîmpè, wâkapetabo dyàmbedi awu. Bìpweka nànkú mu bikondo byônsò, bâdì bâpeta Nyumà Mwîmpe, kàdi ki mmu cipiminu cídibò Nendè mpindyewu to, bwalu ndyalujulula dyà wa kumpàla awu. Patûdi twangata bitèèkedi byà myêndù, Alpha ne Omega, mùshindù mwinè wùuvwàbo bâteemesha kàndeyì kàà kumpàla; Byàkaya byènda bìbànda ne byènda bìbànda, e kubangabi byènda bìbwita byènda bìbwita; pashiishe byálukila kàbidi. Nwamònú anyì? Wa kumpàla ne wa ndekeelu, mùshindù awu.

<sup>122</sup> Mpindyewu, kàdi mu cikondo cyà èkèleeziyà eci, Mukenji mmupòngolodiibwe mu èkèleeziyà. Kàdi mubidi wà èkèleeziyà, wôwô mwinè, mu cibùmbù bu mùdì . . .

<sup>123</sup> Tabernacle ewu, mutùdì mwà kwamba. (Mwômò amu ke mùdiye ùlwa mu èkèleeziyà.) Ntentà ewu kí ntentà wa Nyumà Mwîmpè to. Cintu bu nànkú kacitukù to. Bantu nkààyà

bàtù bàlwa mu èkèleeziyà ewu ke bàdi ntentà yà Nyumà Mwîmpe. bôbò ki ntentà yìdì myambule Nyumà Mwîmpe, kàdi ki ng'èkèleeziyà mu mubidi to, musùmbà. Ki bwà cinyì, Ùdi úpàtuka.

<sup>124</sup> Kàdi, cìdì, muntu ewu uvwa upòngolola mâyì, mùsànjeelà wa èkèleeziyà, munkacì mwà kupòngolola Mukenji mu èkèleeziyà, kàdi ncinyì cìvwà mâyì ènzà? Avwa àsàbà àpàtula bukooya bwônsò bùvvwàmu. Cyôcì aci ke cìdì Nyumà Mwîmpe wènzà, ubìsabisha ubìbàndisha, mpindyewu.

<sup>125</sup> Mpindyewu, bwíci bùvwa buleeja dinanga dyà bwânanà bwètù, dinangangana dyà bwânanà bwètù, dìdì cikondo eci adi. Ndi mfuma ku dyamba, nwamònou's, bwà dinangangana dyà bwânanà bwètù, cikondo citùdì ne mwoyi mpindyewu eci.

<sup>126</sup> Mpindyewu, udi mufwànyìne kwamba ne: “Tàngilààyi, ncyêna—ncyêna—bushùwà muswè Mwanèètù Neville to.” Anyì ne: “Ncyà bushùwà ne ncyêna muswè Mwanèètù Jones to. Ncìtu muswè Mwanèètù *Kansanga* to,” ne cintu bu nànku awu. Kàdi lekela ànu cintu kampànda cìmwenzèkèlè, mwanèètù, mwoyi wèbè mmucibùlùke. Byàmba ànu kukushebeya. Nwamònou anyì? Tudi mwà kupeta dinangangana dyà bwânanà bwètù ne kuumvwa majiyà bwà muntu ne mukwèndè. Nwamònou anyì? Kàdi bwà kushààla badilame mu musùmbà kapànda wà bantu . . .

<sup>127</sup> Udi uditacisha bwà mwanèètù wàwa bwà cinyì? Bwalu nuvwa bakòsòlwelangane nendè dyâmpà mwaba ewu ku cyoshelu eku, munwàkòsòlwelangana dilòòlò edi. Udi wenza nendè bwobùmwè. Ulabulangana nendè ku cyanza. Ukukwila nendè. Yéyè mmwanèènù wa balùme. Kàdi údi mwà kwikala mwenzè cintu kampànda mu mubidi, cyûdì kùyi upetangana naaci to, kàdi nùdi ànu wanji udítola, (cyûvwa kùyi ne cyà kwenza to), kàdi wêwè e kumwepela ndambù. Kàdi mu ndòndò wa mwoyi webè, cintu cyôcì cyenzékèle mwanèètù wa balùme awu, ncifwànyine kukushebeya menemene, anyì mwanèètù wa bakàjì awu.

<sup>128</sup> Mêmè—mêmè ndi muntu mununu. Musangu kampànda mvwa nsongà, kàdi mpindyewu nkaadi mununu. Nkààdi mucimòne, mu cikondo ne mu cikondo, cyènza nànku. Nkààdi mumvwe bantu bàmba ne: “Ncyàkwikala kàbidi nendè bwalu to.” Kàdi bwalu kampànda bwènzekele ànu mwinè muntu awu, bùdì bwàmba kumushebeya yéyè awu. Ùdi wèla meeji ne: “Éyi Nzambì, ndi mulekèle mwanèètù wa mushinga mukolè ùya, katùyì bapingàja nendè bulunda.” Udi umòna anyì? Nwamònou anyì? Nwamònou anyì? Ndinanga dyà bwânanà bwètù. Bìdi bimwèka ànu bu ne kabyàkulamakanangana to, kàdi bìdi bilamakanangana. Bwíci, bütù bùlamakana.

<sup>129</sup> Mpindyewu, bu mwàkafùmìnaye kwàka, wènda úpweka pa mukùnà, mutàngile kwinshì kwà mukùnà, mpindyewu, mâyì à butùmbi aa àvwa àpàtuka àsòmpokela pa tukùnà, mu tusùlù

tùtaanu. Mpindyewu, ìtaanù nnombà wa ngâsà; J-e-s-u-s, f-a-i-t-h, g-r-a-c-e. Nwamònù anyì? Ìtaanù nnombà wa ngâsà. Tusùlù tùtaanu tûvwa tûpongolokela kuulu eku mu mpoko, tûpwekela too ne kwinshì *eku*.

<sup>130</sup> Cyônsò cyà ku bikondo ebi cìvwa ne lubwebwe lwà ditonda alu. Bansantu mbalàâle tulù, bindile, bindile, bindile, bindile, nwamònù's, too ne mu cikondo eci. Kàdi mu katancì kakesè emu Nyumà Mwîmpe, bu mùdì'Ye mupòngòlola ùpàtukila mu Kilistò, neàlwè ne neàtwe Èkèleeyiyà citampì. Dîbà adi Èkèleeyiyà neàmbwìbwe. Necìlkale cintu cijimà cyà Nzambì, Mukàjì-musèla bwà Kilistò, wîkala Mutù wà bintu byônsò. Nudi nundonda mpindyewu anyì? [Disangisha dìdi dyàamba ne: "Amen."—Muf.]

<sup>131</sup> Mpindyewu, ùvwa munkaci mwà kudìkonka. Mpindyewu, mu cilòtà cyèndè amu, ùvwa munkaci mwà kudìkonka ne: "Kasùlù kakesè aka nkafwànyìne... Kasùlù kakesè aka nkafwànyìne kufika too ne kwinshì kwàka anyì?" Nwamònù anyì? Kàvwa kënda kùuma. Mpindyewu, bu mùdìbi nànku, yéyè mwinè. Mpindyewu mònaayi kündì muswè kunùfikisha mpindyewu. Yéyè mwine ùvwa munkaci mwà kudìkonka bwèndè yéyè mwinè. Ùvwa "ne Nyumà Mwîmpè anyì"?

<sup>132</sup> Mpindyewu, mvwa mwepùke bwà kwamba eci, kùkaadi ndambù wa matùkù, ndyàmbidila ne èkèleeyiyà neïkalè wa nyumà menemene bwà kucibàkula. Kàdi pàmwàpa mbitambe bwîmpe mêmè kwimanyika dikwàtà dyà mukàbà wà mèyi ewu ànu mpindyewu, kàdi bu mundi ncìyi muswè bwà kupàtukawu munkaci mwà bâna bèêtù. Kàdi udi mufwànyìne kwakula mu myakulu, udi mufwànyìne kwela mbilà, udi mufwànyìne kuja maja, udi mufwànyìne kwipata baadémmons, kwenza cintu kanà cyônsò cyûdì muswè kwenza aci, kàdi kùyi ànu ne Nyumà Mwîmpè to.

<sup>133</sup> Bayidi abu kabàâkaalukila, bëndà bàsàンka ne bënda bëèla mbilà bwalu badémmons bàvwa bàbàtumìkila ne Yesù... ànu munkaci mwàbò mene amu mùvwa Yudààsà anyì?

<sup>134</sup> Yesù kààkambaku ne: "Mu ditùkù adi," pààlwà Ye apu, ne: "bààbûngì nebàlwé kûNdì bàmba ne: 'Mukalenge, mêmè ncyêna mwipàte badémmons, ne mwenze byenzedi byà bukolè mu Dînà Dyèbè anyì?' Nènku nêngämbè ne: 'Nguumükilaayi apa, nwénù beena mudimu bàà bubì. Mêmè ncivwa munùmanyè to.'" Abi bintu kî mbileeji byà Nyumà Mwîmpe to.

"Ku mamuma ààbò nkunwàbàmanyinà."

<sup>135</sup> Mpindyewu wêwè udi wamba ne: "Mwanèètù Branham, twêtù, bivwa bìkèngela twêtù kwakula mu myakulu anyì?" Kakuyì mpatà to. Aci mmapà à Nzambì. Kàdi mapà à Nzambì awu, wôwô kâyì ne makolè aa munda mwàwù to, àdi àtèèka dibwe dyà cilèndwishi kùdì mwena bupidyà. Kí ncyanyìshiibwe kùdì Nzambì to.

<sup>136</sup> Eci cidi ne cyà kwikalakù dyàmbedi. Nènku paùdì ne diitabuuya, bukolè, dimanya, didikànda, lutùlù, difwànà dyà Nzambì, ne dinanga dyà bwâna bwètù, dîbà adi Nyumà Mwîmpè ùdi ùpweka ne ùkutwà citampì bu muntu pabwèndè, byà mwomùmwè ne mùdìYe ùtwa bikondo byà èkèleeziyà citampì bu cikondo pabwàcì. Mùshindù ùdìYe ûfùmba Mukajì Wendè musèla ke mùshindù ùdìYe ûfùmba muntu nkààyà Wendè; mwenza ne bintu bìmwèbìmwè, ànu mùvvà Evà mwenjìibwe mupâtùdiibwe ku Adàmà amu, lubadi lwà mu luseke. Ebi ki bintu binùdì ne cyà kwikala naabì dyàmbedi. Kanwèna mwà kubítentula to. Kanwèna mwà kubìidikija to. Bidi ne cyà kwikala bitùmìibwe kùdì Nzambì ne biledìibwe kùdì Nzambì. Diidikija dìtu dilela ànu cibwejákajì.

<sup>137</sup> Bidi ànu mûmvwa mwâmbe. Nudikù mwà kudifwànyìkijila numòna kabangu nyuunyi kasòmbe mwaba wàwa ne masàlà à nkuci maasa mu mapwâpwà ààkù kàmba ne: “Mônaayi, ndi nkuci’s!” Kî nkuci to. Ncabangu nyuunyi, ciminyi. Nudikù mwà kudifwànyìkijila nyuunyi mufiìke mwikàle ne masàlà à nyuunyi wa kayibà mu mapwâpwà èndè, wàmба ne: “Nwamònú anyì!”? Aci’s ncintu cidi muñisomèke.

<sup>138</sup> Kàdi bìkèngela cìpatukilè munda amu, ne cidi cìtwàla bwena Kilistò; Nzambì, ku bukolè bwà Nyumà Mwîmpè!

<sup>139</sup> Mwanèètù wa bakàjì ùvwa ku makàsà kwèndè kubolè ne mâyì pàkafikaye kwinshi aku. Bônsò bwètù tudi bamanyè Mwanèètù wa bakàjì Shepherd ne ngwa dinanga. Wendè nzùbu ùdi bwâshi. Yéyè ne mwanèètù wa balùme, muntu nànscha yéyè mwikale mulalakanyi, mulombi wa kàà pa luse, nànscha yéyè mwikale nganyi, nebàmudiìshe, nebenze cintu kanà cyônsò cidibo mwà kwenza bwà kumwambulwisha. Ekèlekèle! Nzambì mmwanyishe cyôcì aci, cyéndè cishimìkidi aci.

<sup>140</sup> Kàdi ki bwalu ebu, mpindyewu, akìdilaayi dilongesha edi. Ki cìdì cibì ncyôcì aci kùdì—kùdì... Ndi nkwtà eci pa mukàbà. S’ki cìdì kaciyì cyènda bìmpè ne Branham Tabernacle ncyôcì eci. Nudi numòna’s, kùdi mìshindù yìbìdì yà diitabuuya. Kùdi mìshindù yìbìdì yà bukolè, ànu bu mûmvwà mucyàmbe ditùkù adi amu. Mìshindù yìbìdì mishiìlàngànè yà dimanya. Mìshindù yìbìdì mishiìlàngànè yà didikanda.

<sup>141</sup> Bâmwè bâdi bëèla meeji ne bâdi naadi ku mukàndù, údibo naawù. Adi kî mmùshindù wà didikanda dìdì Nzambì wàmба nànscha. Bwalu mbwà cilunji cibì, cìdì kaciyì cikòntononyiibwa cyûdì naaci aci, ne bintu byà mùshindù awu, bìdì byènza ne wêwè ùbinduluke pa lùkàsà, ùtandanganè.

<sup>142</sup> Lutùlù, ne bikwàbò, kùdi byà bitentula, byà budìngìbudìngì; diitabuuya difidìibwe kùdì bufuki; bukolè bufidìibwe kùdì bufuki. Kùdi didikanda difidìibwe kùdì bufuki. Bintu byônsò ebi mbifidìibwe kùdì bufuki.

<sup>143</sup> Ne citùpà cyà citàmbe bunène cyà diitabuuja dyètù ndiitabuuja dyà mu mutù. Mu kutèèleja kwà Dîyì, bìdi bitufikisha ku dijingulula dyà mu mutù dyà Nzambì.

<sup>144</sup> Kàdi bu Edi edi, dìdì dìfùmina Muulu edi, kaa, mwanèètù, Dyôdì didìdinge dilenge *eci*, kùdi diitabuuja dyà nyumà dyà difwànà dyà Nzambì. Dìbà adi diitabuuja adi dìdì dyenza cinyì? Diitabuuja adi dìdì dijingulula ànu Dîyì. Cìdì ní ncinyì cikwàbò cyàmba nànscha ciikàle cinyì, dìdi dyôdì dijingulula ànu Dîyì, bwalu, “Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì.” Ne Dîyì dìcidi ànu Nzambì. “Ne Dîyì dyàkawvjijiibwa mubidi ne dyàkasòmbela munkaci mwètù.” Ne pàdì Dîyì Dyôdì diine dìpòngoloka mu diitabuuja dyètù, diitabuuja dyètù dyà mu mutù dìdi dilwa dibuulula dyà nyumà.

<sup>145</sup> “Ne pa cishimikidi eci Nêngììbakilèpu Èkèleeyiyà Wanyì.” Nwamònú anyì? Ki mpa ngeelèlù wa meeji wa mu mutù wa dikashààla wa mu èkèleeyiyà, ngeelèlù wa meeji wa mu mutù wa Cyôcì aci to; kàdi pa dibuulula, dìbà dìdì tusùlù twà ngâsà atu tupòngòlòkele mu diitabuuja dyà mu mutù dyûdì naadi adi. Pashiishe, pa cyôcì eci, dibuulula dyà nyumà ne: “Nêngììbakilèpu Èkèleeyiyà Wanyì, ne biibi byà ifernò kabyèna mwà kuMutàmba bukolè to.” Nwamònú anyì? Aci cidi cileeja ne bàvwa mwà kuMulwisha, kàdi kabyàdyàkutàmba bukolè to. Kaa, cintu cyà butùmbi kaayipu’s wé! Mpindyewu tàngilààyi diitabuuja. Tusùlù tútaanu etu . . .

Mvwa ne katùpà kàà lupèmbà mwab’ewu, kàdi ndi ngèèla meeji ne kí mmukàtwàle nànscha.

<sup>146</sup> Kàdi tusùlù tútaanu tunùdì numòna tòpwekela mwab’ewu etu, tudi tütuyisha cyônsò *eci*. Ùvwa n’Nyumà Mwîmpè wâkenza èkèleeyiyà wa Efèsò. Ùvwa n’Nyumà Mwîmpè wâkalela èkèleeyiyà wa Seemùnà. Nyumà Mwîmpè ngwâkafila èkèleeyiyà wa Peegàmò, ne èkèleeyiyà wa Twatilà, mu Bikondo byà Mídìmà. Nyumà Mwîmpè ngudi mwibàke Mukàjì-musèla awu, Basungula bâdì bapàtûdiibwe mu ndongolwelu yà bulongolodi mu bikondo byônsò, mùshindù awu abu. Kudi Musungula, Mukàjì-musèla mudyànjila kulongolola wa Yesù Kilistò, mmùmwà ne Nyumà Mwîmpè mubiikile pambèlu Musungula awu. Ne cìwva n’Nyumà Mwîmpè mu cikondo *eci*, cikondo *aci*, cikondo *aci*, *aci*, *aci*, *aci*, cyènda cibànda too ne ku lusongo, Nyumà Mwîmpè.

<sup>147</sup> Nenku mpindyewu bu mùdì mu bantu nkààyà, makolè aa ne bikwàbò, adi dimanya ne didikanda, bìdì bisàkidìibwe ku diitabuuja dyètù. Dìbà adi pààlwà Dibwe dyà mùsongà, Nyumà Mwîmpè ùdi ùBilamakaja pàmwè. S’ki dibàtiiza dyà Nyumà Mwîmpè adi. Ki bwà cinyì ncitàmbe kwikalà cyà mpùùkapùùka menemene leelù ewu.

<sup>148</sup> Ngănjìbi kutàngila apa, ndi ne mifündu ndambù yîndì mufünde mwaba ewu. Tùmonèbi tûng. Mvwa ne cimfwànyì cizola mwab'ewu, bwà cilòòtâ cyèndè aci. Nwamònú anyì? Kanwèna mwà kucimwènena lwà aku to.

<sup>149</sup> Mpindyewu, cyùmukila kùdì Nyumà Mwîmpe, cìdì cilwe aci ncinyì? Dîbà adi Yêyè neàkupèeshè, diitabuuja ditàmbe mfùkilu, diitabuuja dyà nyumà, dìdì lwà mu ndòndò emu. Dîbà adi diitabuuja dyà nyumà adi didi dìjingulula ànu Dîyì nkààyaadì. Nànsa muntu kanà yônsò ewu mwambe cinyì, kacyéna—kacyéna ne dikwàcisha nànsa dìmwè to. Adi's didi dimanyè ànu Dîyì. Muntu kampànda yêyè wamba ne: "Matùkù à bishimà àkaadi mamane kupita." Diitabuuja adi ndimanyè ànu Dîyì. Muntu kampànda údi wàmба ne: "Cintu pààcì ne ndibatiiza dyà Nyumà Mwîmpè kacìtùku to." Diitabuuja adi ndimanyè ànu Dîyì. Aci ncyà bushuwà, diitabuuja dyà nyumà, nudi numòná's. Ncyà bushuwà. Nwamònú anyì? Ndimanyè ànu Dîyì.

<sup>150</sup> Dîbà adi, aci ke civwà cyà kumpàla. Cyà kumpàla, cìdì cilwa kûdì, ndiitabuuja dyèbè dyà mu mutù ànu mwaba ewu, ke Nyumà Mwîmpe ewu úpweka ubwela mu diitabuuja dyèbè dyà mu mutù, bwà kudìvwija diitabuuja dyà nyumà. Dîbà adi diitabuuja dyà nyumà dìdì dìjingulula ànu Dîyì.

<sup>151</sup> Mpindyewu, ne ciibîdì, ciisâtù. Dîbà adi newikalè ne cyà nyumà, newikalè ne Nyumà Mwîmpè, ne neàtwe bintu byônsò ebi cítampì munda mwèbè, pàdì Nyumà Mwîmpe ûlààdila eci. Kuumukila ku diitabuuja dyèbè, too ne pàdì Nyumà Mwîmpe, ùkutwà cítampì munda pàmwè ne Kilistò. Dîbà adi nudi nushààla Umwe. Amen. (Nguumùshile cintu eci mu njila wanyì; cidi cítacisha mabòko.) Nudi nushààla umwe. Nwamònú's, wêwè ne Kilistò nudi nusòmba pàmwè. "Mu ditùkù adi nenùmanyè ne Mêmè ndi munda mwà Taatù, Taatù munda Mwànyì; Mêmè munda mwènù, ne nwènù munda Mwànyì." Nwamònú anyì? Dîbà adi ncimùkù cítwìbwe cítampì cyà Mukalenge Nzambi.

<sup>152</sup> Mpindyewu, ne pashiìshe mbashìndìkìibwe ne batèèkìibwe. Pàdì dîbà adi dìkùmbàna, bâdi balwa bânà bâà balùme ne bâà bakàjì bâà Nzambi bashìndìkìibwe.

<sup>153</sup> Nudi bavùlùke, lwà mu Mukàndà wa Maatààyì, nshapità wa 17, ku mvensà wa 1 too ne mwi5, Yesù pa Mukùnà wa Dikùdimuka dyà mpàla?

<sup>154</sup> Nukààdi buumvwa *Mutèèlèjaayi*. Diyishà ndîvwà mfùma ku diyishà, mwaba ewu kùkaadi cidimu cijimà, dìdì dishààle dyà mwasàkànaayi adi, *Mutèèlèjaayi*. Dishikikibwa dyà mwânà, mu Efèsò 1.5 kàbìdì ne: "Nzambi mmudyànjile kutùlongolola ku ditèèkiibwa dyà bânà."

<sup>155</sup> Nwamònú's, dîkù kampànda, pàdì mwânà wa balùme muledìibwemu, yêyè mmwânà wa balùme dîbà adi. Kàdi mwânà wa balùme awu ùvwa ne bandeji bwà kumukolesha. Kàdi mwânà

wa balùme awu yéyè kàyì mufikè mu—mu cipidì cijalàme cyà mwânà wa balùme to, kadyàkushààlaku mupyànyì nànsha. Kàdi bu ne yéyè ùvwa mwânà wa balùme mujalàme, ne mwânà uvwa mwà kutùmikila tawéndè awu, díbà adi mwânà awu ùvwa mutèèkìibwe, anyì mushikìkìibwe bilondéshile myaba. Ùvwa ûlwa mupyànyi wa civwà taatù naaci.

<sup>156</sup> Ne ki cìvwà Nzambi wènza pa Mukùnà wa Dikùdimuka dyà mpàla. Pààkangatà Ye Mwan'Endè Sungasunga, paanyimà pàà Yéyè mananè kujaadikiibwa ne ùvwa m'Mwânà wa cyà bushùwà, nwamònù's, ne ùkaavwa mukàndàmèène mateeciibwa ônsò, KuMubàndishayè pa Mukùnà wa Dikùdimuka dyà mpàla ne kuMubwikila ne mundidìmbi.

<sup>157</sup> Nudi bamanye's, mu Dipungila Dikùlukulu, bàvwa bàngata mwânà wa balùme, bàmuvwàdika bilàmbà bilenga, bìmpè byà dikèma, ne bàmushikika pambèlu munkaci mwà bantu bitùule. Bàvwa bènza mushìngà wà dishikikiibwa, anyì mutùdì tucìbikila ne ditèèka. Mu Ngalàtiyà mwàmwa, ndi ngeela meeji ne Pôlò ùdi ùcìteeja bu ditèèkibwa dyà bâna bàà balùme. Mpindyewu, kàdi, ditèèka dyà mwânà wa balùme, bambi nebuumvwé, ne babadi bàà nyumà, bàà Bible, bwà ditèèkibwa dyà mwânà wa balùme ewu. Mu ngaakwilù mukwàbò, mwânà awu ùvwa mwânà wa balùme pàvvàye ùlediibwa.

<sup>158</sup> Ki mwaba ùdi beena Mpenta bètù aba benze cilèma ngwàwù. Muledìibwe mu dîkù, ku Nyumà Mwîmpè, ncyà bushùwà, kàdi dîbà adi tudi ne cyà kwikalà bâna bàà mùshhindù mujaalàme, balongèshìibwe kùdì Ndeeji mujaalàme. Nwamònù anyì?

<sup>159</sup> Mpindyewu, pàvvà muntu, mu cikondo cyà kale mwàmwa, wèla meeji bwà mwânèndè wa balùme, ùvwa ujinga bwà kwikalayè mwânà wa balùme wa ngiikàdilu mujaalàme, ùvwa ùpeta ndeeji mutàmbe bwîmpe uvwaye mwà kupeta awu, mulongeshi mwîmpè ku bônsò, bwalu ùvwa ùjinga bwà mwânèndè wa balùme kukolayè kushàala bu tawéndè. Nwamònù anyì? Pa nànku ùvwa upeta ndeeji mujaalàme.

<sup>160</sup> Mpindyewu piìkalà muntu wa pa buloba apa mufwànyìne kwela meeji bwà ndeeji mutàmbe bwîmpe, kàdi netwambe bishi bwà Nzambi, Taatù wetù? Mpindyewu, kacya kàtu mwânjì kwangata bëèpiskòpò, ne ba kardinalé, ne bansaserdòse nànsha. Yéyè wàkangata Nyumà Mwîmpè bwà kwikalayè Ndeeji wetù. Ne Nyumà Mwîmpè ki Mulongeshi wetù. Ne Yéyè—Yéyè ùdi mu Èkèleziyà, ne Yéyè ùdi ûfikisha mukenji kùdì Taatù.

<sup>161</sup> Ne pashìishe bu taatù, anyì, ndeeji mwà kujuuka e kwamba ne: “Èè, Taatù...” Mpindyewu, yéyè kî mmuswè kwangata ndeeji kampànda udi muswè buneeme ku cifulu cyèndè aku, nudi bamanye's, lusàlì, mutùtù twalùbìikila amu. Wàmba ne: “Kaa, mêmè mwambile taatù cintu kampànda bwà bwalu ebu... Mwânà wa balùme wàwa mmuntu muvilè diitaba, yéyè

mwine, kàdi bu mêmè mwà—bu mêmè mwà kwambila taatù, taatù mmufwànyìne kumbàdishila difutu.” Awu kî ndeeji wa mùshindù mwîmpe to. Ndeeji wa mùshindù mwîmpe ngwa meeji matòoke, wàmba bulelèlè.

<sup>162</sup> Ne Nyumà Mwîmpè ùdi wàmba Bulelèlè pàdìYe ùlwà kumpàlà kwà Nzambi, bwà bwalu bwètù. Èyowà. Pa nànku Üdi ùbànda. Udi wela meeji bishi? Ùvwà mufwànyìne kufwa bundù leelù pa kwamba ne: “Bânà bèèbè bàà bakàjì bàdi bàkòsa bônsò nsukì yàbò, kadi Pèèbè mubamble bwà kabàyikosu to. Bânà bèèbè bàà balùme mbatàmbe kwikala badifile ku malongolodi, mu mùshindù wà ne kabèènaku mwà kutwàlanga muntu ne mukwèndè to. Mmwômò. Kàdi bàdi basungula eci pamutù pà Eci, ne eci pamutù pàà Cyàcyà.” Mùshindù mwinè Üdiye ne cyà kufwa bundù’s we! Kàdi mùshindù wùdù Ndeeji awu mwà kunanga bwà kulwa kwamba ne: “Kaa, ekèlekèle! Mwânà awu mmwâna wa balùme mulelèlè. Yéyè ùdi ànu mùdù Taatù amu.” Kaa, mùshindù mwinè ùvwà Ye mufwànyìne kunanga kwamba aci’s wè! Nwamònou anyì?

Dibà adi Taatù ùdi ùdyùmvwa maleela, wàmba ne: “Ewu mmwâna Wanyi wa balùme!”

<sup>163</sup> Ki cyàkenzà Nzambi menemene pa Mukùnà wa Dikùdimuka dyà mpàla. Mònaayi, ki Môsà ne Eliyà kumwènekabo. Ne Peetèlò, musaluke yônsò; citàmbe-mfùkilu kwenjiibwaci. Peetèlò musaluke, kwambayè ne: “Twìbakè ntentà yisàtù, umwe bwèbè Wêwè, ne umwe bwà Môsà, umwe bwà Eliyà.”

<sup>164</sup> Pàcìvvàye ànu wàkula apu, Nzambi kumubwikidijayè mukana. KwambaYè ne: “Ewu ewu m’Mwânà Wanyì munanga mwena munda mmûNdi ntàmbà kusànkila. Mutèèléja Yi.” Nwamònou anyì? Nzambi wàkaDìpingaja paanyimà, ne: “Ewu m’Mwânà Wanyì.”

<sup>165</sup> Môsà uvwa uléeja mikenji. Baprófetà bàvwa bàleeja bwakàne Bwèndè. Katùvwa mwà kwikala ne mwoyi ku mikenji Yèndè to. Katùvwa mwà kwikala ne mwoyi ku bwakàne Bwèndè to. Ncyéna ndômba bwakàne to. Ndi nkengela luse, kî mbwàkàne to. Ncyéna mwà kulama mikenji Yèndè to, ne ncyéna mwà kutwìlangana ne bwakàne Bwèndè to. Kàdi ndi nkèngela luse Lwèndè. Ne Nzambi wàkamba ne mikenji ne bwakàne bìdi bisanganyìbwa munda Mwèndè. “Yéyè m’Mwânà Wanyì munanga. NùMutèèléjaayi. Ki Yéyè awu. Ki Yéyè awu.”

<sup>166</sup> Mpindyewu, mu Dipungila Dikùlukulu pààkatèèkiibwa mwânà awu, anyì mutèèkùlbwe mu díkù, dínà dyèndè dìvvwa dikùmbàne pa shekè ànu mùvwa dyà tatwèndè amu. Eyowàs, mukalenge. Kabàvwa ne...Bàvwa ne kakànù, mu matùkù awu, ci—cimanyinu, citampì. Nénku bàvwa...[Mwânèètù Branham ùdi wenza bu udi utwìla matè ne ùtuuta cintu pa cyambilu—Muf.] Bàvwa bàtwìlapù matè, baàlabapù, ke civwà citampì. Aci civwa ànu bu mùdù...Ùvwà ùlwàta kakànù kàà

tawéndè, cítampì cyéndè. Nènku aci cívwa címpe ànu bu cyà tawéndè.

<sup>167</sup> Mpindyewu, pàvwà Yesù mutùmìke, Yesù kùdì Nzambi, Nzambi wákamutèeka bilondèshile myaba ne: “Ewu n’Yéyé.”

<sup>168</sup> Mpindyewu, pàdì cidimba ciledìibwe kùdì Nyumà Mwîmpè mu díkù dyà Nzambi ne bishindikiibwe ne ùdi ne makolè aa munda mwèndè, bwà ne Nzambi ùdi mwà kumònà bukolè, dimanya, didikanda, lutùlù, dinangangana dyà bwâna bwètù, ne difwànà dyà Nzambi, munda mwèndè, díbà adi Nzambi ùdi ûmutwà cítampì, anyì ûmutèeka pa kaaba. Nènku, mwaba awu, ki paùdi umònà bânà bàà balùme ne bàà bakàjì bàà Nzambi.

<sup>169</sup> Pashiishe, Efèsò 4.30 ùdi wàmба ne: “Kanùbungamiji Nyumà Mwîmpè wa Nzambi to, unùdì batwìbwé nendè citampì too ne ku Ditùkù dyà bupikudi bwènù.” Mpindyewu, bàmwè bàà ku nwénù ba-Baptistes bádì baswè kwimanyina pa dikùbiibwa dyà Cyendèlèlè, mpindyewu, bu nwénù mwà kufika ku cipidi aci, Nengìimane neenù mu dikùbiibwa dyà Cyendèlèlè, bu nwénù mwà kufika pa mwaba awu.

<sup>170</sup> Kàdi ànu bwà kwamba cyanàànà, muntu kanà yônsò ewu wàmба ne: “Ndi mukashààle wa mu èkèleeziyà wa ba-Baptistes. Ndi Presbytérian. Ndi ne dikùbiibwa dyà Cyendèlèlè.” Aci ncyà mafi. Nsòmbelu webè wêwè mwinè ke udi ùshindika ne kwena Nendè to, pàdì Ye kàyì mwanji kwikala munda amu nànsha.

<sup>171</sup> Kàdi Nzambi mmukutèeke ne mukutwè cítampì ku Nyumà Mwîmpè mukubweje mu Bukalenge, pa nànku kakwèna dipàtuka dyà mwômù nànsha. Udi mukùbiibwe bwà Cyendèlèlè. Itàbùuja. “Kanùbungamiji Nyumà Mwîmpè wa Nzambi unùdì nwénù bônsò ne makolè ènù à difwànà dyà Nzambi awu batwìbwé cítampì too ne ku Ditùkù dyà bupikudi.”

<sup>172</sup> Ndi ngìtabuuja ne kùdi Mukàjì-musèla udi mudyanjila kulongolola. Ndi ngìtabuuja ne Nzambi mmwambè ne Yéyé ûvwa mwà kwikala ne “Èkèleeziyà kàyì katobà anyì mufudì to.” Ndi ngìtabuuja mu didyànjila-kulongolola, ne Mukàjì-musèla mmudyànjila kulongolola. Bikèngela ikalè Mwômò amu. Ndi ntékemena ne nengìkale Nendè. Bwa ne, nwamònou’s, mêmè nengìkale Nendè. Mpindyewu mbilàale kündì bwà kukwàta mudimu bwà lupàndù lwànyì sungasunga ne Nzambi, too ne piìkalà bintu ebi ne cyà kujaadikiibwa kùdì Nzambi, ne pashiishe kutwìbwá cítampì mu Bukalenge bwà Nzambi. Ki Nyumà Mwîmpè nyéyé awu. Ki byenzedi bishùwashùwàlè byà Nzambi mbyôbì abi. “Ncítwìbwé cítampi too ne ku Ditùkù dyà bupikudi.”

Ke cívwa cilòótà cyéndè ncyôci aci. Ngeela meeji ne cívwa cilenga.

<sup>173</sup> Mpindyewu, ki bwà cinyì, pàdì Ye wènza nànku, pàdì Èkèleeziyà awu ùlwa mu mwaba ewu, anyì muntu-nkàayà, Èkèleeziyà neikalè Ku. Lekèlaayi ncyambe bîmpe menemene bwà

nwênu kucyùmvwa. Èkèleeziyà mmudyànjila kulongolola bwà yêyè kwikalaKù. Ndi muswè kwikala Nendè, kàdi mûshindù ùmwèpelè ungìlkala Nendè, ngwà kwikala citùpà Cyèndè. Mmunyì mûndì ndwa citùpà Cyèndè? Pa kwikala mu Yéyè. Mmunyì mûndì mbwelaMù? Nku dibàtiiza kampànda, ku Nyumà umwe. Kolintò wa Kumpàla 12: “Ku Nyumà umwe nkutùdì bônsò babàtiijìibwe mu Mubidi wùmwè.” Mubidi wùmwè; babàtiijìibweMù.

<sup>174</sup> Kàdi kwêna mwà kulamika tuntu tukesè etu to, wamba ne: “Ndi mwakule mu myakulu. Ndi Nendè.” Upàtuka pambèlu apa, mufiike munda, wènda udìcipa, wenda wenza maalu à lukutukutu. Nwamònù anyì? Aci nkwasà masàlà à nyuunyi wa kayìba mu—mu nyuunyi wa cibonkola. Nwamònù anyì? Kwêna mwà kucyènza to. Nsòmbelu webè sungasunga ngudi ujaadika ne kabyèna nànkú to.

<sup>175</sup> Kàdi dîbà dìdì bintu ebi munkacì mwà kukwàcila mudimu munda mwèbè, kùdì Nzambì, dîbà adi udi mutwìbwè cítampì. Dîbà adi kakwèna byà ditelakajapù to. Wêwè udi ànu wêwè mwinè. Ki pàdi bikèènà-kumònà, bipwàngànè, Nyumà Mwímpè, byenzedi byà Nzambì, byônsò, bìmwènëshiibwa, bwalu (bwa cinyi?) wêwè ne Kilistò nudi balwè umwe. Ndi ntèkemena ne aci ncyumvwiike. Wêwè ne Kilistò nudi balwè umwe.

<sup>176</sup> Mvwa ne cintu cikwàbò kàbìdì cîmvwa mufùnde kaaba aka, cîmvwà muswè kwelelapù meeji. Cidi citùfikisha pa kaaba kàà Mwoyi. Dîbà udi ushààla . . . upeta Mwoyi wà Cyendèlèlè.

<sup>177</sup> Mpindyewu, ndi ne mukàndà wà mbùmbilu wa myâkù wà cyena Ngèlikà, *The Emphatic Diaglott*. Mêmè kulonga ditùkù dikwàbò pa mwâkù kampànda.

<sup>178</sup> Mpindyewu, mu Yone 14, anyì Yone 3.16, tudi tusangana ne, mwaba wùmwèpelè wùdi wàmaba ne: “ikalà ne Mwoyi wà kashidi.” Mwaba mukwàbò ùdi wàmaba ne: “ikalà ne Mwoyi wà Cyendèlèlè.” Kàdi mu cyena Ngelikà, mu nkùdimwinu wa cyena Ngelikà . . . Mu beena Ebèlù, cidi cyàmba ne: “Mwoyi kawùyì ne ndekeelu to.” Mu cyena Ngelikà, nkwikala ne a-i-n-i-o-a-n.

<sup>179</sup> Mbyenze ànu bu mùdì “aeon.” *Aeon* ùdi “ntàntà” ùdì kàyì mwà kwikala to, mbûngì bùdì kabùyì mwà kubadiibwa. Mbisambùke pa miliyo, binunu byà miliyâlà, miliyâlà.

<sup>180</sup> Kàdi eci cidi *aionios* yà cikondo, Mwoyi wà Cyendèlèlè. Kàdi mwaku wà cyena Anglais bwà cyôcì aci ùdi wà Cyendèlèlè. Tudi bawùmanyè ne ng’wà Cyendèlèlè, *aionios*, anyì “Mwoyi ùdì kawùyì ne ndekeelu nàンsha.” Nwamònù anyì? Nènku wêwè ne Mwoyi ùdì kawùyì ne ndekeelu to, mmunyì mûndì mwà kubùtuka? Udi mulwè citùpà cyà Cyendèlèlè. Nènku kùdi cintu ànu cimwèpelè cyà Cyendèlèlè.

<sup>181</sup> Sàtaanà kí ngwa Cyendèlèlè to. To. Yéyè—yêyè wàkalwa Sàtaanà. Ifernò kí ngwa Cyendèlèlè to. Ifernò wàkafùkiibwa. Ki

ngwa Cyendèlèlè to. Ne mibidi eyi kî nyà Cyendèlèlè to. Yìvwa mifùkìlbwe.

<sup>182</sup> Kàdi Nyumà wa Nzambì ngwa Cyendèlèlè. Kacya kàtu mwanijì kwikala ne mbangilu to, anyì kacya kàtu mwanijì kwikala ne ndekeelu nànscha. Ne mùshindù ùmwèpelè utùdì mwà kupeta Mwoyi wà Cyendèlèlè, wa ku mwâkù wa cyena Ngèlikà awu, *Zoe* awu, mbwena kwamba ne: “Mwoyi wà Nzambì sungasunga,” tudi ne, tudi tulwa citùpà cyà Nzambì patùdì tulwa bânà bàà balùme ne bàà bakàjì bàà Nzambì, ne tudi ne Mwoyi wà *aionios*. Pa nànku citùpà cìdì ne mwoyi, twêtù, bàdì bajingulula Dìyì edi, kuumukila *apa* too ne *kwàka*, bàdì bajingulula, bàdì Mwoyi wà *aionios*, “Mwoyi ùdì kawùyì ne ndekeelu to.” M’Mwoyi wà Nzambì Sungasunga munda mwètù. Amen. Yoyòyò!

<sup>183</sup> Dìngà ditùkù, mu lwendu, mvwa ne dikokangana, ne Ntèmù wa Yéhowàh. Mpindyewu, ncìyi ndyûla ditabuuja dyà nì nganyì nì nganyì to. Tudi ne bààbûngi bàdì bakùdìmune mucima basòmbe mwaba ewu, buumukila mu Bantèmù bàà Yéhowàh. Umwe wa ku balubuludi bëètù bàà èkèleeziyà uvwa Ntèmu wa Yéhowàh, *uvwa*, kàdi wàkasùngidiibwa, yéyè ne famiye wendè. Tatwèndè uvwa mubadi; Mwanèètù Wood ne bakwàbò abu. Bânà bàbò bônsò bàà balùme ne bàà bakàjì, pàmwè ne bônsò bààkalwa, e kupetabò Nyumà Mwímpè, bwalu bìkèènà-kumònà byà Nzambì byàkabàmbila bìvvàbo benzè. Ne bivwàbo... Nwamònù anyì? Ke cyàkacyènzà.

<sup>184</sup> Mpindyewu, kàdi mwaba ewu, Bantèmù bàà Yéhowàh mu mukàndà wàbò, bàdi bàmbamù ne mupùyà wûdì weyela awu ke musùùkà. Mpindyewu aci kacyena mwà kwikala cilelèlè to. Mupùyà ûdì weyela kî mmusùùkà to. Byôbì nànku, udi—udi musangu ùmwè udi musùùkà wà mùshindù kampànda, musangu ùdì ùlonda udi muntu mukwàbò wa pàtupù, udi mupàtùle mwinè musùùkà awu. Wamònù mwaba ûvwa mwà kwikala usanganyiibwa’s. Mpindyewu, mupùyà ndupeepeplè, ne luopeepèlè ndôlò lûdì weyela mu mimpèmpè yèbè.

<sup>185</sup> Npindyewu, bàdi bàngata Mufundù wà kwàka wà ne: “Nènku Nzambì wàkapùdija Mupùyà mu mimpèmpè, ne yéyè wàkalwa musùùkà wùdì ne mwoyi.” Mpindyewu, ndi muswè kunùkonka cintu kampànda. Piìkalàbi ne yéyè ûvwa muntu, mmupùyà wà mùshindù kaayi ùvvàye wèyela kumpàla kwà Nzambi kumwelayè Mupùyà Wendè wà Mwoyi munda mwèndè? Nwamònù anyì? Mmupùyà wà mùshindù kaayi? Yéyè’s ûvwa muntu wa wèyela, mwikalé ne mwoyi. Èè, dìbà adì, piìkalàbi nànku, dìbà adì nyama yônsò ûdì musùùkà ûdì ne mwoyi, bwalu bàdi bëyela musùùkà wa buntu, ne musùùkà wètù, ne bônsò pàmwè. Dìbà adì Yesù kàvwa ne cyà kwikala mufwè to. Mulambu wà nyama ûvwa mwà kwikala mukùmbàne. Nwamònù anyì? Pa nànku, mwanèètù, didìbingisha adì kî ndishindàma to.

<sup>186</sup> Kàdi cyàkenzà Nzambì, Yéyè wàkapùdila Mupùùyà wà Mwoyi wà Cyendèlèèlè, amen, pashiishe kulwayè musùùkà wùdì ne mwoyi, musùùkà ùdì kawùyì mwà kufwà to. Mpindyewu tàngilààyi mpindyewu. Tudi tudìbwinka mu bwìcì, bufika too ne mu nkèngiibwà yènù amu. Mònaayi. “Kupwidijaye Mupùùyà wà Mwoyi wà Cyendèlèèlè mu mimpèmpè yèndè amu, e kushààlayè musùùkà wà Cyendèlèèlè.” Bwalu, Nzambì wàkapwìdija, kaciyì cìdì bufuki bwénze to, kàdi cyàkenzà Nzambì, e kupwidijayè Mupùùyà wà Mwoyi mu mimpèmpè yèndè, e kulwayè musùùkà ùdì ne mwoyi.

Dîbà adi udi ungambilà ne: “Adàmà wàkafwà, Mwanèètù Branham.”

<sup>187</sup> Kàdi vùlukààyi ne, kumpàlà kwà Adàmà kufwàye, ùvwa ne mwânà wa mùkòòkò wâkamupikula. Àlèluuyà! “Aba bààkadyànjilàYe kumanya, Yéyè wàkabàbììkila.” Ùvwa ne mwânà wa mùkòòkò bwà kubàpikula. Ùvwa cifwànyikijilu. Adàmà wàkapònà. Pashiishe mwânà wa mùkòòkò wàkalongolodiibwa bwà Adàmà, bwalu mu mimpèmpè yèndè ùkaavwa mushààle Mupùùyà wà Nzambì wa Cyendèlèèlè, ne wàkalwa musùùkà wùdì ne mwoyi. Yéyè ùvwa mwânà wa Nzambì.

<sup>188</sup> Kacyìì mucùùyà wèndè to, byénze bu mwâkù wà cyena Àfrikè nànshà. Ncyéna mumanyè cìdì mwâkù wà cyena Ngelikà wàmba bwàcì to, bwa mpindyewu. Kàdi mwâkù wà cyena Àfrikè, bâdi bàbììkila ne *amoyah*, ùdì ùswa kwamba ne: “lupeepèlè; dikàndà dìdì kadìyì dimwèka ne mésù.” Nyama yìtu yèyelya ku amoyah. Bangènzàmpèèkàtù bâtu bëèyelya ku amoyah.

<sup>189</sup> Pa nànkú citùdì mwà kulwangena bwà Mwoyi wà Cyendèlèèlè ncinyì, piìkalabí ne musùùkà wà Cyendèlèèlè mmubwele munda mwètù ku dyèyela? Bwà cinyì tudi mwà kulwangana bwà Mwoyi wà Cyendèlèèlè? Bwátù ntanga cibwa's, mwanèètù. Nwamònu anyì? Kacyéna—kacyéna—kacyéna ànu mwà kucyènza to.

<sup>190</sup> Kàdi, Nzambì, nangananga bwà Adàmà, wàkapwìdija Mupùùyà wà Mwoyi wà Cyendèlèèlè, ne wàkalwa mutu wa Cyendèlèèlè pàmwè ne Nzambì. Ùvwa ne bukolè ànu bu Nzambì. Yéyè ùvwa nzambì wa mwânà. Yéyè ùvwa nzambì wa buloba; kàdi, kî Nzambì wa mu Dyulu to. Nzambì wa buloba!

<sup>191</sup> Ne dîngà ditùkù bânà bâà Nzambì nebàlwé cyàkàbìdì banzambi. Yesù ngudi mwambe nànkú. “Kî mbifundiibwe mu mikensi yènù ne: ‘Nudi banzambi anyi?’ Kàdi panwìkala nubììkila aba bààkabììkilaYe ne nzambì, aba bààkakùmbulà Nzambì, mmunyì munùdì mwà kuMpìisha, nwamba, pândì ngamba ne Mêmè ndi Mwânà wa Nzambì?” Nwamònu anyì? Mpindyewu tudi tubwela mu cintu kampànda cyà ndòndò.

Mpindyewu tàngilààyi eci dîbà ditùdì twenda tupopela musonso edi.

<sup>192</sup> Mpindyewu, s'ki bôbò aba. Yêyè ùdi mpindyewu mwânà wa Nzambì, kâdi ùdi wènza cilemà. Yêyè mmumanyè ne ùdi wènza bibì. Mpindyewu vùlukààyi ne, Adàmà kààkaseeswishiibwa to. Bible ngudi mwambè nànku. Timôtè wa Kumpàla 3. “Adàmà kààkaseeswishiibwa to, kâdi mukàjì awu ngwàkaseeswishiibwa, ûvwa mu dishipa dyà mikenji.” Adàmà wàkalonda Evà, bwalu yêyè ûvwa mukàjèndè.

<sup>193</sup> Byàmwomùmwè ne Kilistò, kààkaseeswishiibwa kùdì Sàtaanà to, kâdi wàkabwela mu lufù ne Mukàjì-musèla. Wàkaya kashààla ne Mukàjì-musèla, bwà Wàmònà mwà kupikula Èkèleeziyà.

<sup>194</sup> Adàmà ûvwa mumanyè ne ûvwa mupiïle, pa nànku wàkapatuka ne Evà. Nwamònou anyì? Kâdi kùvwa mwânà wa mùkòòkò mulongolola bwàbò bôbò, bwà ne bàvwa bapikula.

<sup>195</sup> Nènku bâna bàà mìkòòkò aba, leelù ewu, bàvvà badyànjila kumanya kùdì Nzambì abu, ne Nzambì mmubìikile, kùdi Mupikudi. “Muntu nànsha umwe kêna mwà kulwa kûNdì pàdì Taatù Wanyì kàyì mumukòke to. Ne bônsò bàdì Taatù muMpèeshe nebâlwé kûNdì.” Ncyà bushùwà anyì? Pa nànku kùdi Mwânà wa mùkòòkò mulongolola, kuumukila ku difùkà dyà dyulu ne buloba, mwaba wùvvà ménà àbò mafûnda mu Mukàndà wa Mwoyi wa Mwânà wa mùkòòkò awu. Mwânà wa mùkòòkò wàkalongolodiibwa, bwà kuseba njila wa ngâsà bwà yônsò wa kùdibo àbwelè mu dibiïkà dyà ku lufù, Mwânà wa mùkòòkò mulongolola; Mwânà wa mùkòòkò wa Adàmà, mpindyewu mònaayi, bu mùvvà Adàmà ne mwânà wa mùkòòkò mulongolola.

<sup>196</sup> Mpindyewu, aci ki Èkèleeziyà leelù ewu. Ncyêna nswa kwamba e—èkèleeziyà to. Nudi bamanyè mudi bwalu anyì?

<sup>197</sup> Ncyêna ngàmba eci bwà kunyangakaja cijila nànsha, ne ncyêna njinga bwà kutàpa mutu ku mwoyi nànsha. Ncyêna apa bwà kwenza nànku to, bu munkâdì mumvwìje kiipàcìlà kaanyi. Ndi mwab'ewu bwà kwambulwisha, kâdi cîndì nteeta bwà kwenza . . .

<sup>198</sup> Nudi bamanyè mùdì bwalu anyì? Mu bushùwà bwà bwalu, èkèleeziyà eyi kî maèkèleeziyà to. Kûdi Èkèleeziyà ànu umwèpelè. Aa nùnku mmaswa. Nwamònou anyì? Mmaswa. Ncyêna ne cintu nànsha cîmwè to . . . Bidi ànu bîmpè. Kâdi ndi—ndi muswè kunùjaadikilaci, mu tusunsa tukesè emu, bwà ne bôbò mmaswa ànu ètù à menemene aa. Wêwé udi wa mu diswa dyà ba-Méthodistes, wa mu diswa dyà ba-Presbytériens, anyì wa mu diswa dyà beena Mpenta, bwà pa bìdì bitàngila abi. Èyowà, um-hum. Maswa! Nwamònou anyì? Kanwêna mwà . . . Nwamònou anyì? Maèkèleeziyà mmaswa ànu ètù à menemene aa mùdì bantu ne mmwènènu yimwèyimwè bakùngwila pàmwè.

<sup>199</sup> Kàdi Èkèleeziyà ùdi Umwèpelè. Ne wêwè kwêna mwà kudivwija mwena Èkèleeziyà to. Wêwè udi mulediìbwé munda Mwèndè. Ne paùdìì ulediibwa munda Mwèndè, udi cidimba Cyèndè.

<sup>200</sup> Ànu bu famiye wanyì. Ndi nsanganyiibwa mu famiye wa Branham munda mwà bidimu makumi àtaanu ne bissàtù. Kacya kabàtu bandòmbe bwà mêmè kushààla wa mu fàmiyè ewu. Bwà cinyì? Ncyêna mwà kushààla wa mu fàmiyè ewu to. Ndi mulediìbwé Branham.

<sup>201</sup> Ne wêwè udi mulediìbwé mu Èkèleeziyà. Mpindyewu, bikwàbò byônsò ebi mmaswa. Nukààdikù beeble meeji ku cyôcì aci anyì? Èyowà's, mukalenge.

<sup>202</sup> Dînga ditùkù mvwa nkosa mashinda, ne mvwa munkaci mwà kwelangana meeji bwà, èè: “Èkèleeziyà munène wa munsantu wa Kâtòlikè,” mûdibo bàmubìikila. Mvwa ngènda ntùngunuka müşhindù awu, ne kwenda kukòsa mashinda.

<sup>203</sup> Ke Cintu kampànda kungimanyikaci, ne bukole bônsò, cyàmba ne: “KuCibiliikidi müşhindù awu to.” Ki mêmè e kukènzakana. Mêmè e kutùnguka ne kukòsa mashinda. Ke kungimanyikaci cyàkàbìdì, cyàmba ne: “Kubabiikidi Nanku to.” Cyàmba ne: “Bôbô bâdi diswa, ànu mùdì makwàbò amu. Bôbò kî ng’Èkèleeziyà to. Kûdi Èkèleeziyà umwe.” Nwamònú anyì? Bôbò mbidimba byà diswa kampàndà, bwalu udi mwà kushààla wa mu diswa kampànda. Kwénà mwà kushààla wa mu Èkèleeziyà to. Èkèleeziyà, udi ulediibwaMù. Udi ulwa cidimba Cyèndè ku Dilediibwa dipyadipyà, díbà adi cidimba cyà Fàmiyè, mwanèètù wa balùme anyì wa bakàjì munda Mwèndè.

<sup>204</sup> Mpindyewu indilaayi nnùbadilè mu *The Emphatic Diaglott* mwab’ewu cintu kampànda, cyà mu Bwàkabuulwibwà 17.3, ne Bwàkabuulwibwà bwà *The Emphatic Diaglott* ebu. Tàngilààyi ànu eci, mùdici cibadiibwa, ne mùdici—mùdici cinwàngana bilenga menemene ne cyôcì aci. Bwàkabuulwibwà 16, 17. Eyo. Mpindyewu tûbalààyi kaaba aka katancì kakesè cyanàànà. Téèlejààyi eci, ne ntèmà yônsò, Bwàkabuulwibwà 17.3.

*Ne umwe wa ku Banjèlo MWANDAMUTEKÉTE ABU mwikàle  
ne . . . Mpànzà MWANDAMUTEKÉTE wàkaluwà e kwakula  
nànyì, . . .*

<sup>205</sup> Ndi nùbadila, mu *Nkòngamyakù*. “Mwikale ne . . .”

. . . “*Lwâku, nénkuleejè CILUMBULWIDI* cyà *MUKÀJÌ  
MUNÈNE WA MASANDI* awu, udi musòmbe pa *MAYÌ MANÈNE*  
awu;

<sup>206</sup> Ne twêtù bônsò tudi bamanyè ne aci m’Vatican. S’ki cibèjibeji cyà *Mwenyi Wetù Wa Dyàlumingu* eci, cyùmukila mu èkèleeziyà wa Kâtòlikè, citwàmbila menemene cidici. Nwamònú anyì?

<sup>207</sup> Nènku eci cìdi cìcyàndamuna, cyàmba ne: “Kàdi anji indìla kakesè.” Cyàmba ne: “Kùdi mèna à mishindù yônsò,” cyàmba ne: “mafwànyine kwenza nkàmà yìsambòmbò ne makumi àsambòmbò ne yìsambòmbò.”

Mêmè kwamba ne: “Kàdi anjì indìlaayi kakesè.”

Yéyè ne: “Dînà dyèbè ndifwànyìne kwenza nkàmà yìsambòmbò . . .”

<sup>208</sup> “Kàdi,” mûngààkambà, “Ncyêna musòmbe pa tukùnà mwandamutekète to, mwikàle nkòòkesha bàà pa buloba, nànsha nàndu, nudi numònà’s.” Uh-huh! Nwamònù anyì? Ncyà bushùwà. Nwamònù anyì?

<sup>209</sup> [Mwanèètù Branham ùdi ùbala Bwàkabuulwibwà 17.1 ubadila mu *The Emphatic Diaglott*—Muf.]

...nénkuleeje CILUMBULWIDI cyà NDUMBA MUNÈNE, udi musòmbe pa Mâyì Manène;

<sup>210</sup> Mâyì, Bwàkabuulwibwà 17.15: udi “mupimbu ne misùmbà yà bantu.” Nwamònù anyì?

udi BAMFÙMÙ bàà pa BULÒBA bendè nendè masandi, ne bàdì BASÒMBE pa BULÒBA bakwàcìke MVINYÒ wa ma . . . MASANDI èndè.

<sup>211</sup> Mpindyewu ncinyì?

Nènku wàkandombola, mu Nyumà, mu Cipèèla; . . .

<sup>212</sup> *The Emphatic Diaglott* mpindyewu. Nwamònù anyì?

...ke mêmè kumònà Mukàjì musòmbe pa Nyama wa diikala dikùnze, mûle tèntè ne Ménà Mapendi à Nzambi, . . .

<sup>213</sup> Mpindyewu, mu King James, ùdi wàmba ne: “mûle tèntè ne ménà a kupenda nawù Nzambi.” Anjì indìlaayi kakesè, nènku nêncyàngâtè kaaba aka, katancì kakesè cyanàànà. Bwàkabuulwibwà, mwi3. Èyo, ki cyôcì eci. Èyo. Bwàkabuulwibwà, mvwa njinga kwamba 17, kî 7 to; 17, mpindyewu tèèlejààyi mvensà mwi3.

Nènku wàkantùntumuna mu nyumà kuya nàànyì mu cipèèlè: ke mêmè kumònà mukàjì musòmbe pa nyama wa diikala dikùnze, mûle tèntè ne ménà à kupenda nawù Nzambi, . . .

<sup>214</sup> Ke mùdì Anglais ucìfila nàndu awu. Cyena Ngelikà cyà ku muji kuumukila mu *The Diaglott* cìdi cibadiibwa nùndu, mu Bwàkabuulwibwà 17.3. Tèèlejààyi.

Nènku yéyè wàkandombola, mu Nyumà, mu Cipèèlè; ne nakamònà Mukàjì musòmbe pa Nyama—Nyama, wa diikala dikùnze, mûle tèntè ne Ménà Mapendi à Nzambi, . . .

<sup>215</sup> Aci's ncishiìlàngàne bikolè, kuumukila ku "ménà àdì àpenda Nzambì" too ne ku "ménà mapendi à Nzambì." Ncinyì aci? Nènku twêtù... Mpindyewu, yéyè ùvwa:

...MAAMÙ WA BANDUMBA...

<sup>216</sup> Twêtù bônsò tudi bamanyè aci. Kàdi ncinyì aci? [Mwanèètù wa balùme kampàndà ùdi wàmba ne: "Èkèleeyiyà wa Kàtòlikè wa cyena Loomò."—Muf.] Kabyèna bikèngela bwà wêwè kwikalà... Èè, ncyà bushùwà, aci ncifwànyìne kwangata èkèleeyiyà wa Kàtòlikè wa cyena Loomò. Kàdi yéyè ùdi "mûle tèntè ne ménà mapendi à Nzambì," ba-Méthodistes, ba-Baptistes, ba-Presbytériens, ba-Luthériens, mùdìbo bàdibìikila bônsò amu, "èkèleeyiyà yà Nzambì." Ménà mapendi Nzambì! Dishìlangana dyàbùngì pankaci pàà "ménà à kumpenda naawù Nzambì" ne "ménà mapendi à Nzambì." Bàdibìikila bôbò biinè ne: "Èkèleeyiyà wa Nzambì," ne bàdileeja kumpàla kwà bâà pa buloba; bâtwa twartà, ne bàンwa maalà, bënza maalu à lukutukutu, banwa nsupu mu didyà dyà dilòòlò, ne bikwàbò byônsò, ne bintàkanyi byà mìshindù yônsò byanyìshìbwemù.

<sup>217</sup> Kùdi Èkèleeyiyà ànu umwèpelè. Udi muledìbwé munda Mwèndè. Kwéna ubwela Mwômò amu to too ne paùdì usukudibwa mu Mashi à Mwânà wa mùkòòkò ne utwìbwá citampì kùdi Nyumà Mwîmpè.

<sup>218</sup> Dishìlangana kaayipu pankaci pàà "ménà à kupenda nawù Nzambì" ne "ménà mapendi à Nzambì." Nwacyümvù anyì? [Disangisha dìdi dyàamba ne: "Amen."—Muf.]

<sup>219</sup> Mêmè kubakula cyôci aci mu dindà emu pâmvwà mbala kaaba aka, kùdì... Ngènda mpweka, Cintu kampàndà e kungambilaci ne: "Bwela mu cibambalu cyèbè cyà bulàlu. Ambùlà *The Diaglott.*"

<sup>220</sup> Èe, cidi ànu ditùmìkila. Kwàjikì. Kubwelamù. Ki mêmè kubuulula Bwàkabuulwibwà 17. Mêmè kudyàmbidila ne: "Bwà cinyì Udi muswè bwà mêmè kubala cyôci eci?" Mêmè kubanga kubala. [Mwanèètù Branham ùdi ùtuuta cishònđò—Muf.] Ndi mwenze ànu ncitwa byanza anyì, "Ki cyôci aci." Ki mêmè kwambula crayon e kucifundà. Mêmè ne: "Ki cyôci aci."

<sup>221</sup> Mpindyewu, bâdi bângeela mbila bwà mûndì ntwa malongolodi misèbà. Ngwôwò ménà mapendi à Nzambì awu, àdìbo bàdibìikila bôbò biinè ne: "èkèleeyiyà yà Nzambì, ne èkèleeyiyà yà Kilistò, ne èkèleeyiyà yà ba-Méthodistes, ne maèkèleeyiyà." Mmaswa, kî mmaèkèleeyiyà to.

<sup>222</sup> Èkèleeyiyà umwèpelè, ki Èkèleeyiyà wa Mukalenge Yesù Kilistò awu. Ne Yéyè ùdi cinyì? Mubidi musokòme wà Yesù Kilistò mu mudimu pa buloba, mwenza ne cidimba cyà mu dyônsò dyà ku masangisha aa, udi muswè kwikalà cidimba cyà Mubidi wà Kilistò. Bidi bikukèngela wêwè kwikalà muledìbwéMù.

<sup>223</sup> Kàdi kushààla wa mwômò amu, mménà mapendi à Nzambì, mukàjì ewu. Mukàjì ewu, bukolè bwèndè!

<sup>224</sup> Nènku nwamònù ànu mpindyewu mene mùdìbo ne cyà kwangata bantu bônsò bàdì ne mmwènenu yà pabwàyi pa bîdi bitàngila ntèndeelèlu's, ne kubâtùma ku Alaska. Nudi bamònè cyôcì aci's. Miatabuuja ètù wônsò à pabwàwu awu.

<sup>225</sup> Kàdi ncinyì ciine aci? Nsangilu, Nsangilu wa Buloba bujimà wa Maèkèleeyiyà ne beena Kàtòlikè patûdì twakula apa bàdi ne didisangisha dinène mu Vatican mpindyewu, kuntu kwàka, kwinè aktu nkùdibò munkaci mwà kuteeta. Ne bëèpiskòpò bônsò aba, ne bikwàbò, bàdi bâteeeta bwà kubwela mu dyumvwangana kampànda, bwà kulwisha communisme. Bà pa buloba bàdi munkaci mwà kulwisha communisme, ànu pa kudisanga ne Bwena Kàtòlikè.

<sup>226</sup> Mbyenza ànu bu mùdìbi leelù ewu emu. S'ki twêtù aba, ànù mûmvwà mwambe. Tudi bayè... Tudi ànu bu bamane kutwa pansi. Tudi munkaci mwà kusomba, mwà kutùla mfranga mpindyewu, yà bitàdì byàfutàbò bidimu dikumi ne binaayi kuumukila ku mpindyewu. Ki mutûkaadì baye nànku awu. Nganyì udi ne mfranga yà buloba bujimà? Èkèleeyiyà wa Kàtòlikè. Mmu kiipàcilà kaayi kàyisombeshilàbu États Unis? Mbwà kulama kùmpanyì eyi yà mfwankà ne yà wiski ne bikwàbò. Mmwômò, nebàbàsombeyi. Piikalàbo benze nànku, nebàsumbishè bukenji bwàbò bwà bwanààbutè, bwônsò, kùdi èkèleeyiyà wa Kàtòlikè wa cyena Loomò. Tudi tudisanga. Tàngilàayi eci, mbitòòke too, mbitòòke too menemene kutàmba ne dibala dya cibèjibeji. S'ki cyôcì eci. Nwamònù anyì?

<sup>227</sup> Mba-Méthodistes, ba-Baptistes, ba-Presbytériens, ne bikwàbò, bàdibiìkila ne: "Èkèleeyiyà wa Nzambì." Kàtòlikè ne bintàkanyi byônsò byà mùshindù awu ebi ki bukolè bwà nyama wa lwonji bûle tèntè ne ménà mapendi à Nzambì. Ùdibiìkila wêwè mwine ne: "Ndi..." Mêmè kwamba ne...

<sup>228</sup> Mvwa tuyè mu lùpitaadi munu emu, àbìdì mashàale aa, mvwa tuyè bwà kasambidila muntu kampànda. Mêmè kwamba ne: "Netwikale ne cyà..." Üvwa mmààwù mundedi. Mêmè ne: "Netùsambidile maamù."

Ki inàbànzà awu kwambayè ne: "Kokaayi rìdô awu."

Mêmè ne: "Kwêna mwena Kilistò anyì?"

Yéyè ne: "Twêtù tudi ba-Méthodistes."

<sup>229</sup> Mêmè ne: "Twasàkidila. Mêmè mvwa ngèèla meeji ne pàmwàpa wêwè ûvwa mwena kwitabuuja." Mêmè kukoka ànu rido kunjikaye. Nwamònù anyì? Pa nànku, pawikala kùyì mwena Kilistò to, aci's ncishìllàngàne. Nwamònù anyì?

<sup>230</sup> Kàdi kwamba ne: "Tudi ba-Méthodistes," aci nkupenda kwà Nzambì. Nyama wa lonji, maèkèleeyiyà, àdi àbìkidiibwa ne mmaèkèleeyiyà awu, kaèna maèkèleeyiyà to. Swàyi ngìlkale

mutwîshìibwe ne cidi munkaci mwà kukwàciibwa pa mikàbà yà mèyi. Èyowà. Bôbò kabèèna maèkèleeyiyà to. Bàdi maswa. Bantu bâdi bâkashààla bâà mwômò amu.

<sup>231</sup> Kâdi kwêna mwà kashààla wa mu Èkèleeyiyà wa Nzambì udi ne mwoyi to. Udi mulediibwe munda Mwèndè, ku dibâtíiza dyà Nyumà Mwîmpè. Nènku paùdì mubâtìjìibwe ne Nyumà Mwîmpè, makolè aa mmatwìbwe cítampì munda mwèbè, ku Nyumà Mwîmpè, ne ki bwà cinyi: “Ewu udi mulediibwe kûdì Nzambì kàtu wènza mpèkaatù to.” “Kwêna mwà kwenza mpèkaatù to.” Ki bwalu mbwôbù abu’s. Kaa, ekèlekèle!

Tudi twakula ànu ditùkù dijimà cyanàànà, kî mmwômò anyì?

<sup>232</sup> Èkèleeyiyà m’Mubidi musokòme wa Kilistò, mulediibwe kûdì Mweyelu wa Nzambì. Kaakakakaka! Nwacyúmvù anyì? [Disangisha dìdi dyàamba ne: “Amen.”—Muf.] Èkèleeyiyà wa Nzambì mmulediibwe ku Mweyelu wa Nzambì. Nzambì wâkeela Mupùùyà mu mimpèmpè, yà Adàmà, mu nyumà, e kulwayè musùùkà ùdì ne mwoyi. Nuvwakù bamanyè ne beena mpenta, anyì Èkèleeyiyà mulelèlè wa beena Mpenta, mmulediibwe kûdì Mweyelu wa Nzambì anyì?

<sup>233</sup> Swâyì nnubadìle cintu kampànda, mu katancì kakesè cyanàànà pa bwalu abu. Ngânji mmonèbi tûng, katancì kakesè cyanàànà. Yone Munsantu, ngéèla meeji, kûnyààyàaku. Netùjandulè ne bìdi nànku bwa Èkèleeyiyà wa Nzambì, anyì kabyena nànku. Yone Munsantu, twanjìbi kumònà, ngéèla meeji ne aci ndwà ku 16,19; 20. Èyo. Apa ndi ngiitabuuja ne netùcipete, mwaba ewu mene. Èyo. Swâyì nnubadìle, bwà kumònà Èkèleeyiyà ní mmulediibwe ku Mweyelu wà Nzambì, anyì to, bu mùvvà Adàmà ku cibangidilu. Tàngilààyi.

Nènku ditùkù dìmwèdimwè adi ku dilòòlò, ciikàle  
ditùkù dyà kumpàla dyà lumingu, pàvvà biibi bikàngà  
ne bayiddi badìsangìshe bwà bwòwà bwà beena yudà,  
Yesù kulwa e kwimana munkaci mwàbò, ne kubàmbila  
ne: Ditalala dìkalè kunùdì.

Nènku pààkamanàyè kwamba nànku, yéyè  
kubàleeja... byanza byèndè ne luseke lwèndè.  
Mùvvà... Pashiishe bayiddi bàvwa ne disànska,  
pààkamònàbo Mukalenge. Ne Yesù...

Ke pashiishe Yesù kubàmbila kàbìdì ne: Ditalala  
dìkalè kunùdì: bu mùdì Taatù wànyì muntùme,...  
mémè pàànyì ndi nnütùma.

<sup>234</sup> Tàngilààyi. Taatù wâkamutùma wàkabwela munda Mwèndè. Ne Yesù, pàdìYe ùtùma muysiidi, Üdi ùbwela munda mwèndè. Umwèumwè awu wâkatùma awu; Nzambì.

Nènku pàkambàyè nànku, wàkabèèla mupùùyà, e  
kwambaye ne... Akidilaayi Nyumà Mwîmpè:

<sup>235</sup> Èkèleeziyà, muledìibwe ku Mupùùyà wà Nzambi! Pààkadìfumbà cipidi eci kuulu kwàka, mu dikùmbana, ke Mupùùyà wà Nzambi kubàpwekela ne: “Akìdilaayi Nyumà Mwímpè,” dìbà adi udi mwâna wa Nzambi. Udi mwà kudivwija wa mu cintu kampànda cyûdì muswè kwikala aci, kàdi udi muledìibwe mu Èkèleeziyà wa Nzambi udi ne mwoyi, muledìibwe kùdi Mupùùyà wà Nzambi. Nzambi wàkabèèla mupùùyà pambidi, wàmba ne: “Akìdilaayi,” yoyoyo, “Nyumà Mwímpè.” Kaa, ekèlekèle! Ki bwalu mbwôbù abu’s.

<sup>236</sup> Kabiyì byà ne: “Lwâku ùshàale wa ku twêtù nànsha, fûndishà dînà dyèbè apa to.” Kàdi ne madyà ènù à dilòòlò à nsupù awu ne byônsò bìdi byèndelamù abi, nudi nukashààla bàà mu diswa kampànda. Udi mwà kudivwija wa mu diswa dyà ba-Méthodistes, diswa dyà ba-Baptistes, diswa dyà Presbytériens, diswa dyà Kâtòlikè, anyì diswa dyà beena Mpenta, cintu kanà cyônsò cyûkaashààdi wa mu cyôci aci, kàdi’s udi ukashààla wa mu diswa kampànda.

<sup>237</sup> Kàdi paùdì ulwa mwâna wa Nzambi, udi muledìibwe ku Mupùùyà wà Nzambi. Amen. Mbitâmbile bwîmpe kulekela cintu aci, ànu mwaba awu mpindyewu. Mbîmpe.

<sup>238</sup> Mwoyi wà Nzambi ùdi kàbìdì dìbà adi munda mwèbè, mwàkamba Yesù. Indilaayi kakesè. Yesù wàkamba ne: “Mêmè ndi Mwonji wa mvinyo. Nwênu nudi matàmba.”

<sup>239</sup> Mpindyewu tàngilààyi. Dikokangana dyàbò dìvwa dyà cinyì ne Yesù? Dikokangana dyàbò ne Yesù, bwalu Yéyè ûvwa Muntu ùDivwija Nzambi. Yéyè ûvwa Nzambi. Nzambi ûvwa mu Kilistò. Nwamònou anyì? Ki Yéyè kubàmbila. Wàmба ne: “Kàdi kanùntàngidi Mêmè to. Ki Mêmè to. N’Taatù Wanyì, ne Yéyè mmusòmbèle munda Mwànyì.” Kaa! Nwamònou anyì?

<sup>240</sup> Mpindyewu, bàvwa bâtàngila mubidi mukesè wùvvwa muledìibwe kùdi Mâriyà awu. Nwamònou anyì? Awu kàvwa Nzambi to. Ùvwa m’Mwâna wa Nzambi, kàdi Nzambi ûvwa mu Mubidi awu. Ùvwa n’Nzambi. Yéyè ne: “Mêmè nciyì ngenza byenzedi byà Taatù Wanyì to, dìbà adi nùMpìishe. Kàdi nganyì wa kunùdì udi mwà kuMpìisha bwà mpèkaatù, bupidyà bwà Dîyi? N’Dîyi kaayì didì Nzambi mwakùle didì kadiyì dyuwile mu Mêmè?” Mpèkaatù mbupidyà. “Nganyì wa kunùdì aku udi mwà kumpiìsha Mêmè bwà mpèkaatù?” Mpèkaatù mbupidyà. “Ndejaayi tûng. Pangììkalà Nciyi ngènza byenzedi byà Taatù Wanyì to, dìbà adi kaNungiitâbùji to. Kàdi Mêmè ngenza byenzedi byà Wanyi... Nànsha wêwè kuyì mwà kuNgiitabuuja to, itâbùujà byenzedi bîndì Mêmè ngènza, bwalu byôbì bida bifila bujaadiki.” Mu mûshindù mukwâbò ne: “Taatù udi munda Mwànyì, mwikàle ùDifidila bujaadiki bwà Yéyè mwine.” Bwalu: “Nzambi ûvwa munda mwà Kilistò, ùpungisha bàà pa buloba ne Yéyè mwinè.” Nwacyúmvù anyì? [Disangisha dìdi dyàmبا ne: “Amen.”—Muf.]

<sup>241</sup> Èè, mpindyewu, Mwoyi ùmwèùmwè ùdì mu mwonji wà Mvinyò awu ùdi kàbìdì mu ditàmbà. Munyì muwàyà kashààla wa mu Wôwò awu? Kabyèna mwà kwenzeka to.

<sup>242</sup> Mvwa mumònè mucì ànu àbìdì adi pansiì aa, mu lupangu lwà micì lwà Mwanèètù Sharrit mu Arizona, ùvvà mukwàmè bimuma bishìllàngànè byà madìmà ku matàmbà àwù. Cìvwa ncinyì aci? Ùvwa—ùvwa mucì wà madìmà a orange, orange wa navel. Kàdi kùvwa madìmà à—kùvwa ma—madìmà à mpùsù, tumàndàleena, orange wa mutwile, ne cimuma cyà mbòmà. Kùvvà byà mìshindù yônsò. Mémè kwimana, kutàngila mucì awu. Ki mémè kwamba ne: “Mwanèètù Sharrit, udi uswa kungambila ne mucì awu mmucì wa oranges anyì?”

Yéyè ne: “Bushùwà’s.”

<sup>243</sup> Ki mémè kwamba ne: “Èè, mbishi’s? Mbyenzeke bìshi nànkú?” Mémè ne: “Ndi mmònà cimuma cyà mbòmà *mwab’ewu*, ne tumàndèleenà *mwab’ewu*, orange wa mutwile *mwab’ewu*, ne didímà dyà mpùsù *mwab’ewu*, ne bimuma bikwàbò byônsò ebi. Mbilwè bìshi?”

Yéyè ne: “Èè, udi umònà’s, mbisomekamù.”

<sup>244</sup> “Kaa!” Mémè kwamba ne: “Èè, ndi muswe nkukonkèku cintu kampànda. Mpindyewu, wêwè mutùlekù cimuma cyà mbòmà eci ne madìmà à mpùsù. Mpindyewu, cidimu cyàlondà, necìkalè cinyì? Newìkalè dîbà adi ne didímà dyà orange dikwàmekù’s.”

“Kaa, to.” Yéyè ne: “Nedìpatulè didímà dyà mpùsù. Nwamònù anyì?”

“Kaa,” mûngààkambà, “twasàkidila.” Nwamònù anyì?

Kwêna mwà kwenza nànkú to. Kwêna mwà kushààla wa mwômò amu to.

<sup>245</sup> “Kàdi,” wàkamba ne: “cikondo cyônsò cììkalà mucì awu wutenteka cidimu ne wèla ditàmbà dipyadìipyà, ditàmbà adi dìdi dìkwama madìmà à orange, pììkalà mucì wà mvinyò awu ùpàtula ditàmbà dyàwù wowò mwinè.”

<sup>246</sup> Kàdi citùdì bateete kwenza nkukashààla bidimba munda Mwèndè, kàdi biikàle twenda mwinshì mwà dînà dyà Bwena Kilistò. Bwalu, tudi, ànu mùdì mu ngaakwìlù wa bantu bônsò twêtù tudi mucì wà madimà, Èkèleziyà wa Kilistò.

<sup>247</sup> Kàdi dibà dìdì Mucì wà mvinyò Mwinè awu wèla ditàmbà, nedìikale ànù bu Mucì wà dyàmbedi wàkapàtulaDi awu. Pììkalà Mucì wà dyàmbedi wàkapàtulaDi, bààkafùndà Mukàndà wà Byenzedi paanyimà pàDì; Wôwò ànu mudidìdinge mwele dikwàbò, neDifùndè mukàndà wà byenzedi paanyimà pààDì. Mmwômò.

<sup>248</sup> Pa nànkú, nudi nukashààla ànu bàà mu maswa awu. Kàdi paùdì muledìibwe ku Mucì awu... Udi ne cimuma. Ncyà

bushùwà. Udi ne cimuma, kàdi cyûdì wenza naaci ncinyì? “Udi ne cimwènekelu cyà difwànà dyà Nzambi, kàdi uvila bukolè bwàdì.” Udi uvila bimanyinu. Udi uvila maalu à kukèma. Udi uvila Nyumà Mwîmpè. Udi uvila dyakula dyà mu myakulu. Udi uvila bikèènà-kumònà. Udi uvila bipròfetà. Udi uvila dyondopa. Kàdi, nànscha nànku: “Kudìnyika wêwè mwine dînà.” Ki bwà cinyì kabyèna bikèmesha pààkamba Nyumà Mwîmpe ne: “Bukolè, bwà misùmbà yà bantu, bûle tèntè ne ménà mapendi à Nzambi, bushùwà, bàdìbììkila ne: ‘Beena Kilistò.’” “Ne cimwènekelu cyà difwànà dyà Nzambi, kàdi biikale bavila bukolè bwàdì. Bà nànku àbu tâpùlukà naabò, bwalu mbàà mùshindù awu bàdì balombola bakàjì bàà bukooya bàdì bûle tèntè ne nkukà yà mùshindù yônsò.”

<sup>249</sup> Malongolodi à mùshindù yônsò! Èkèleeziyà mmupàtè tèntè ne bààbûngì menemene, ne musùmbà wà mùshindù *ewu*, ne musùmbà wà mùshindù *awu*. Kàdi bishi bwà musùmbà wà bantu bàà Yesù Kilistò? Nwamònù anyì? Tudi ne bintu bikwàbò byônsò ebi, ne tudi babàmbidìkile èkèleeziyà ne bujitu pansi. Mpindyewu ki bwalu mbwôbù abu’s.

Kwêna mwà kushààla wa mu Èkèleeziyà nànscha.

<sup>250</sup> Udi ukashààla wa mu diswa kampànda. Udi cidimba cyà mu diswa kampànda, cyà mu musùmbà wa bantu kampànda, ànu mütù diswa amu. “Tudi twitabuuja *eci*. Tudi ne ètu malondyanganyi. Tudi ne yètù mînsokòntù, ne bikwàbò.” Nudi nwenza pèènù mùshindù wà mwomùmwè awu, cîdiku ncyà ne nwénù nudi nukashààla bàà mu èkèleeziyà udi údibììkila ne ng’èkèleeziyà.

<sup>251</sup> Kàdi kwêna mwà kashààla wa mu Èkèleeziyà to. Nwénù nwakashààla bidimba byà mu diswa, kàdi kí ng’Èkèleeziyà to, bwalu nudi nulediibwa mu Èkèleeziyà awu ne Mvinyò Mwinè.

<sup>252</sup> Mpindyewu anjì indìllaayi kakesè. Tàngilààyi. Nênjikijè, paanyimà pàà katancì. Mònaayi. Mfwilaayikù luse. Ncivwa—ncivwa ne meeji à kwamba aci to. Tàngilààyi. Tàngilààyi.

<sup>253</sup> Piìkalà Nzambi mulamakaje Mukàjì-musèla ewu pàmwè ne mwinè Nyumà awu, dîbà adi’s Udi ùlamakaja pàmwè muntu nkààyà ne mwinè Nyumà awu, nwamònù’s, dîbà adi udi mulediìbwé mu Bukalenge abu. Ne pashìishe Mwoyi mwinè wùvvà mu Èkèleeziyà *ewu* awu, ùdi mu Èkèleeziyà *awu*, ne Yéyè *awu*, Yéyè *awu*, Yéyè *awu*, Yéyè *awu*. Ne Mwoyi mene ùvwa mu cizubu, Mwonjì, Yesù, udi mu cidimba cidi Yé mupâtule. Butumbi’s wè! “Ne bintu bìmèwèbìmèwè bindì ngenza abi, byenzedi bindì Mémè ngenza ebi, nenùbyençè pèènù.” Ki cidimba cilelèlè cyà Mubidi wà Kilistò ncyôci, kakuyì dînà ni ndyà mùshindù kaayi diCilamika pambidi nànscha. Byenzedi menemene byà muntu nkààyà awu bìdi bijaadika kùdïyi ùfùmina. Nsòmbelu wendè ùdi ujaadika cidiye.

<sup>254</sup> “Wêwè udi cidimba kaayi? Mmu mubidi kaayi muwûdî?” Mubidi wa Kilistò. “Èè, nkwepi kûdì mukashâàle wa Mwômô?” Bwâlâ. Mêmè ndi muledììbwemù. Nwamònù anyì? Ndi muledììbwemù.

<sup>255</sup> Kabyèna bikèngela bwà wêwè kubambila to. Mbamanyè cìdì cyenzèke. “Wêwè, mmunyi mûdì mwà kuteemesha kàndeyi kàdi kukâbwikidi ja mèèsà?” MwàkambàYe. Nwamònù anyì? To, to.

<sup>256</sup> Paùdì ulediibwa mu Bukalenge bwà Nzambì abu, dîbâ adi Mwoyi, Mwoyi mwinè wùvvâ munda mwà Yesù awu. Dîbâ adi udi ucýuka bwalu bwà misùükâ. Dîbâ adi kwêna ne cyà kutèndèkeena bantu, bwà kulwabò ku cyoshelu nânsha. Kabyèna bikèngela bwà wêwè kusèngeleela muntu kampànda to, bwà kulwa kukeba pàmwè ne bâdì ku cyoshelu nânsha. Èyowà. Bi—bi—bi—bintu bìdi biditucila nkòkâ ànu nkàyaabi, bwalu mBitwibwe citampì mu wêwè. Wêwè udi cintu cijimà cyà Nzambì. Udi mutwibwe citampì kûdì Nyumà Mwîmpè.

Mpindyewu nudi bamanyè cìdì “Nyumà Mwîmpè” ùmvwija anyì?

<sup>257</sup> Ki mbwena kwamba ne: “Mvwa mutùpika e kwela mbilà to. Mvwa ne njiyà yà pabwàyì.” Abi byônsò mbîmpè. Mvwa mutùpike ne mwele mbilà, ne mûmvwe njiyà yà pabwàyì. “Ndi mwakùle mu myakulu.” Ndi ngìtabuuja ne Nyumà Mwîmpè ùtu wâkula mu myakulu. Bushuwà’s. “Nkààdi muumvwije.” Èyowà’s, mukalenge. Ndi pàànyì, ngìtabuuja nânku. Kàdi kî ng’Aci to. Kî ng’aci cîndì ngàmba to. Kûdì mwà kwikala ditùbu lwà mwaba kampànda. Kûdì mwà kwikala ditùbu *mwaba ewu*, mu lutùlù lwénù.

<sup>258</sup> Muntu kampànda àdìdìngè àkubàngùlè dipì ku luseke, mu mpàla, neùfile lukwàbò anyì? Kàdi wêwè udi wamba ne: “Cyena lubombo cyà manyanu cyàcyà!” Dîbâ adi kûdì ditùbu kampànda, mwaba kampànda, disosò ditùbùke. Mbîmpè tucilekèlè. Èyo. Kàdi’s nudi bamanyè cîndì njinga kwamba aci.

<sup>259</sup> Kàdi paùdì mutwibwe citampì mu Mubidi wa Kilistò, dîbâ adi udi mûle tèntè ne Nyumà, ne udi mwânà wa Nzambì.

<sup>260</sup> Kaa, mvwa njinga ngiikalapù nânsha ne tusunsa tutwè ku tútaanu’s, bwà kubala cintu kampànda kaaba aka. [Disangisha dìdi dyàmba ne: “TÙngunukà. Cìbalààku, mwanèètù.”—Muf.] Kàdi nudiku bwà kuntwàla bwà tusunsa tukwàbò dikumi anyì? [“Èyowà.”] Ndi muswe kubala cintu kampànda, ànu katùpà kakesè cyanàànà. Mpindyewu, ne meeji wônsò matòòke, nkùnda kayakulungula to. Ndi muswè ànu kunùshindikila, nwamònù’s, bu twéti ànu mwà kubala cyôci eci bwà katanci kakesè cyanàànà. Ncîmpè kaciyi cyà kupicisha to. Ndi ne tuntu ànu tubìdi cyanàànà mwab’ewu, tûdì tufùma ku dimvwila mu meeji, tûndi njinga kwamba.

<sup>261</sup> Tùbuululààyi mu Yone Munsantu, nshapità mwi3, wâkula bwà Mwoyi wà Cyendèlèlè. Twänjâàyi kujandula cìdìCi

cyàmba apa bwà nshinga wa Mwoyi wà Cyendèlèlè ewu, Mwoyi wa Nzambì. Mpindyewu, mpindyewu tàngilààyi apa.

*Kuvwa muntu wa mu Bàfaalèsà, dínà dyèndè Nikòdemè, mulombodi wa beena Yudà:*

*Yéyè awu wàkalwa bwà bwalu abu kùdì Yesù ciibufuku, e kumwambilaye ne: Laabi, tudi bamanyè ne wéwé udi mulongeshi mufùmìne kùdì Nzambì:... muntu nànsha umwe kêna mwà kwenza bishimà ebi... Nzambì kàyì nendè to.*

<sup>262</sup> Mpindyewu, bôbò, tubàdì twà beena Yudà abu, bààkajingulula ne Yéyè ùvwa Mwânà wa Nzambì. Bâvwa bacimanyè. Ki mukòòkeshi wabò nyéyè ewu mwaba ewu, uMwambila ne: “Tudi bamanyè ne Wéwé udi Mulongeshi mufùmìne kùdì Nzambì, bwalu Mwoyi mene wà Nzambì ùdi ùtuuta nkòkà mu Wéwé.” Nwamònú anyì? “Tudi bamanyè ne dilongesha Dyèbè kí ndyà mu Wéwé Nkààyebè to. Ndyà kwà Nzambì, bwalu Nzambì ùdi ùdîshindika.” Nwamònú anyì? “Mwoyi wà Nzambì wùdì wùtuucila nkòkà munda Mwèbè.” Mpindyewu tàngilààyi.

*Yesù wàkandamuna e kumwambila ne: Bulelèlè,... Ndi nkààmbila ne: Muntu yéyè kàyì mulediùbwe cyàkàbìdì, kêna mwà kumònà bukalenge bwà Nzambì to.*

<sup>263</sup> Kaa, ekèlekèle! “Ànu wéwé mukashààle wa mu èkèleeziyà wanyì anyì?” Kaa! Tàngilààyi numònè mùdibo buumuka ku Cyôci? Nwamònú anyì? Nwamònú anyì?

*Yesù, dîbà adi Yesù wàkandamuna ne: Bulelèlè, bulelèlè, Ndi nnwàmbila ne: Muntu yéyè kàyì mulediùbwe ku mâyì ne... Nyumà, kêna mwà kubwela mu bukalenge bwà Nzambì to.*

*Eci cìdì cilediùbwe kùdì... mubidi mmubidi; ne cìdì cilediùbwe kùdì... Nyumà n'nyumà.*

*Kükèmi nànsha bwà pangààkwambìdì ne: Udi ne cyà kulediibwa cyàkàbìdì.*

*Lupeepèlè ludi lutuuta kùdilu luswè, ... Nwamònú's, lwàlukila cyàkàbìdì, nwamònú's, lwàlukila, nwamònú's.*

*Lupeepèlè ludi lùtuuta kùdilu luswè, ... kwêna mwà kuumvwa mutooyi... udi mwà kuumvwa mutooyi wàlù, kàdi kwêna mwà kwamba kùdilu lùfûma, anyì kùdilu luya to: nànkü ke mùdì ewu yónsò... udi mulediùbwe kùdì Nyumà.*

*Nikòdemè wàkandamuna e kumwambila ne: Mmunyì mùdì maalu aa mwà kwikala's?*

*Yesù wàkandamuna e kumwambila ne: Wéwé udi mulongeshi wa Izàlèlè, kàdi kùyì mumanyè bintu ebi?*

<sup>264</sup> Tàngilà kwàka, mwanèètù, muntu wa mapòlomè à—D.D., Ph.D., ne yìbìdì yà L.D., nwamònou's, “Kàdi kùyì mumanyè ebi bintu to?”

*Bulelèlè... Ndi nnwàmbila ne, Tudi twakula bitùdì bamanyè, ne tujaadika bitùdì bamòne; kàdi nwénù kanwèna nwakidila bujaadiki bwètù nànsha.*

<sup>265</sup> “Tudi bamanyè bintu ebi. Tudi babimòne. Tudi bacimanyè, kàdi kanwèna nànsha nwakidila bujaadiki bwètù nànsha.” Mukashààdi wa mu Èkèleeyìziyà's wè! Nwamònou anyì?

*Pììkalabi ne ndi mukwambile maalu à pa buloba, kàdi wéwè kùyì witabuuja to, mmunyi muwitabuuja, mémè mukwambile... maalu à mu dyulu?*

<sup>266</sup> Mpindyewu tèèléjààyi eci mwaba ewu. Tàngilààyi.

*Ne kakwèna muntu wákabànda mu dyulu, kàdi ànu ewu wákatuuluka ùfùmina mu dyulu, nyéyè Mwánà wa muntu mene udi mu dyulu.*

<sup>267</sup> Difwànyìkijilaayi aci tÙng.

<sup>268</sup> Nudi bamanyè's, musangu kampànda, Yéyè wàkamba ne: “Nudi nwela meeji kaayì bwà Kilistò? Yéyè m'Mwánà wa Nganyì?”

Kwambabò ne: “Mwánà wa Davìdì.”

<sup>269</sup> Yéyè ne: “Kàdi bwà cinyì Davìdì, mu Nyumà, ùdi ùMwambila ne: ‘Mukalenge wàkambila Mukalenge wanyì ne: “Sòomba Wéwè ku Dyànyì dyábalùme”?’ Munyì mùvvwà Mwánà wa mwà kwikala Mukalenge Wendè ne Mwanèndè?” Muntu nànsha umwe kàkàMukonka bÙngà bwalu to.

<sup>270</sup> Mu Bwàkabuulwibwà, Yéyè wàkamba ne: “Mémè ndi Muji ne Mùtòlokù wa Davìdì.” Nwamònou anyì? “Mémè ndi Mwonji wa mvinyò ne Ditàmbà. Mémè ndi cibangidilu. Mvwakù kumpàla kwa cibangidilu. Mvwa cibangidilu, ne—ne Mvwa Mùtòlokò Wèndè, kàbìdì.”

<sup>271</sup> Mpindyewu, ki Yéyè awu ne: “Muntu nànsha umwe kàtukù mwanji kupweka ùfùmina mu Dyulu to, ànu Mwánà wa muntu udi mpindyewu mu Dyulu.”

<sup>272</sup> Inábànzà kampànda wàkangela, lukonko, musangu kampànda. Mémè kwamba ne: “LÙngandamwineku.”

Wàmba ne: “Nganyì uvwa Yesù Ùlòmba mu budimi bwà Gethsemane?”

<sup>273</sup> Mémè kwamba ne: “ÙvwaYe wàmba awu Nganyì pààkambàYe ne: ‘Muntu nànsha umwe kàtu mwanji kubànda mu Dyulu, pa kuumusha ewu wakatùluka mu Dyulu, nyéyè Mwánà wa muntu mene udi mu... udi mpindyewu mu Dyulu awu?’ Nganyì?”

<sup>274</sup> S'ki Yéyè ewu, mwimane ànu kaaba aka ku mùsongà wà nzùbu, wàkula ne Nikòdemè, wàmba ne: “Mémè ndi mu Dyulu.”

Ncyà bushùwà anyì? Tùshìyààyi aci too ne dilòòlò edi. Udi wamba cinyi? [Disangisha dìdi dyàmba ne: “Amen.”—Muf.] Dìbà dikaadi dimane kupita. Kaa, ekèlekèle! Ndi ngànji kunùshiya nwelangana meeji pa cyôci eci ndambù, mu mapingaja emu.

<sup>275</sup> Mmunyi mûdì ubwela mu Èkèleeziyà? [Disangisha dìdi dyàmba ne: “Ndi muledìibwemù.”—Muf.] Muledìibwemù. Ku Cinyi? Mupùùyà wà Nzambì.

Ngeelè mupùùyà, ngeelè mupùùyà;  
Nyumà wa Nzambì udi ne mwoyi, ngeelè  
mupùùyà.

<sup>276</sup> Ki disambila dyànyì: lekela ànu Nyumà Mwîmpe elè mupùùyà. Kaa, ekèlekèle! Bwalu, Mupùùyà wà Nzambì, Ùdi cinyi? Mutwìbwé cítampì mu Bukalenge bwà Nzambì, mumanyè ne, pangààkatonda dyàmbedi, ngäkiitabuuja Yesù Kilistò. Eyowà.

Pashìishe, ku Diitabuuja dyànyì, ndi nkusàkidila bukolè, bukolè bwà difwànà dyà Nzambi.

Pashìishe ku bukolè bwànyì, ndi nkusàkidila dimanya dyà Dîyì.

<sup>277</sup> Ku dimanya dyànyì, ndi nsakidilakù lutùùlù, didikontonona. Ndi muswè aci be. “DitÙngà dyànyì s’ngwêwè ûndi nzànjika ewu, asàku musùùkà wànyì cifulu cya butumbi cyà didikontonona, kuumukila ku mbû ne ku mbû udi wela nsesà.” Nwamònù anyì?

<sup>278</sup> Lutùùlù. Kaa, ekèlekèle! Bateecìibwè. Kanùditacishi to; Sàtaanà neànùbadilèwu. Mêmè ndi mbànda cibàndilu mpindyewu. Nwamònù anyì? Ndi musàkìdile bukolè, dimanya, didikanda, mpindyewu bìkèngela nsàkidilè lutùùlù. Ncyêna ànu mwanji kupeta Nyumà Mwîmpè to.

<sup>279</sup> Pashìishe paanyimà pàà mêmè mumane kusakidila lutùùlù, ndi nsàkidila difwànà dyà Nzambì. Nudi bamanyè ne ncinyi ciine aci anyì? Kwikala bu Nzambì. Ndi nsàkidila cyôci aci. Ncìyì ndìtwàla bibì to. Ndi ngènza màalu mùdì mwena Kilistò mujaalame ne cyà kwenza. Kaciìkadi cintu citelakaja to. Cintu kampànda munda mwànyì, dinanga dyà Nzambì, ðísàba ànu kusàba. Nwamònù anyì? Nwamònù anyì? Kwàmbi ne: “Uh-uh-uh-uh, mulùmyàrà, mvwa mwà kucyènza, kàdi pàmwápà mbitàmbe bwîmpe ncicyenji to.” Nwamònù anyì? Huh-uh. Huh-uh. Cintu ncikwata mwaba, nànsha bishi.

<sup>280</sup> Ndilediibwa. Ndi muledìibwe mu *eci*, mu *eci*, mu *eci*, mu *eci*, mu *eci*, mu *eci*. Ne pashìishe dinanga dyà Nzambì, Kilistò, ùdi ùpweka ne ùtwa byônsò bìdì munda mwànyì abi cítampì, bwà mudimu. Nwamònù anyì?

<sup>281</sup> Dìbà adi cìdìYe wènza ncinyi pàdìYe ùmpèèsha Nyumà Mwîmpè apu? Ùdi ùkutèka pambèlu mu mwaba mutàpùlùke wèbè wà sungsunga, ùkutwà cimanyinu. Nwamònù anyì? Udi muntu mushììlàngane dìbà adi. Kwêna wa pa buloba, kàbìdi

nànscha. Nwamònú anyì? Udi mulwàcìshìlbwe bishìllàngàne. Udi mulwàtè bishìllàngàne. Kî mmùzàbì wa pa mubidi ewu to. To, to. Kwêna ne cyà kwikala mushìllàngàne ne wa pabwèndè, ne nkoolò munyungùlùkè, ne mushìngà mulemùle, byà nànkú awu to. To, to. Kwêna wenza aci to. Üdi ulwàta, mu mubidi emu, mùshindù ewu. Cyà mushinga mmùzàbì wà nyumà. Civwàlù cyà dibanjì ncimana kukuvwàdika. Wêwè udi cinyì?

<sup>282</sup> Ànu bu Yesù, tàngilààyì, ùvwa mubwikila kùdì mundìdimbi, ne mpàla Wendè wàkakùdimuka kumpàla kwàbò, ne civwàlù Cyèndè cyèla nsèsa bu díbà. Ki Yéyè awu, Yesù, Nzambì ùtèèka Mwan'Èndè Sungasunga. Nwamònú anyì? Ki pashìlshe kulwakù Môsà. Pashìlshe kulwakù Eliyà. Ki Peetèlò kwambayè ne: "Nudi bamanyè's, nci-ncintu címpè's cyà kwikala kaaba aka." Nwamònú's mùdi muntu ùkafika? Èyowà. Kaa, citàmba mfukilu cyenzeka! Kwambayè ne: "Twibakàayi ntentà yísàtù. Twibakè umwe bwà Môsà, ne umwe bwà Eliyà, ne umwe bwèbè Wêwè."

<sup>283</sup> Kàdi kàyì ànu mwanji kujikija kwakula, Nzambì e kukànga cintu cyônsò aci, wàmba ne: "Ewu m'Mwan'Àànyì munanga. Mu bintu byônsò ebi bingààkalomba Môsà, ne mupàtwile mikenji kùdì Môsà; bwakàne ku baprófetà; Wakabikùmbaja byônsò. Mutèèlejaayi. Ndi ngèèla cidya mpindyewu mpàtuke mu cimfwànyì. Mutèèlejaayi ànu Yéyè cyanàànà. Mutèèlejaayi ànu Yéyè cyanàànà." Kaa, ekèlekèle! Cintu cilenga kaayipu's wè!

<sup>284</sup> Nènku, patùdì tukùmbàja mishìngà eyi, ne tushààla bûle tèntè ne makolè à Nzambì aa ne bintu byà Nzambì ebi, díbà adi Nyumà Mwímpè ùdi ùtùùluka ne ùtùtwà cítampì mu Bukalenge. Kanùditàci nànscha. Muntu yônsò nèamanyè ne udi Nendè. Kabyàkukèngela bwà wêwè kwamba ne: "Èè, butùmbì kùdì Nzambì, ndi mumanyè ne ndi muMupetè. Ndi mwakùle mu myakulu to. Butùmbi kùdì Nzambì, ndi mumanyè ne ndi muMupete. Ntu muje maja mu Nyumà musangu kampànda." Kabyàkukèngela bwà wêwè kwamba díyì pa bwalu abu to. Bantu bônsò nebàmanyè ne udi Nendè. Kùtacishikù meeji to. Èyowà. NeàDifidilè bujaadiki bwà Yéyè mwinè. Yéyè neénze bwà kumanyikaci munkaci mwà bantu.

<sup>285</sup> Nzambì ànùbènèshè. Ndi ne disànkà dyàbûngì dyà kwikala neenù kaaba aka mu dìndà emu, kupìcila mu cikondo cyà bwobùmwè eci. Tèèlejàayi, kaèkèleeziyà kèètù kakesè aka nkancii, byôbì biinè katwêna ne mwaba bwà bantu bàdì bàlwà mwaba ewu to. Twétù katwêna bulongolodi to. Tudi twitabuuja ne tudi mu bwobùmwè ne bulongolodi bwônsò. Nudi nulwa mwab'ewu bwalu nudi baswè bwà kulwa. Nànkú nwènù, tudi banùnangè. Ne tudi baswè bulongolodi bwônsò, muntu yônsò . . .

<sup>286</sup> Ndi ngìtabuuja ne kùdi bantu mu malongolodi wônsò awu bàdì beena Kilistò. Mbânà bètù bàà balùme ne bàà bakàjì mu Kilistò.

<sup>287</sup> Pa nànku, ki bwà cinyì, katwèna ne mângà meeji to, cintu nànsa cîmwè cyà kudilamikakù, cintu nànsa cîmwè cyà kwenza to ànu kwikala mwena Kilistò. Bu mùvvà E. Howard Cadle ne ciibidilu cyà kwamba ne: “Twêtù katwèna ne mukenji to ànu dinanga, katwèna ne mukàndà to ànu Bible, katwèna ne twitabàayi to ànu Kilistò.” Mmwômò. Nwâlwayikù kutwèndela. Tudi ne disànka bwà bwalu abu. Tudi twitabuuja Èvànjeeliyò mu Kaabujimà, kantu ne kantu kônsò kàà Dîyì. Tudi twitabuuja ànu menemene mùshindù awu. Katwèna tusàkidilaKù cintu nànsa cîmwè to, katwèna tuumushilaKù cintu, katwèna tusàkidilaKù cintàkanyì nànsa cîmwè cyà bulongolodi to. Tudi tuDilekela ànu mùdìDi amu. Ki mùdìbi. Kàdi tudi ne disànkà dyà kunwàkidila. Lwâyi nwíkale neetù, dîbà dinùdì baswè. Twêtù tudi tusambidila babèèdi. Twêtù tudi twitabuuja cintu cyônsò cidi Bible wàmба bwà kwenza. Twêtù tudi “tupwà mateketa ètù mwoyi, paanyimà, ne tudi bambùlùje batàngile ku cimanyinu cyà Dibìkidiibwa ditùmbuke.”

<sup>288</sup> Mpindyewu cikwàbò cintu kàbìdì. Nenwànyishè bwà kwambibwaci anyì? Dyàbwàbwa mu dìndà... Nenùtangilè ku—ku cibàsà pambèlu pàpa, cikèènà-kumònà. Mvwa mupetè cikèènà-kumònà. Tuvwa bu pa dîbà itaanù jaajaaja, bu mûdì mukajànyì udi paanyimà pàpa mumanyè, anyì pa dîbà ìsambòombò. Mvwa mutàbàle. Twêtù e kubìika bwà kulongolola bânà bwà kuyabò mu kàlaasà.

<sup>289</sup> Ndi ànu mpeta byôbì ebi, ku musangu ne ku musangu. Ne nwénù bônsò nudi bamanyè's, yônsò wa kunùdì kaaba aka, bwà ne kabítukù bìpangila nànsa. Byôbì, kakùyì mpatà to mbipwàngànè. Nwamònú anyì? Kacya kabítukù bìpangila nànsa.

<sup>290</sup> Ki mêmè kwela meeji ne mvwa muntu wa disànka dyàbûngì menemene unkâdiku mumònà. Mvwa mwimàne mu dîbà, d-î-b-à, ne mvwa—ne mvwa munkaci mwà kuiisha Èvànjeeliyò kùdì disangisha dinènè, dyalàbàle.

<sup>291</sup> [Mwanèètù Branham ùdi wìkishà—Muf.] Mvwa muswè ànu bwà kumònà ni cìvwa munkaci mwà kukwàciibwa pa mikàbà.

<sup>292</sup> Di—disangisha dinènè, dyalàbàle, kàdi bàvwa basòmbele mu diitù kampànda. Ne nsèsà yà dîbà yìvwa yìbâtwa, ànu eku ne kwàka, bôbò munkaci mwà kuDìpeta, bàpetà Dîyì.

<sup>293</sup> Nènku ndi, bu pa ciibidilu, misangu yàbûngì ntàmba kuleepesha, too ne ku shòò, nyiisha ntàntà mule be. Ki mêmè kuiisha ntàntà mule, mu mùshindù wa ne disangisha kulwadi ne nzala bwà cyàkudyà cyà mubidi. Nènku bôbò, bàmwè bàà kùdìbo, kucyòkabò. Pa nànku bôbò kwimanyina kuulu, e kupàtukabò pambèlu bwà kapeta ndambù wa cyàkudyà, kubangabò kupàtuka pambèlu.

Mêmè ne: “Kanùpàtukikù to. Kanùpàtukiku to.”

<sup>294</sup> Mvwa ne tutòngòbèlà tÙbìdÌ kÙmvwa muswÙ kafika, kÙmvwa muswÙ kafika, mu diyiisha dyànyì. Ne Mukalenge ngÙvwa muyìmpeesha. Nènku muyiishi kanà yÙnsò ewu mmumanyÙ, paÙdÌ mumanyÙ bulelÙlÙ ne n'NzambÌ udi mukupÙeshaci, udi ulÙkuka ànu mudilu bwÙ kucyàmbìla bantu.

<sup>295</sup> Nènku mvwa ànu munkaci mwÙ kuyiisha, Charlie, ne mwÙnyì mwÙnsò mÙmvwÙ naamÙ, ngÈndÌ ànu mbyÙdÌja, nudi bamanyÙ's, ngÙamba ne: "Bintu binÈne byÙnsò ebi, ebi bÙdÌ NzambÌ munkaci mwÙ kwenza ebi. TÙngilààyi eci. YÙyÙ Ùdi Ùjingulula meeji à mu mwoyi. Ncinyì Aci? DÙyì." NgÈndÌ nya ànu mùshindÙ awu. KÙdi, kaa, mvwa njinga ne mvwa mwÙ kuvÙlukakÙ cÙmvwÙ ngÙamba ne cÙvwÙ cyena bwalu cyÙnyì. Ncyéna mwÙ kucivÙluka to. NwamÙnu anyì? KÙdi mvwa ànu munkaci mwÙ kuyiisha ne mwÙnyì mwÙnsò.

<sup>296</sup> Nènku mvwa ndÙbandila mÙmÙ mwine munkaci mwÙ kucyenza. Nènku pÙmvwÙ mwimane mwaba awu, mwikale ntÙngila, ki mÙmÙ kushala ndÙbandila mÙmÙ mwine munkaci mwÙ kuyiisha CyÙcì aci.

<sup>297</sup> Nènku mvwa ànu nyiisha, bwÙ ewu yÙnsò uvwa muswÙ kuntÙeleja awu. Nènku paanyimÙ pÙà katancì, mÙmÙ kujuuka, nudi bamanyÙ's, ki mÙmÙ kudyambidila ne: "ButÙmbi kÙdÌ NzambÌ's wÙ!" MÙmÙ ne: "TÙngilààyi bintu bilenga ebi, ne cikampÙnda, cikansanga!"

<sup>298</sup> DyÙkÙmwÙ, mÙmÙ e kumÙnÙ bantu bàbangÙ kuleeja bu ne mbuumvwa nzala yÙ cyÙkudyÙ cyÙ mubidi. Ne pa nÙnkÙ bàvwa bÙmvwe cyÙkudyÙ cyÙ nyumÙ cibÙkÙmbÙna, pa nÙnkÙ e kubangabÙ kupÙtuka. Nènku bàmwÙ bàà kÙdÙbo [MwanÙètÙ Branham Ùdi wÙla mwÙwÙ—Muf.] e kubangabÙ kuya.

MÙmÙ kudyambidila ne: "Mbwalu kaayì ebu ne bantu bÙnsò?"

<sup>299</sup> Ki—ki mÙmÙ kutÙngila, ki babÙka batekÙte aba bÙnda bÙndela, ku luseke lwÙnyì. Ki mÙmÙ kudyambidila... MÙmÙ kwamba ne: "IndÙlaayi kakesÙ, balundÙ bàànyì! IndÙlaayi kakesÙ! NenwÙlukile kÙbÙdÌ pÙkkalÙ dÙbÙ dibÙwÙlÙ." NwamÙnu anyì? MÙmÙ kwamba ne: "NenwÙlukile kÙbÙdÌ. KÙdi lekelaayi nnupÙeshÙ katÙngòbÙlÙ kÙà kumpÙla aka. Bintu byÙnsò bingaanÙlÙjÙ ebi, bÙdÌ bÙfÙmina penyì? MbyÙ penyì?" Ki mÙmÙ ne: "S'ke byÙbÙ ebi. BÙdÌ mu DÙyì dyÙ NzambÌ. BÙdÌ EMU MMÙDÌ MUKALENGE WÙMBA, mulayì WÙndÙ. Bwalu," MÙmÙ kwamba ne: "bÙnsò bwÙnÙ mfidÙlaayi bujaadiki, filaayi bujaadiki ebu, ne wÙnyì mudimu ÙdÙbo bantÙma naawÙ ngÙwÙ: 'KushÙàla ne DÙyì.'" MÙmÙ kwamba ne: "Mbwalu kaayi ebu neenÙ bÙnsò? KanwÙna mwÙ kuumvwa DÙyì anyì? Nudi ne cyÙ kuDyÙmvwa."

<sup>300</sup> Ki bàmwè bà kùdìbo kwambabò ne: "Mwabilaayi, mvwa njinga kupetakù ndambù wa bisùkwità," ne bikwàbò byà mùshindù awu.

<sup>301</sup> Èè, ki mêmè kwela meeji ne: "Èè, butùmbi kùdì Nzambi! Piìkalàbo bàjinga bìsùkwità, bàlekele bàye bàkabyangate."

<sup>302</sup> Pa nànku mêmè—mêmè kukudimuka. Mêmè kudyàmbidila ne: "Kaa, kàdi, udi mumanye mudi bwalu anyì? Mindìdìmbi neyipone, paanyimà pàà katancì, dyàkàmwè." Mêmè kwamba ne: "Pashiishe, dilòòlò edi, pààdisangisha disangisha dyàdfa kàbìdì, nembañfikishe mu katòngòbèlà, ne kubàmbila ne bintu bìvvwàbo bammònè mêmè ngènza abi bidi bìsanganyiibwa mu Dìyì dyà Nzambi, kabiyì mu mukàndà wà byenjenji bifwikàkaja anyì bulongolodi kampànda nànsha. Bidi bìsanganyiibwa mu Dìyì. Nwamònu anyì? Kantu ne kantu kônsò kàà cyòcì aci, mu Dìyì, bwalu mêmè ndi mutùmiiwbwe ne mudimu wà Cyôci aci."

<sup>303</sup> Ki mêmè kudyàmbidila ne: "Nudi bamanyè's, bôbò, muntu ne muntu, nebààlùkilè dilòòlò edi, pa nànku mònaayi cingènzà. Nempinganwine, ngènza bu udi upinganwina." Nudi bamanyè mùshindù ûmvwà mucyènze pa bikondo byà èkèleeyìyà ebi ne bikwàbò, ngàmba cîmvwà mwâmbé kumpàlè. "Nempinganwinepù, pa Dìyì, ne pashiishe katòngòbèlà kanènè, kàà dikèmè aka." Mêmè ne: "Ndibà kaayi dììkalaci's we! Butùmbi bwìkale kùdì Nzambi's wè!" Ki mêmè kudimònà ngènda nshààla mukesè menemene, mêmè e kuumvwa ne: "Butùmbi bwìkalè kùdì Nzambi." Ki mêmè kudimònà ngènda njimina mùshindù awu. Kàdi's ki mêmè ewu, mwimàne mwaba awu.

<sup>304</sup> Mpindyewu, ki dyumvwija dyàci ndyôdì edi. Nwamònu anyì? Cintu cyà kumpàlè cíndi mwêenze, bintu bìvvwà byenjibwe, bìvvwa bu myanu kùdì bantu, cibûngì cyà kùdibò. Ncyêna ngàmba nànku bwà Èvànjeeliyò mu Kaabujimà ne bansantu bâà Nzambi to, kàdi, ndi njinga kwamba ne, bwà cibûngì cyà bantu. Kanwikadikù nutàngila kùdì bâà pa buloba, kosmos, bu Mukenji wà Nzambi to. Panùdì nuya ne nwamba ne . . .

<sup>305</sup> Bu mwàkambà Boze ne: "Ntu misangu yônsò ànu . . ." Wàkamba ne: "Mvwa mupetè cilòtà, kùkaadi bidimu, ne—ne Nzambi ùvwa mwà kuntuma ku Chicago ne kunyùkushaku Chicago bwà butùmbi bwà Nzambi."

Mêmè ne: "Joseph, Ùkaadi mananè kucyènza."

"Mòna's," kwambayè ne: "kabàtu banyukushiibwa to kacya ku Moody."

<sup>306</sup> Mêmè kwamba ne: "Mwômò anyì? Ndi ngààkula bwà Èkèleeyìyà. Abu's nnyama yà dyasabò yìdì pambèlu pàpa. Abu bâdì ànu lupwishi lwà buloba, musùmbà ùdì wènda ûlalakana mu mísèsù awu, ba Yezèbèlà bâdì badilaabe bilaabu kwîsù ne bikwàbò abu." Mêmè kwamba ne: "Abi mpambèlu pàpa. Maswa manène ne bikwàbò abi nebyùpukè

e kudishindabì mu mìsèèsù mwàmwa.” Mêmè ne: “Yéyè ùdi wàkula bwà Èkèleeyiyà. Èkèleeyiyà udi mumòne dibuulula dyà Yesù Kilistò dimwènèshìlbwe, ne bôbò kuDijingulula. Mbafwànyìne kwikala kabàyì dikumi ne bâtaanu mu Chicago amu nànsha. Mbafwànyìne kwikala kabàyì dikumi mu lukòngo lujimà elu nànsha, mu cimenga cijimà cyà Chicago, bâdì mwà kupàtukamù.”

<sup>307</sup> Nukààvwakù bakwelèle meeji anyì? “Ànu mwàkadìbi mu matùkù à Noà, ki mwikalàbi kàbìdì ku Dilwa dyà Mwânà wa muntu, mùvwa misùukà mwandamukùlù misungìdìlbwe.” Uh-huh. Mbûngì kaayi bwà kapàtukà mu Sodomà? Nudi bamònè cîndì njinga kwamba aci anyì? Ndi ngeela mpatà ne ndyanza dijimà. Nwamònù anyì?

<sup>308</sup> Kàdi Èkèleeyiyà Yéyè mwinè mmupetè dinyukushiiwbwa. Mbaciyingùlùle. Bâvwa bamanyè Dîyi. Bâkamònà Dîyi pàvvwàDi munkaci mwà kwangata mubidi, ne bâàkaDibàkula. Mpindyewu tàngilààyi cyôcì aci bwà katancì, mpindyewu.

<sup>309</sup> Nènku Mukenji wà kumpàla ewu, pàvvwàbo mwà kuCimònà, bantu bônsò bààkaCilamata, bàmba ne: “Kaa, butùmbi kùdi Nzambì’s wè! Kaa, bu ngamònàpù cikampànda, cikasanga, ne cikankènga.” Ke bôbò e kuya, mùshindù ùmwèùmwè wàkabwelàbo awu. Nwamònù anyì?

<sup>310</sup> Nènku mpindyewu bâdi bèèla meeji ne: “Èè, ncyêna mumanyè to. Mpenyì paûdì mwà kadilamika’s? Mêmè ncìyi mufike ku eci to, necìkkale mùshindù ewu. Ne nebàngipâtè, lwà eku nùnku, nènku ncyà kwikala ne cintu apa to.” Bâna bèètù bàsòmba pansiò bàmba ne: “Èè, cîndì mufwànyìne kwenza ncinyì bu mêmè...?” Nwamònù mwaba awu anyì? Kabeenà bìimana ntàntà bule bukùmbànè bwà kujingulula ne n’Dîyi dyàkalayà Nzambì to, diikale dìmwènèshìlbwa. Nwamònù anyì? Nènku kupàtùkabò e kuya.

<sup>311</sup> Kàdi, kanùtacishi meeji to, mindidimbì yìkaadi pabwípi, nwamònù’s, pângààlukilà mu budimi bwà bwambi.

<sup>312</sup> Nudi bavùlùke, dilòòlò kampànda, bwà Mukenji wàkampeshaye musangu awu pàmvwà ntèèka dibwe dyà mu ditumba apu anyi? Ànu menemene. Yéyè kwamba ne: “Enza mudimu...” Yéyè ne: “Pawàpàtuka mu cikènà-kumònà eci, ùbale Timòtè Mwibìdì ku 4.” Nudi bamanyè’s, cìdi cisanganyiibwa ànu mu dibwe dyà mu ditumba amu, kùkaadi bidimu makùmi àsàtù ne bisàtù.

<sup>313</sup> Yéyè kwamba ne: “Enza mudimu wa mutangadiki, enza cijaadiki mu kaabujima cyà mudimu wèbè wà bwambi. Bwalu cikondo necìlkwe ciìkalàbo kabàyì bâtwàla Dilongesha dishimàte nànsha. kàdi bënda bâlonda nkùkà yàbò mene nebàdìvudijile balongeshi, bìkkale ne macì àbàsànsakana; nebàtangile ku myanu... buumuka ku Bulelèlà batàngile ku myanu.” Piìkalà aci

kaciyì ànu cyûle, ku dîyì ne ku dîyì to! [Katùpà kàà mukàbà wa mèyi munda mutupù—Muf.]

<sup>314</sup> Kàdi, vùlukààyì, dîbà adi, dîlòòlò dishààle, pàmvwa ncìyi nànsha mucìbale cyônsò to. Bidimu makumi àsàtù ne byà mu njila bîndì myiishe mu tabernacle ewu, kacya musangu nànsha ùmwè ncitu mwanji kusambuka pa aci to, ne ncyèna mumanyè ne mbwà cinyì to.

<sup>315</sup> Ntu pa ciibidilu ndikonka, too ne mwàkenzàbi ne, dînga ditùkù, mêmè e kumònà kaaba kàkambilà Yesù Muvùngu ne kutwàdìja kubala, ne kubala cyàbìbìdì cyà cipròfetà, e kwimanayè, ne kwamba ne: mu Kapènùmà mwàmwa, e kwamba Yé ne: “Nènku leelù ewu, cipròfetà eci cyákùmbànyi.” Bwà cinyì kààkabala cikwàbò civwà cishààle aci to? Cìdi cikùmbànyine Dilwa Dyèndè diibidì. Nwamònu anyi?

<sup>316</sup> Nènku ki mêmè kubala aci, ncìyi mumanyè to. Mêmè kwangata aci, kàdi's ki cyôcì aci, ànu kumpàla kwànyì menemene, ku Southern Pines, mu Caroline dwa ku Sud. Mu dîndà amu, mwimane pambèlu apu, nyukilangana ne Joseph Boze, mweyèmène ku luseke lwà kàshinyì, Mêmè kucìlenga. [Mwanètù Branham ùdi ùtuuta cishòndò—Muf.] Pôlò wàkamba ne: “Ndi... Bantu bônsò mbambènge. Kakwèna muntu udi mutwè ku cyànyì to. Demasè wàkundekela; munange maalu à cikondo eci. Kàdi mêmè mpindyewu...” Tàngilààyì. “Nènku nsenda wa byamu mmungenzele bibì bikolè.”

<sup>317</sup> Tàngilààyì civwà Demasè mwà kwikala mwele meeji cyà ne: “Mòna’s, mvwa mumònà Pôlò uyiisha Èvànjeliyò ne wòndopa babèèdì. Kàdi's ki yêyè mwinè ewu musòmbe, ûsaama, yêyè mwinè, mutwàle ngàngàbukà kampànda wènda wènda nendè, Lukà. Cikondo cyônsò cidiye ùya, ùdi ànu wàngata ngàngàbukà, muntu mwinè udi uyiisha byà kwà Nzambì awu. Mòna’s, mvwa mumumònà mutwè muntu kampànda bufofo. Wàmba ne: ‘Mukalenge àkutàndishe, ne newúshaale mpofo bwà cipòòlò kampànda.’ Kàdi ùlekela nsenda wa byamu ùmwipata mu disangisha. Ngeela meeji ne ùvwa mujimije bukolè bwendè bwà kutwàngana bufofo abu. Bakwètù wanyi, wàkajimija bukolè bwendè bwà Dyondopa dyà kwà Nzambì abu. Nzambì ùvwa mumwele nyimà.”

<sup>318</sup> Ncyèna ngeela meeji ne Demasè ùvwa mupàtùke mukabwele mu byà pa buloba nànsha, bwalu Demasè ùvwa wa mu... Nudi bamanyè bwalu bwèndè bulonda. Yêyè ùvwa wa mu dîkù, dinène dibanji. Kàbìdì ùvwa muswè kwenda ne bônsò bàà mu musùmbà awu.

<sup>319</sup> Kàdi, Pôlò, Pôlò mukèsè mukwàte ne byà luse awu. Cìvwà cinyì aci? Nzambì ùsòmbela ùlekela mudimu wà bwambi ûfika too ne mu cipidì aci, kàdi pashiishe e kuwàsayè cifulu cyà butùmbi.

<sup>320</sup> Wàkalekela Yesù ùfika mu cipidi aci. Tàngilààyiku. Pèndè ùvwa mwà kujuula bafwè, Pèndè mwà kwenza cyônsò cìvwà Ye muswè kwenza; kàdi ùlekelà mùsàlaayì wà cyena Loomò ùMujoomona mwedi ku cibàngà, ne ùMutwila matè mu mêsù. [Mwanèètù Branham ùdi wìdikija mwadi wà ditwila dyà matè—Muf.] KuMutuuta pa... KuMubwikila mukusù kwísù, kàdi kwamba ne: “Mpindyewu, Udi mumanyè, mbangàmbile ne Wêwè udi mucròfetà.” Bônsò bwàbò biimàne manzàlànzhàlè ne malènga, biikale bamutuuta mu mutù. [Mwanèètù Branham ùdi ùboobola cintu kampànda.] Bâmba ne: “Mpindyewu twambile nganyì wâKutuuci awu.” Yéyè ùvwa mumanyè uvwa muMutuute awu. Uh-huh. Ncyà bushùwà. Ùvwa mumanyè. Nwamònú anyì? Kàdi mudimu Wèndè wa bwambi ùvwa pabwîpì ne kwashiibwa cifulu cyà butùmbi.

<sup>321</sup> Ùtu ùkafika misangu yônsò mu cipidì aci cyà bìmwèka bu ne mmupùngile bikole, bikole menemene, ànu byètù byà mwambè kuya ebi, díbà adi Nzambì ùwàsa cifulu cyà butùmbi.

Éyi Mukalenge, cyènzekèku. Cyènzekèku, Mukalenge.

Twinyikààyi mitù yètù.

Ndi muMunange, ndi muMunange  
Bwalu Yéyè kumpàla . . .

Mpindyewu Mukukwilaayi. Twafùmu ku dipeta dilongesha dyûmè ncyóng.

Ne wàkampetela lupàndu  
Pa mucì wà Kàlvariyyò.

<sup>322</sup> Twélààyi byanza byètù muulu mpindyewu kùdìYe.

Ndi . . .

Mpindyewu ikàlaayi mu Nyumà, nwamònú's: “Ndi muMunangè”

. . . Ndi muMunange  
Bwalu Yéyè wàkannanga kumpàla.  
Ne wàkampetela lupàndu  
Pa mucì wà Kàlvariyyò.

<sup>323</sup> Mpindyewu, twìmanààyi kuulu, batwè makàsà ètù pansi.

Mu musambu wètù mukèsè wà ditangalajangana naawù, tudi twimba citùminyi cyà kumpàla, netùlabulangane ku cyanza muntu ne mukwèndè; citùminyi cìbììdì, netùwimbìlè Nzambì. Èyo. Ne pashììshe netùtangalakè.

Mpindyewu, twìmbààyi:

Angata Dînà dyà Yesù wéndè naadì,  
Wêwè mwânà wa tunyinganya ne dikènga;  
Nedìkupè disànkà ne busàmbi,  
Nda naaDi kwônsò kûyaayà.

Dînà dyà mushinga, Éyi dyà bupòle be!  
Dítèkemena dyà buloba ne disànkà dyà Dyulu;

Dînà dyà mushinga, Éyì dyà bupòle be!  
Ditèkemena dyà buloba... Dyulu.

<sup>324</sup> Mpindyewu, vùlukààyi eci, mpinndyewu. Nendombè, mwakùnyàànyì wa balùme, mwab'ewu, ûmvwà nendè mu cibambalu mu tusunsa tukesè emu; mwa—mwakùnyàànyì wa mushinga mukolè, mpandanjila mu ma-Assambleés à mu cipèèlè emu; ngápù ne dînà dyèndè mwoyi, nemmulòmbè bwà kutangalajayè disangisha mu disambila patùdì ànu twimba citùminyi cìdì cilonda eci:

Angata Dînà dyà Yesù wéndè naadi,  
Bu Ngabu ku butèyi bwônsò;  
Ne pàákujìngilà mateeta ku nseke ne ku nseke,  
Nungànà ànu Dînà dyà Cijila adi mu  
disambila.

<sup>325</sup> Tàngilààyi mùdì badémons buumuka dîbà adi. Nwamònù anyì? Mpindyewu, vùlukààyi ne:

Angata Dînà dyà Yesù wéndè naadì,  
Bu Ngabu ku butèyi bwônsò;  
Ne pàákujìngilà mateeta ku nseke ne ku nseke,  
Imànà ànu cyanàànà, ne nungànà Dînà dyà  
Cijila adi mu disambila.

<sup>326</sup> Tàngilààyi cìdì cyènzekà. Èyo. Bônsò cyàpàmwè mpindyewu.

Angata Dînà dyà Yesù wéndè naadi,  
Bu Ngabu ku butèyi bwônsò;  
Pàákujìngilà mateeta ku nseke ne ku nseke,  
(Cyúdì wenza ncinyì, mpindyewu?)  
Nungànà ànu Dînà dyà Cijila adi mu  
disambila.

Dînà dyà mushinga, (Dînà dyà mushinga!) Éyì  
dyà bupòle be! (Éyì dyà bupòle be!)  
Ditèkemena dyà buloba ne disànkà dyà Dyulu;  
Dyà mushinga mukolè..., (...?... nwamònù's  
mwânà mukesè wa bakàjì awu...?...) Kaa  
dyà bupòle be! (Lwâku apa, munanga wanyì.)  
Ditèkemena dyà...

<sup>327</sup> Panùdì biimàne kaaba aka apa: Cikondo cyà ndekeelu címvwà nsanganyiibwa mu tabernacle, apa (Maamù ewu nyéwù údi munkacì mwà kuseka ne kufunkuna mwânà wa mu dibòko.), mwânà wa mu dibòko ewu ùvvwa mukangìbwé milonda yà balema. Ki yéyè ewu, wènda ùnyemakana lùbilu mwaba ewu, ùnàya byà kalolo leelù ewu. Kî mbìmpe anyì? Mukalenge àtumbishìbwé. Mpindyewu, tanggalààyi kùnu: Munanga wanyì, tùpika tüng ùbàleeje, Iwà kuneeku, müshindù údì mwà kunyemakana. Nwamònù anyì?

Kaa, Dînà dyà mushinga mukolè,  
 (Nwavùlukaayi bwà, Mèèsà à Mukalenge  
 dilòòlò edi, mpindyewu) . . . dyà bupòle be!  
 Ditèkemena dyà buloba ne disànkà dyà Dyulu;  
 Dînà dyà mushinga, Éyì dyà bupòle be!  
 Ditèkemena dyà buloba ne disànkà dyà . . .

<sup>328</sup> Mpindyewu twìnyikààyi mitù yètù. Nénku vùlukààyi masangisha à dilòòlò edi, mpindyewu; kàbìdì kùdì Mèèsà à Mukalenge dilòòlò edi. Ne vùlukààyi bônsò ne, nwêñù, bàdì beena Kilistò abu, tudi tunùbiìkila bwà kulwa kwangata neetù Mèèsà à Mukalenge. Tudi bindìle cikondo cyà dicyònökòmoka.

<sup>329</sup> Mpaasàtà wetù wa mushinga mukolè, kaaba aka, Mwanèètù Neville, ne . . . Mbanganyì bàdì banangè Mwanèètù Neville? Ambààyi ne: “Amen.” [Disangisha dìdi dyàmba ne: “Amen.” —Muf.] Tèèlejààyi, bânà bëètù, ntèèlejàayi mêmè bu wenù . . . bu umwe wa ku baampaasàtà bàà mu èkèleeziyà emu: Swìkàkanààyi ne Mwanèètù Neville. Shààlaayi nendè. Nwamònu anyì? Yéyè mmusadidi wa Kilistò. Shààlayi nendè. Bible mmwambe ne: “Tùdísangishaayi kaaba kàmwè: ne nagananga panùdì numòna ditùkù dibì edi dyènda dítàmba kuseemena.” Lwâyi mu masangisha, lwâyi; tùbwelààyi ànu kubwela ne kushààla ku luseke lwà mpaasàtà wètù. Nwamònu anyì? Shààlaayi ànu nendè . . . 

62-1104M Ménà Mapendi à Nzambì  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabéji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)